

दशवैकालिक सूत्रम्

नंदि सूत्रम्

उववाह सूत्रम्


[साधा २२]

णमो समणस्स भगवओ महावीरस्स

॥ श्रीशय्यंभवसूरिविनिर्मितं ॥

॥ सिरि-दसवेआलिअ-सुत्तं ॥

(श्रीदशवैकालिकसूत्रम्)



—: प्रकाशक :—

॥ जामनगर वास्तव्य पंडित हीरालाल हंसराजेन स्वकीय
श्रीजैनभास्करोदय मुद्रणालये मुद्रितम् ॥

संवत् १९९४

मूल्य ०-१०-०

सन् १९३८

॥ णमो समणस्स भगवओ महावीरस्स ॥

॥ सिरि-दसवेआलियं-सुत्तं ॥

॥ दुमपुप्फिया पढमं अज्झयणं ॥

धम्मो मंगलमुक्किट्ठं, अहिंसा संजमो तवो । देवा वि तं नमंसंति, जस्स धम्मे सया मणो ॥ १ ॥
जहा दुमस्स पुप्फेसु, भमरो आवियइ रसं । ण य पुप्फं किलामेइ, सो अ पीणेइ अप्पयं ॥ २ ॥
एमेए समणा मुत्ता, जे लोए संति साहुणो । विहंगमा व पुप्फेसु, दाणभत्तेसणे रया ॥ ३ ॥
वयं च वित्तिं लब्भामो, ण य कोइ उवहम्मइ । अहागडेसु रीयंते, पुप्फेसु भमरा जहा ॥ ४ ॥
महुगा (का) रसमा बुद्धा, जे भवंति अणिस्सिया । नाणपिंडरया दंता, तेण वुच्चंति साहुणो ॥ ५ ॥

त्ति बेमि ॥ दुमपुप्फिया पढममज्झयणं समत्तं ॥

॥ अह सामण्णपुठवयं दुइअं अज्झयणं ॥

कइं नु कुज्जा सामण्णं, जो कामे न निवारए । पए पए विसीअंतो, संकप्पस्स वसं गओ ॥ १ ॥
वत्थगंधमलंकारं, इत्थीओ सयणाणि य । अच्छंदा जे न भुंजंति, न से चाइ त्ति वुच्चइ ॥ २ ॥
जे य कंते पिए भोए, लद्धे वि पिट्ठि कुव्वइ । साहीणे चयइ भोए, से इ चाइ त्ति वुच्चइ ॥ ३ ॥
समाइ पेहाइ परिद्वयंतो, सियां मणो निस्सरई बहिद्धा ।

न सा महं नोवि अहं वि तीसे, इच्चेव ताओ विणइज्ज रागं ॥

॥ ४ ॥

आयावयाही चय सोगमल्लं, कामे कमाहि कमियं खु दुक्खं ।

छिंदाहिं दोसं विणएज्ज रागं, एवं सुही होहिसि संपराए ॥

॥ ५ ॥

पक्खंदे जलियं जोइं, धूमकेउं दुरासयं । नेच्छंति वंतयं भोत्तुं, कुले जाया अंधगणे ॥ ६ ॥

धिरत्थु तेऽजसोकामी, जो तं जीवियकारणा । वंतं इच्छसि आवेउं, सेयं ते मरणं भवे ॥ ७ ॥

अहं च भोगरायस्स तं चऽसि अंधगविण्हणो । मा कुले गंधणा होमो, संजमं निहुओ चर ॥ ८ ॥

जइ तं काहिसि भावं, जा जा दिच्छसि नारिओ । वायाविट्ठो व हडो, अट्ठिअप्पा भविस्ससि ॥ ९ ॥

तीसे सो वयणं सोच्चा, संजयाइ सुभासियं । अंकुसेण जहा नागो, धम्मे संपडिवाइओ ॥ १० ॥

एवं करंति संबुद्धा, पंडिया पवियक्खणा । विणियट्ठंति भोगेसु, जहा से परिसुत्तमो ॥ ११ ॥

त्ति बेमि ॥ इअ सामण्णपुठवयं नाम अज्झयणं समत्तं ॥ २ ॥

॥ अह खुडुयायारकहा तइमं अज्झयणं ॥

संजमे सुट्टिअप्पाणं, विप्पमुक्काण ताइणं । तेसिमेयमणाइणं, निग्गंथाण महेसिणं ॥ १ ॥
 उद्देसियं कीयगडं, नियागमभिहडाणि य । राइभत्ते सिणाणे य, गंधमल्ले य वीयणे ॥ २ ॥
 संनिही गिहिमत्ते य, रायपिंडे किमिच्छए । संवाहणा दंतपहोयणा य, संपुच्छणा देहपलोयणा य ॥ ३ ॥
 अट्टावए य नालीए, छत्तस्स य धारणट्टाए । तेगिच्छं पाइणापाए, समारंभं च जोइणो ॥ ४ ॥
 सिज्जायरपिंडं च, आसंदीपलियंकए । गिहंतरनिसिज्जा य, गायस्सुवट्टणाणि य ॥ ५ ॥
 गिहिणो वेआवडियं, जा य आजीववत्तिया । तत्तानिब्वुडभोइत्तं, आउरस्सरणाणि य ॥ ६ ॥
 मूलए सिंगवेरे य, उच्छुखंडे अनिब्वुडे । कंदे मूले य सच्चित्ते, फले बीए य आमए ॥ ७ ॥
 सोवच्चले सिंघवे लोणे, रोमालोणे य आमए । समुद्दे पंमुखारे य, कालालोणे य आमए ॥ ८ ॥
 ध्रुवणे त्ति वमणे य, वत्थीरुम्मविरेयणे । अंजणे दंतवणे य, गायब्भंगविभूसणे ॥ ९ ॥
 सव्वमेयमणाइन्नं; निग्गंथाण महेसिणं । संजमम्मि अ जुत्ताणं, लहुभूयविहारिणं ॥ १० ॥
 पंचासवपरिणया, तिगुत्ता छसु संजया । पंचनिग्गहणा धीरा, निग्गंथा उज्जुदंसिणो ॥ ११ ॥
 आयावयंति गिम्हेसु, हेमंतेसु अवाउडा । वासासु पडिसंलीणा, सज्जया सुसमाहिया ॥ १२ ॥
 परीसहरिऊदंता, धूअमोहा जिइंदिया । सव्वदुक्खपहीणट्टा, पक्कमन्ति महेसिणो ॥ १३ ॥
 दुकराइं करित्ताणं, दुस्सहाइं सहितु य । केइत्थ देवलोएसु, केइ सिज्जन्ति नीरया ॥ १४ ॥
 खवित्ता पुव्वकम्माइं, सज्जमेण तवेण य । सिद्धिमग्गमणुप्पत्ता, ताइणो परिणिब्वुडे ॥ १५ ॥

त्ति वेमि ॥ इअ खुडुयायारकहा नाम तइयमज्जयणं ॥

॥ अह छज्जीवणियानामं चउत्थं अज्झयणं ॥

सुअं मे आउसंतेणं भगवया एवमकखायं, इह खलु छज्जीवणिया नामज्झयणं समणेणं भग-
 वया महावीरेणं कासवेणं पवेइया सुअकखाया सुपन्नत्ता सेअं मे अहिज्जिउं अज्झयणं धम्मपण्णत्ती
 ॥ १ ॥ कयरा खलु साछज्जीवणिया नामज्झयणं समणेणं भगवया महावीरेणं कासवेणं पवेइया
 सुअकखाया सुपन्नत्ता सेअं मे अहिज्जिउं अज्झयणं धम्मपण्णत्ती ॥ २ ॥ इमा खलु सा छज्जीवणिया
 नामज्झयणं समणेणं भगवया महावीरेणं कासवेणं पवेइया सुअकखाया सुपन्नत्ता सेअं मे अहिज्जिउं
 अज्झयणं धम्मपण्णत्ती ॥ तंजहा—पुढविकाइया १, आउकाइया २, तेउकाइया ३, वाउकाइया ४,
 वणस्सइकाइया ५, तसकाइया ६ । पुढवी चित्तमंतमकखाया अणेगजीवा पुढोसत्ता अन्नत्थ सत्थप-
 रिणएणं । आऊ चित्तमंतमकखाया अणेगजीवा पुढोसत्ता अन्नत्थ सत्थपरिणएणं । वाऊ चित्तमंत-
 मकखाया अणेगजीवा पुढोसत्ता अन्नत्थ सत्थपरिणएणं । वाऊ चित्तमंतमकखाया अणेगजीवा पुढो-
 सत्ता अन्नत्थपरिणएणं । वणस्सई चित्तमंतमकखाया अणेगजीवा पुढोसत्ता अन्नत्थ सत्थपरिणएणं
 तंजहा—अग्गबीया, मूलबीया, पोरबीया, खंधबीया, बीयरुहा, संमुच्छिमा, तणलया, वणस्सइका-
 इया, सबीया चित्तमंतमकखाया अणेगजीवा पुढोसत्ता अन्नत्थ सत्थपरिणएणं । से जे पुण इमे

अणेगे बहवे तसा पाणा; तंजहा-अंडया, पोयया, जराउया, रसया, संसेइमा, संमुच्छिमा उब्भिया उववाइया, जेसिं केसिंचि पाणाणं, अभिक्कंतं, पडिक्कंतं, संकुचियं, पसारियं, रुयं, भंतं, तसियं, पलाइयं आगइगइविन्नाया; जे अ कीडपयझा, जा य कुंथुपिपीलिया, सब्बे बेइंदिया, सब्बे तेइंदिया, सब्बे चउरिंदिया, सब्बे पंचिंदिया, सब्बे तिरिक्खजोणिया, सब्बे नेरइया, सब्बे मणुआ, सब्बे देवा, सब्बे पाणा, परमाहम्मिआ, एसो खलु छट्ठो जीवनिक्काओ तमकाओ त्ति पवुच्चइ । इच्चेसिं छण्हं जीवनिक्कायाणं चेव सयं दंडं समारंभिज्जा, नेवन्नेहिं दंडं समारंभाविज्जा, दंडं समारंभन्ते वि अन्ने न समणुजाणामि, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतंपि अन्नं न समणुजाणामि । तस्स भंते पडिक्कमामि निन्दामि गरिहामि अप्पाणं वोसरामि ॥

पढमे भन्ते ! महव्वए पाणाइवायाओ वेरमणं । सब्बं भन्ते ! पाणाइवायं पच्चक्खामि । से सुहुसं वा, बायरं वा, तसं वा, थावरं वा, नेव सयं पाणे अइवाइज्जा, नेवन्नेहिं पाणे अइवायाविज्जा, पाणे अइवायन्तेऽवि अन्ने न समणुजाणामि, जावज्जीवाए तिविहं तिविहेणं मणेणं वायाए काएणं न करेमि न कारवेमि करंतंपि अन्नं न समणुजाणामि, तस्स भंते ! पडिक्कमामि निन्दामि गरिहामि अप्पाणं वोसरामि । पढमे भन्ते ! महव्वए उवट्ठिओ मि सद्वाओ पाणाइवायाओ वेरमणं ॥ १ ॥

अहावरे दुच्चे भन्ते ! महव्वए मुसावायाओ वेरमणं । सब्बं भन्ते ! मुसावायं पच्चक्खामि । से कोहा वा, लोहा वा, भया वा, हासा वा, नेव सयं मुसं वइज्जा, नेवन्नेहिं मुसं बायाविज्जा, मुसं वसन्ते वि अन्ने न समणुजाणामि जावज्जीवाए, तिविहं तिविहेणं मणेणं वायाए काएणं न करेमि न कारवेमि करंतंपि अन्नं न समणुजाणामि तस्स भन्ते ! पडिक्कमामि निन्दामि गरिहामि अप्पाणं वोसरामि । दुच्चे भन्ते ! महव्वए उवट्ठिओ मि सद्वाओ मुसावायाओ वेरमणं ॥ २ ॥

अहावरे तच्चे भन्ते ! महव्वए अदिन्नादाणाओ वेरमणं । सब्बं भन्ते ! अदिन्नादाणं पच्चक्खामि । से गामे वा, नगरे वा, रण्णे वा, अप्पं वा, बहु वा, अणुं वा, थूलं वा, चित्तमंतं वा, अचित्तमंतं वा, नेव सयं अदिन्नं गिण्हिज्जा, नेवन्नेहिं अदिन्नं गिण्हाविज्जा, अदिन्नं गिण्हन्ते वि अन्ने न समणुजाणामि जावज्जीवाए तिविहं तिविहेणं मणेणं वायाए काएणं न करेमि न कारवेमि करंतंपि अन्नं न समणुजाणामि । तस्स भन्ते ! पडिक्कमामि निन्दामि गरिहामि अप्पाणं वोसरामि । तच्चे भन्ते ! महव्वए उवट्ठिओ मि सद्वाओ अदिन्नादाणाओ वेरमणं ॥ ३ ॥

अहावरे चउत्थे भन्ते ! महव्वए मेहुणाओ वेरमणं । सब्बं भन्ते ! पच्चक्खामि । से दिव्वं वा, माणुसं वा, तिरिक्खजोणियं वा, नेव सयं मेहुणं सेविज्जा, नेवन्नेहिं मेहुणं सेवाविज्जा, मेहुणं सेवन्ते वि अन्ने न समणुजाणामि जावज्जीवरए तिविहं तिविहेणं मणेणं वायाए काएणं न करेमि न कारवेमि करंतंपि अन्नं न समणुजाणामि । तस्स भन्ते ! पडिक्कमामि निन्दामि गरिहामि अप्पाणं वोसरामि । चउत्थे भन्ते ! महव्वए उवट्ठिओ मि सद्वाओ मेहुणाओ वेरमणं ॥ ४ ॥

अहावरे पञ्चमे भन्ते ! महव्वए परिग्गहाओ वेरमणं । सब्बं भन्ते ! परिग्गहं पच्चक्खामि । से अप्पं वा, बहुं वा, अणुं वा, थूलं वा, चित्तमंतं वा, अचित्तमंतं वा । नेव सयं परिग्गहं परिग्गिण्हिज्जा,

नेवन्नेहिं परिग्गहं परिगिण्हन्ते वि अन्ने न समणुज्जाणिज्जा जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं समणुजाणामि, तस्स भन्ते ! पडिक्कमामि निन्दामि गरिहामि अप्पाणं वोसरामि । पञ्चमे भन्ते ! महन्वए उवड्ढिओ मि सव्वाओ परिग्गहाओ वेरमणं ॥ ५ ॥

अहावरे छट्ठे भन्ते ! वए राइभोअणाओ वेरमणं । सव्वं भन्ते ! राइभोयणं पच्चक्खामि । से असणं वा, पाणं वा, खाइमं वा, साइमं वा । नेव सयं राइं भुंजिज्जा, नेव राइं भुंजिज्जा, नेवन्नेहिं राइं भुंजाविज्जा, तइं भुंजतेऽवि अन्ने न समणुजाणामि जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणावि । तस्स भन्ते ! पडिक्कमामि निन्दामि गरिहामि अप्पाणं वोसरामि । छट्ठे भन्ते ! वए उवड्ढिओ मि सव्वाओ राइभोअणाओ वेरमणं ॥ ६ ॥ इच्चेयाइं पंचमहव्वयाइं राइभोअणवेरमणछट्ठाइं अत्तिहियड्डियाए उवसंपज्जित्ता णं विहरामि ॥

से भिक्खू वा, भिक्खुणी वा, संजयविरयपडिहयपच्चक्खायपावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से पुढविं वा, भित्तिं वा, सिलं वा, लेलुं वा, ससरक्खं वा कायं, ससरक्खं वा वत्थं, हत्थेण वा, पाएण वा, कट्ठेण किलिंवेण वा, अंगुलियाए वा, सिलागाए वा, सिलागहत्थेण वा न आलिहिज्जा, न विलिहिज्जा, न घट्टिज्जा, न भिदिज्जा, अन्नं न आलिहाविज्जा, न विलिहाविज्जा, न घटाविज्जा, न भिंदाविज्जा, अन्नं आलिहंतं वा, विलिहंतं वा, घट्टंतं वा, भिंदंतं वा न समणुजाणिज्जा जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि तस्स । भन्ते ! पडिक्कमामि निन्दामि गरिहामि अप्पाणं होसरामि ॥ १ ॥

से भिक्खू वा, भिक्खुणी वा संजयविरयपडिहयपच्चक्खायपावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से उदगं वा, ओसं वा, हिमं वा, महियं वा, करगं वा, हरिगणुगं वा, सुद्धोदगं वा, उदउल्लं वा वत्थं, ससिणिद्धं वा कायं, ससिणिद्धं वा वत्थं न आमुसिज्जा, न संफुसिज्जा, न आवीलिज्जा, न पवीलिज्जा, न अक्खोडिज्जा, न पक्खोडिज्जा, न आयाविज्जा, न पयाविज्जा, अन्ने न आमुसाविज्जा, न संफुसाविज्जा, न आवीलाविज्जा, न पवीलाविज्जा, न अक्खोविज्जा, न पक्खोडाविज्जा, न आयाविज्जा, न पयाविज्जा, अन्नं आमुसंतं वा, संफुसंतं वा, आवीलंतं वा, पवीलंतं वा, अक्खोडंतं वा, पक्खोडंतं वा, आयावन्तं वा, पयावन्तं वा न समणुजाणिज्जा, जावज्जीवाए, तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भन्ते ! पडिक्कमामि निन्दामि गरिहामि अप्पाणं वोसरामि ॥ २ ॥

से भिक्खू वा, भिक्खुणी वा, संजयविरयपडिहयपच्चक्खायपावकम्मे, दिआ वा, राओ वा, एगओ वा, पस्सागओ वा, सुत्ते वा, जागरमाणे वा, से अगणिं वा, इंगालं वा, मुम्मुरं वा, अच्चिं वा, जालं वा, अलायं वा, सुद्धागणिं वा, उक्कं वा, न उजिज्जा, न घट्टिज्जा, न भिदिज्जा, न उज्जालिज्जा, न पज्जालिज्जा, न निवाविज्जा, अन्नं न उज्जाविज्जा, न घटाविज्जा, न भिंदाविज्जा, न

उज्जालाविज्जा, न पज्जालाविज्जा, न निव्वाविज्जा, अन्नं उज्जन्तं वा, घट्टंतं वा, भिदंतं वा, उज्जालंतं वा, पज्जालंतं वा, निव्वावंतं वा, न समणुजाणिज्जा जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भन्ते ! पडिक्कमामि निन्दामि गरिहामि अप्पाणं वोसरामि ॥ ३ ॥

से भिक्खू वा, भिक्खुणी वा, संजयविरयपडिहयपच्चक्खायपावकम्म, दिआ वा, राओ वा, एगओ वा, परिसागओ वा, सुत्ते वा, जागरमाणे वा, ने सिएण वा, विहुयणेण वा, तालियंटेण वा, पत्तेण वा, पत्तभंणेण वा, साहाए वा, साहाभंणेण वा, पिहुणेण वा, पिहुणलत्थेण वा, चेलेण वा, चेलकन्नेण वा, हत्थेण वा, मुहेण वा, अप्पणो वा कायं, बाहिरं वा वि पुग्गलं न फुमिज्जा, न वीएज्जा, अन्नं न फूमाविज्जा, न वीआविज्जा, अन्नं फूमंतं वा, वीअंतं वा न समणुजाणिज्जा जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भन्ते ! पडिक्कमामि निन्दामि गरिहामि अप्पाणं वोसरामि ॥ ४ ॥

से भिक्खू वा, भिक्खुणी वा, संजयविरयपडिहयपच्चक्खायपावकम्म, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से वीएसु वा, वीयपइट्ठेसु वा, रुढेसु वा, रुढपइट्ठेसु वा, जाएसु वा, जायपइट्ठेसु वा, हरिएसु, हरियपइट्ठेसु वा, छिन्नेसु वा, छिन्नेसु वा, छिन्नपइट्ठेसु वा, सच्चित्तेसु वा, सच्चित्तकोलपडिनिस्सिएसु वा न गच्छेज्जा, न चिट्ठेज्जा, न निसी-इज्जा, न तुअट्ठिज्जा, अन्नं न गच्छाविज्जा, न चिट्ठाविज्जा, न निसीआविज्जा, न तुअट्ठाविज्जा, अन्नं गच्छंतं वा, चिट्ठंतं वा, निसीअंतं वा, तुयट्ठंतं वा न समणुजामि जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भन्ते ! पडिक्कमामि निन्दामि गरिहामि अप्पाणं वोसरामि ॥ ५ ॥

से भिक्खू वा, भिक्खुणी वा, संजयविरयपडिहयपच्चक्खायपावकम्म, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से कीडं वा, पर्यंगं वा, कुंथुं वा, पिपीलियं वा, हत्थंसि वा, पायंसि वा, बाहुंसि वा, उरुंसि वा, उदरंसि वा, सीसंसि वा, वत्थंसि वा, पडि-ग्गहंसि वा, कंबलंसि वा, पायपुच्छणंसि वा, रयहरणंसि वा, गुच्छगंसि वा, उंडगंसि वा, दंडगंसि वा, पीढगंसि वा, फलगंसि वा, संथारगंसि वा, अन्नयरंसि वा तहप्पगारे उवगरणजाए तओ संजया-मेव पडिलेहिय पडिलेहिय पमज्जिअ एगंतमवणिज्जा, नो णं संघायमावज्जिज्जा ॥ ६ ॥

अजयं चरमाणो अ, पाणभूयाइ हिंसइ । बन्धइ पावयं कम्मं, तं से होइ कडुअं फलं ॥ १ ॥
अजयं चिट्ठमाणो अ, पाणभूयाइ हिंसइ । बंधइ पावयं कम्मं, तं से होइ कडुअं फलं ॥ २ ॥
अजयं आसमाणो अ, पाणभूयाइ हिंसइ । बन्धइ पावयं कम्मं, तं से होइ कडुअं फलं ॥ ३ ॥
अजयं सयमाणो अ, पाणभूयाइ हिंसइ । बंधइ पावयं कम्मं, तं से होइ कडुअं फलं ॥ ४ ॥
अजयं भुंजमाणो अ, पाणभूयाइ हिंसइ । बंधइ पावयं कम्मं, तं से होइ कडुअं फलं ॥ ५ ॥
अजयं भासमाणो अ, पाणभूयाइ हिंसइ । बंधइ पावयं कम्मं, तं से होइ कडुअं फलं ॥ ६ ॥

कहं चरे कहं चिट्ठे, कहमाए कहं सए । कहं भुंजन्तो भासंतो, पावकम्मं न बंधइ ॥ ७ ॥
 जयं चरे जयं चिट्ठे, जयमासे जयं सए । जयं भुंजन्तो भासंतो, पावकम्मं न बंधइ ॥ ८ ॥
 सबभूयप्पभूयस्स, सम्मं भूयाइ पासओ । पिहिआसवस्स दंतस्स, पावकम्मं न बंधइ ॥ ९ ॥
 पढमं नाणं तओ दया, एवं चिट्ठइ सबसंजए । अन्नाणी किं काही, किं वा नाही सेयपावगं ॥ १० ॥
 सोच्चा जाणइ कल्लाणं, सोच्चा जाणइ पावगं । उभयं पि जाणइ सोच्चा, जं सेयं तं समायरे ॥ ११ ॥
 जो जीवे वि न याणइ, अजीवे वि न याणइ । जीवाजीवे अयाणंतो, कहं सो नाहीइ संजमं ॥ १२ ॥
 जो जीवे वियाणइ, अजीवे वि वियाणइ । जीवाजीवे वियाणंतो, सो हु नाहीइ संजमं ॥ १३ ॥
 जय जीवमजीवे य, दोवि एए वियाणइ । तया गइ बहुविहं, सबं जीवाण जाणइ ॥ १४ ॥
 जया मइ बहुविहं, सबजीवाण जाणइ । तया पुण्णं च पावं च, बंधं मुक्खं च जाणइ ॥ १५ ॥
 जया पुण्णं च पावं च, बंधं मुक्खं च जाणइ । तया निर्व्विदए भोए, जे दिव्वे जे य माणुसे ॥ १६ ॥
 जया निर्व्विदए भोए, जे दिव्वे जे य माणुसे । तया चयइ संजोगं, सब्भित्तरं बाहिरं ॥ १७ ॥
 जया चयइ संजोगं, सब्भित्तरं बाहिरं । तया मुंडे भवित्ताणं, पवइए अणगारियं ॥ १८ ॥
 जया मुंडे भवित्ताणं, पवइए अणगारियं । तया संवरमुकिट्ठं, धम्मं फासे अणुत्तरं ॥ १९ ॥
 जया संवरमुकिट्ठं, धम्मं फासे अणुत्तरं । तया धुणइ कम्मरयं, अबोहिकलुसं कडं ॥ २० ॥
 जया धुणइ कम्मरयं, अबोहिकलुसं कडं । तया सव्वत्तगं नाणं, दंसणं चाभिगच्छइ ॥ २१ ॥
 जया सव्वत्तगं नाणं, दंसणं चाभिगच्छइ । तया लोगमलोगं च, जिणो जाणइ केवली ॥ २२ ॥
 जया लोगमलोगं च, जिणो जाणइ केवली । तया जोगे निरुंभित्ता, सेलेसिं पडिवज्जइ ॥ २३ ॥
 जया जोगे निरुंभित्ता, सेलेसिं पडिवज्जइ । तया कम्मं खवित्ताणं, सिद्धिं गच्छइ नीरओ ॥ २४ ॥
 जया कम्मं खवित्ताणं, सिद्धिं गच्छइ नीरओ । तया लोगमत्थत्थो, सिद्धो हवइ सासओ ॥ २५ ॥

सुह सायगस्स समणस्स, सायाउलणस्स निगामसाइस्स ।

उच्छोलणपहोअस्स, दुल्लहा सुमई तारिसगस्स ॥ २६ ॥

तवोगुणपहाणस्स, उज्जुमइ खन्तिसंजमरयस्स ।

परीसहे जिणंतस्स, सुल्लहा सुमई तारिसगस्स ॥ २७ ॥

पच्छा वि ते पयाया, खिप्पं गच्छंति अमरधवणाइं ।

जेसिं पिओ तवो संजमो अ, खंसीअ वभचरं च ॥ २८ ॥

इषेर्यं उज्जीवणिअं, सम्मदिट्ठी सया जइ ।

दुल्लहं लहितु सामण्णं, कम्मणा न विराहिआसि ॥ २९ ॥

त्ति वेमि ॥ इअ छज्जीवणिआ नाअं चउत्थं अज्झयणं समत्तं ॥ ३० ॥

॥ अह पिंडेसणा णाम पंचमज्झयणं ॥

संपत्ते भिक्खुकालम्मि, असंभंतो अमुच्छिओ । इमेण कमजोगेण, भत्तपाणं गवेसए ॥ १ ॥
 से गामे वा नगरे वा, गोअरग्गओ मुणी । चरे मंदमणुव्विग्गो, अव्विक्खत्तेण चेअसा ॥ २ ॥
 पुरओ जुगमायाए, पेहमाणो महिं चरे । वज्जंतो बीअहरियाहं, पाणे अदगमट्ठिअं ॥ ३ ॥
 ओवायं विसमं खाणुं, विज्जलं परिवज्जए । संकमेण न गच्छिज्जा, विज्जमाणे परक्कमे ॥ ४ ॥
 पवडंते व से तत्थ, पक्खलंते व संजए । हिंसेज्ज पाणभूयाहं, तसे अदुव थावरे ॥ ५ ॥
 तम्हा तेण न गच्छिज्जा, संजए सुसमाहिए । सइ अण्णेण मग्गेण, जयमेव परक्कमे ॥ ६ ॥
 इंगाले छारियं रासिं, तुसरसिं च गोमयं । ससरक्खेहिं पाएहिं, संजओ तं नइक्कमे ॥ ७ ॥
 न चरेज्ज वासे वासंते, महियाए पडंतिए । महावाए व वायंते, तिरीच्छसंपाइसेसु वा ॥ ८ ॥
 न चरेज्ज वेससामंते, बंभचेरवसाणुए । बंभयारिस्स दंतस्स, होज्जा तत्थ विसोहिआ ॥ ९ ॥
 अणाययणे चरंतस्स, संसग्गीए अभिक्खए । होज्ज वयाणं पीला, सामणम्मि अ संसओ ॥ १० ॥
 तम्हा एअं विआणित्ता, दोसं दुग्गइवड्डुणं । वज्जए वेससामन्तं, मुणी एगंतमस्सिए ॥ ११ ॥
 साणं सइअं गाविं, दित्तं गोणं हयं गयं । संडिब्भं कतेहं जुद्धं, दूरओ परिवज्जए ॥ १२ ॥
 अणुन्नए नावणए, अप्पहिट्ठे अणाउले । इंदिआहं जहाभागं, दमइत्ता मुणी चरे ॥ १३ ॥
 दवदवस्स न गच्छेज्जा, भासमाणो अगोचरे । हसन्तो नाभिगच्छेज्जा, कुलं उच्चावयं सया ॥ १४ ॥
 आलोअं थिग्गलंदारं, संधिं दगभवणाणि अ । चरन्तो न विणिज्झाए, संकट्टाणं विवज्जए ॥ १५ ॥
 रन्नो गिहवईणं च, रहस्सारविक्खयाण य । संकिलेसकरं ठाणं, दूरओ परिवज्जए ॥ १६ ॥
 पडिकुट्टं कुलं न पविसे, मामगं परिवज्जए । अचियत्तं कुलं न पविसे, चियत्तं पविसे कुलं ॥ १७ ॥
 साणीपावारपिहिअं, अप्पणा नावपंगुरे । क्वाडं नो पणुल्लिज्जा, उग्गहंसि अणाइआ ॥ १८ ॥
 गोअरग्गपविट्ठो अ, वच्चमुत्तं न धारए । ओगासं फासुअं नच्चा, अणुन्नविय वोसिरे ॥ १९ ॥
 णीयं दुवारं तमसं, कुट्टगं परिवज्जए । अचक्खुविसओ जत्थ, पाणा दुप्पडिलेहगा ॥ २० ॥
 जत्थ पुप्फाहं बीआहं, विप्पइन्नाहं वोट्टए । अहुणोवलित्तं उल्लं, दट्ठुणं परिवज्जए ॥ २१ ॥
 एलगं दारगं साणं, वच्छगं वा वि कुट्टए । उल्लंघिआ न पविसे, विउहित्ताण व संजए ॥ २२ ॥
 असंसत्तं पलोइज्जा, नाइदूरावलोअए । उप्फुल्लं न विणिज्झाए, नियट्ठिज्ज अयंपिरो ॥ २३ ॥
 अइभूमिं न गच्छेज्जा, गोअरग्गओ मुणी । कुलस्स भूमिं जाणित्ता, मिअं भूमिं परक्कमे ॥ २४ ॥
 तत्थेव पडिलेहिज्जा, भूमिभागविक्खणो । सिणाणस्स य वच्चस्स, संलोगं परिवज्जए ॥ २५ ॥
 दगमट्ठिआयाणे, बीआणि हरिआणि अ । परिवज्जंतो चिट्ठिज्जा, सव्विंदिअसमाहिए ॥ २६ ॥
 तत्थ से चिट्ठमाणस्स, आहारे पाणभोअणं । अकप्पिअं न इच्छिज्जा, पडिगाहिज्ज कप्पिअं ॥ २७ ॥
 आहारन्ती सिआ तत्थ, परिसाडिज्ज भोअणं । दित्तिअं पडिआइक्खे, न मे कप्पइ तारिसं ॥ २८ ॥
 संमइमाणी पाणाणि, बीआणि हरिआणि अ । असंजमकरिं नच्चा, तारिसिं परिवज्जए ॥ २९ ॥
 साहट्ठ निक्खवित्ता णं, सचित्तं वट्ठियाणि य । तहेव समणुट्ठाए, उदगं संपणुल्लिया ॥ ३० ॥

ओगाहइत्ता चलइत्ता, आहारे पाणभोअणं । दित्तिअं पडियाइक्खे, न मे कप्पइ तारिसं ॥ ३१ ॥
 पुरेकम्मेण हत्थेण, दव्वीए भायणेण वा । दित्तिअं पडिआइक्खे, न मे कप्पइ तारिसं ॥ ३२ ॥
 एवं उदउल्ले ससिणिद्धे, ससरक्खे मट्ठिआओसे । हरिआले हिंगुलए, मणोसिला अंजणे लोणे ॥ ३३ ॥
 गेरुअवन्निअसेठिअ, सोरट्ठिअपिट्ठुकुकुसकए अ । उकिट्ठमसंसट्ठे, संसट्ठे चेव बोद्धव्वे ॥ ३४ ॥
 असंसट्ठेण हत्थेण, दव्वीए भायणेण वा । दिज्जमाणं न इच्छिज्जा, पच्छाकम्मं जहिं भवे ॥ ३५ ॥
 संसट्ठेण य हत्थेण, दव्वीए भायणेण वा । दिज्जमाणं पडिच्छिज्जा, जं तत्थेसणियं भवे ॥ ३६ ॥
 दुण्हं तु भुंजमाणं, एगो तत्थ निमंतए । दिज्जमाणं न इच्छिज्जा, छंदं से पडिलेहए ॥ ३७ ॥
 दुण्हं भुंजमाणं, दो वि तत्थ निमंतए । दिज्जमाणं पडिच्छिज्जा, जं तत्थेसणियं भवे ॥ ३८ ॥
 गुच्चिणीए उवण्णत्थं, विविहं पाणभोअणं । भुंजमाणं विवज्जिज्जा, भुत्तसेसं पडिच्छए ॥ ३९ ॥
 सिआ य समणट्ठाए, गुच्चिणी कालमासिणी । उट्ठिआ वा निसीइज्जा, निसन्ना वा पुणुट्ठए ॥ ४० ॥
 तं भवे भत्तपाणं तु, संजयाण अकप्पिअं । दित्तिअं पडिआइक्खे, न मे कप्पइ तारिसं ॥ ४१ ॥
 थणगं पिज्जमाणी, दारगं वा कुमारिअं । तं निक्खिवित्तु रोअंतं, आहारे पाणभोअणं ॥ ४२ ॥
 तं भवे भत्तपाणं तु, संजयाण अकप्पियं । दित्तिअं पडिआइक्खे, न मे कप्पइ तारिसं ॥ ४३ ॥
 जं भवे भत्तपाणं तु, कप्पकप्पम्मि संकिर्यं । दित्तिअं पडिआइक्खे, न मे कप्पइ तारिसं ॥ ४४ ॥
 दग्वारेण पिहिअं, नीसाए पीढएण वा । लोढेण वा विलेवेण, सिलेसेण वा केणइ ॥ ४५ ॥
 तं च उर्विभदिआ दिज्जा, समणट्ठा एव दावए । दित्तिअं पडिआइक्खे, न मे कप्पइ तारिसं ॥ ४६ ॥
 असणं पाणगं वावि, खाइमं साइमं तहा । जं जाणिज्जा सुणिज्ज वा, दाणट्ठा पगडं इमं ॥ ४७ ॥
 तं भवे भत्तपाणं तु, संजयाण अकप्पिअं । दित्तिअं पडिआइक्खे, न मे कप्पइ तारिसं ॥ ४८ ॥
 असणं पाणगं वावि, खाइमं साइमं तहा । जं जाणिज्जा सुणिज्जा वा, पुण्णट्ठा पगडं इमं ॥ ४९ ॥
 तं भवे भत्तपाणं तु, संजयाण अकप्पिअं । दित्तिअं पडिआइक्खे, न मे कप्पइ तारिसं ॥ ५० ॥
 असणं पाणगं वावि, खाइमं साइमं तहा । जं जाणिज्जा सुणिज्जा वा, वणिमट्ठा पगडं इमं ॥ ५१ ॥
 तं भवे भत्तपाणं तु, संजयाण अकप्पिअं । दित्तिअं पडिआइक्खे, न मे कप्पइ तारिसं ॥ ५२ ॥
 असणं पाणगं वावि, खाइमं साइमं तहा । जं जाणिज्ज सुणिज्जा वा, समणट्ठा पगडं इमं ॥ ५३ ॥
 तं भवे भत्तपाणं तु, संजयाण अकप्पिअं । दित्तिअं पडिआइक्खे, न मे कप्पइ तारिसं ॥ ५४ ॥
 उद्देसियं कीयगडं, पूइकम्मं च आहडं । अज्झोअरपामिच्चं, मीसजायं विवज्जए ॥ ५५ ॥
 उग्गमं से अ पुच्छिज्जा, कस्सट्ठा केण वा कडं । सुच्चा निस्संकिर्यं सुद्धं, पडिगाहिज्ज संजए ॥ ५६ ॥
 असणं पाणगं वावि, खाइमं साइमं तहा । पुप्फेसु हुज्ज उम्मीसं, बीएसु हरिएसु वा ॥ ५७ ॥
 तं भवे भत्तपाणं तु, संजयाण अकप्पिअं । दित्तिअं पडिआइक्खे, न मे कप्पइ तारिसं ॥ ५८ ॥
 असणं पाणगं वावि, खाइमं साइमं तहा । उदगम्मि हुज्ज निक्खित्तं, उत्तिगपण्णेषु वा ॥ ५९ ॥
 तं भवे भत्तपाणं तु, संजयाण अकप्पिअं । दित्तिअं पडिआइक्खे, न मे कप्पइ तारिसं ॥ ६० ॥

असणं पाणगं वावि, खाइमं साइमं तहा ।

उम्मि (अगणिग्मि) होज्ज निक्खित्तं, तं च संघट्ठिआ दए ॥

॥ ६१ ॥

तं भवे भत्तपाणं तु, संजयाण अकप्पिअं । दित्तिअं पडिआउक्खे, न मे कप्पइ तारिसं ॥ ६२ ॥

एवं उस्सिकिया ओसकिया, उज्जालिआ पज्जालिआ निव्वाविया ।

उस्सिचिया निस्सिचिया, उव्वत्तिया (उव्वत्तिया)ओवारिया दए ॥ ६३ ॥

तं भवे भत्तपाणं तु, संजयाण अकप्पिअं । दित्तिअं पडिआइक्खे, न मे कप्पइ तारिसं ॥ ६४ ॥

हुज्ज कट्ठं सिलं वावि, इट्ठालं वावि एगया । ठविअं संकमट्ठाए, तं च हुज्ज चलाचलं ॥ ६५ ॥

न तेण भिक्खू गच्छिज्जा, दिट्ठो तत्थ असंजमो । गंभीरं मुसिरं चेव, सत्त्विदिअ समाहियं ॥ ६६ ॥

निस्सेणिं फलगं पीढं, उस्सवित्ता ण मारुहे । मंचं कीलं च पासायं, समणट्ठा एव दावए ॥ ६७ ॥

दुरूहमाणी पवाडिज्जा, (पडिवज्जा) हत्थं पायं व लूमए ।

पुढवीजीवे वि हिंसैज्जा, जे अ तन्निस्सिआ जगे ॥ ६८ ॥

एआरिसे महादोसे, जाणिऊण महेसिणो । तम्हा मालोहडं भिक्खं, न पडिगिण्हंसं संजया ॥ ६९ ॥

कंदं मूलं पलंबं वा, आमं छिन्नं च सन्निरं । तुंवागं सिंगवेरं च, आमगं परिवज्जए ॥ ७० ॥

तहेव सत्तुचुन्नाइं, कोलतुन्नाइं आवणे । सक्कुलिं फालिअं पूअं, अन्नं वा वि तहाविहं ॥ ७१ ॥

विकायमाणं पसढं, रएण परिफासिअं । दित्तिअं पडिआइक्खे, न मे कप्पइ तारिसं ॥ ७२ ॥

बहुअट्ठिअं पुण्गलं, अणिमिसं वा बहुकंटयं । अत्थियं तिंदुयं विहं, उच्छुखंडं व सिंवालिं ॥ ७३ ॥

अप्पे सिआ भोअणजाए, बहुउज्झय धम्मिअ (य) ।

दित्तिअं पडिआइक्खे, न मे कप्पइ तारिसं ॥ ७४ ॥

तहेवुच्चावयं पाणं, अदुवा वारधोअणं । संसेइमं चाउलोदगं, अहुणाधोअं विवज्जए ॥ ७५ ॥

जाजाणेज्जा चिरावाआ, मइए दंसणण वा, पडिपुच्छिऊण सुच्चा वा, जं च निस्संक्रियं भवे ॥ ७६ ॥

अजीवं पडिणयं नच्चा, पडिगाहिज्जा संजए । अहं संक्रियं भविज्जा, आसाइत्ताण रोअए ॥ ७७ ॥

थोवमासायणट्ठाए, हत्थगम्मि दलाहि मे । मामे अच्चं बिलं पूअं, नाणं तिण्हं विणित्तए ॥ ७८ ॥

तं च अच्चं बिलं पूअं, नाणं तिण्हं विणित्तए । दित्तिअं पडिआइक्खे, न मे कप्पइ तारिसं ॥ ७९ ॥

तं च हुज्जा अकामेण, विमणेण पडिच्छिअं । तं अप्पणा न पिदे । नो वि अन्नस्स दावए ॥ ८० ॥

एगंतमवक्कमित्ता, अचित्तं पडिलेहिआ । जयं पडिट्ठविज्जा, परिट्ठप्प पडिकमे ॥ ८१ ॥

सिया अ गोअरगओ इच्छिज्जा परिभुत्तुअं । कुट्ठगं मित्तिमूलं वा, पडिलेहिताण फासुअं ॥ ८२ ॥

अणुन्नवित्तु मेहावी, पडिच्छिन्नम्मि संवुडे । हत्थगं संपमज्जित्ता, तत्थ भुंजिज्जा संजए ॥ ८३ ॥

तत्थ से भुंजमाणस्स, अट्ठिअं कंटओ सिआ । तणकट्ठसकरं वावि, अन्नं वावि तहाविहं ॥ ८४ ॥

तं उक्खिवित्तु न निक्खिवे, आसएण न छट्ठए । हत्थेण तं गहेऊण, एगंतमवक्कमे ॥ ८५ ॥

एगंतमवक्कमित्ता, अचित्तं पडिलेहिआ । जयं परिट्ठविज्जा, परिट्ठप्प पडिकमे ॥ ८६ ॥

सिआ आभिक्खू इच्छिज्जा, सिज्जमागम्म भुत्तुअं । सपिंडपायमागम्म, उंडुअं पडिलेहिआ ॥ ८७ ॥

विणएण पविसित्ता, सगासे गुरूणो मुणी । इरियावहियमाययाय, आगओ अ पडिकमे ॥ ८८ ॥

आभोइत्ताण नीसेसं, अइआरं च जहकमं । गमणागमणे चेव, भत्ते पाणे च संजए ॥ ८९ ॥

उज्जुप्पन्नो अणुव्विगो, अवक्खित्तेण चेअसा । आलोए गुरूसगासे, जं जहा गहियं भवे ॥ ९० ॥

न सम्ममालोइअं हुज्जा, पुण्वि पच्छा व जं कडं । पुणो पडिकमे तस्स, वोमट्ठो चित्तए इमं ॥ ९१ ॥

अहो जिणेहिं असावज्जा, वित्ती साहूण देसिआ । मुक्खसाहणहेउस्स, साहुदेहस्स धारणा ॥ ९२ ॥
 णमुकारेण पारित्ता, करित्ता जिणसंथवं । सज्जायं पट्टवित्ताणं, वीसमेज्ज खणं मुणी ॥ ९३ ॥
 वीससंतो इमं चिंते. हियमट्ठं लाभमट्ठिओ । मे अणुमहं कुजा, साहू हुजामि तारिओ ॥ ९४ ॥
 साहवो तो चियत्तेणं, निमंतिज्ज जहकमं । जइ तत्थ केइ इज्जिज्जा, तेहिं सद्धिं तु भुंजए ॥ ९५ ॥
 अह कोइ न इच्छिज्जा, तओ भुंजिज्ज एकओ । आलोए भायणे साहू. जयं अपरिसाडिअं ॥ ९६ ॥
 तित्तमं च कडुअं च, कसायं अंबिलं च महुरं लवणं वा ।

एयलद्धमन्नत्थपउत्तं. महु घयं व भुंजिज्ज संजए ॥ ९७ ॥

अरसं विरसं वावि, सइअं वा असइअं । उल्लं वा जइ वा सुकं, मंथुकुम्मासभोअणं ॥ ९८ ॥
 उप्पणं नाइहीलिज्जा, अप्पं वा बहु फासुअं । मुहालद्धं मुहाजीवी, भुंजिज्जा दोसवज्जिअं ॥ ९९ ॥
 दुल्लहाओ मुहादाई, मुहाजीवी, वि दुल्लहा । मुहादाई मुहाजीवी, दो वि गच्छंति सुगगं ॥ १०० ॥

॥ इअ पिंडेसणाए पढमो उद्देसो समत्तो ॥

पडिग्गहं संलिहिताणं, लैवमायाइ संजए । दुगंधं वा, सबं भुंजे न छड्डए ॥ १ ॥
 सेज्जा निसीहियाए, अमावन्नो अगोचरे । अयावयट्ठा भुच्चाणं, जइ तेणं न संथरे ॥ २ ॥
 तओ कारणमुप्पण्णे, भत्तपाणं गवेसए । विहिणा पुव्वउत्तेण, इमेण उत्तरेण य ॥ ३ ॥

कालेण निक्खमे भिक्खू, कालेण य पडिक्खे ।

अकालं च विवज्जित्ता (ज्जा), काले कालं समायरे ॥ ४ ॥

अकाले चरिसि भिक्खू, कालं न पडिलेहिसि ।

अप्पाणं च किलामेसि, सन्निवेशं च गरिहासि ॥ ५ ॥

सइ काले चरे भिक्खू, कुज्जा पुरिसकारिअं । अलाभोत्ति न सोइज्जा, तवो त्ति अहियासए ॥ ६ ॥
 तहेवुच्चावया पाणा, भत्तट्ठाए समागया । तं उज्जुअं न गच्छिज्जा, जयमेव परक्खमे ॥ ७ ॥
 गोअरगपविट्ठो अ, न निसीइज्ज कत्थई । कहं च न पबंधिज्जा, चिट्ठित्ताण व संजए ॥ ८ ॥
 अगगलं फलिहं दारं, कवाडं वा वि संजए । अबलंविआ न चिट्ठिज्जा, गोअरगओ मुणो ॥ ९ ॥
 समणं माहणं वावि, किविणं वा वणीमगं । उवसंकमंतं भत्तट्ठा, पाणट्ठाए व संजए ॥ १० ॥
 तमइक्कमित्तु न पविसे, न चिट्ठे चक्खुगोअरे । एगंतमवक्कमित्ता, तत्थ चिट्ठिज्ज संजए ॥ ११ ॥
 वणीमगस्स वा तस्स, दायगस्सुभयस्स वा । अप्पत्तिअं सिआ हुज्जा, लहुत्तं पवयणस्स वा ॥ १२ ॥
 पडिसेहिए व दिन्ने वा, तओ तम्मि नियत्तिए । उवसंकमिज्ज भत्तट्ठा, पाणट्ठाए व संजए ॥ १३ ॥
 उप्पलं पउमं वावि, कुमुअं वा मगदंतिअं । अन्नं वा पुप्फमच्चित्तं, तं च संलुविआ दए ॥ १४ ॥
 तं भवे भत्तपाणं तु, संजयाण अक्कप्पिअं । दिंतिअं पडिआइक्खे, न मे कप्पइ तारिसं ॥ १५ ॥
 उप्पलं पउमं वावि, कुमुअं वा मगदंतिअं । अन्नं वा पुप्फपच्चित्तं, तं च सम्महिआ दए ॥ १६ ॥
 तं भवे भत्तपाणं तु, संजयाण अक्कप्पिअं । दिंतिअं पडिआइक्खे, न मे कप्पइ तारिसं ॥ १७ ॥
 साल्लुअं वा विरालिअं, कुमुअं उप्पलनालियं । मुणालिअं सासवनालिअं, उच्छुखंडं अनिब्बुडं ॥ १८ ॥
 तरुणगं वा पवालं, रुक्खस्स तणगस्स वा । अन्नस्स वा वि हरिअस्स, आमगं परिवज्जए ॥ १९ ॥

तारुणिअं वा छिवाडिं, आमिअं भञ्जियं सयं । दिंतिअं पडिआइक्खे, न मे कप्पइ तारिसं ॥ २० ॥
 तहा कोलमणुस्सिन्नं, वेळुअं कासवनालिअं । तिलपप्पडगं नीमं, आमगं परिवज्जए ॥ २१ ॥
 तहेव चाउलं पिट्ठं, विअडं तत्तनिव्वुडं । तिलपिट्ठपूइपिन्नागं, आमगं परिवज्जए ॥ २२ ॥
 कविट्ठं माउलिगं च, मूलगं मूलगतिअं, आमं असत्थपरिणयं मणसा वि न पत्थए ॥ २३ ॥
 तहेव फलमंथूणि, बीचमंथूणि जाणिआ । विहेलगं पियालं च, आमगं परिवज्जए ॥ २४ ॥
 समुआणं चरे भिक्खू, कुलमुच्चावयं सया । नीयं कुलमइक्कम्म, ऊसठं नाभिधारए ॥ २५ ॥
 अदीणो वित्तिमेसिज्जा, न विसीएज्ज पंडिए । अमुणम्मि भोअणम्मि, मायण्णे एमणारए ॥ २६ ॥
 बहं परघरे अत्थि, विविहं खाइमसाइमं । न तत्थ पंडिओ कुप्पे, इच्छा दिज्ज परो नवा ॥ २७ ॥
 सयणासणवत्थं वा, भत्तं पाणं च संजए । अदिंत्तस्स न कुप्पिज्जा, पच्चक्खे वि अ दीसओ ॥ २८ ॥
 इत्थिअं पुरिसं वावि, उहरं वा मंहल्लगं । वंदमाणं न जाइज्जा, नो अणं फरुसं वए ॥ २९ ॥
 जे न वंदे न से कुप्पे, वंदिओ न समुक्कसे । एवमन्नेसमाणस्स, सामण्णमणुचिट्ठइ ॥ ३० ॥
 सिआ एगइओ लद्धुं, लोभेण विणिगूहइ । मामेयं दाइयं संतं, दट्ठूण सयमायए ॥ ३१ ॥
 अत्तेट्ठा गुरुओ लुट्ठो, बहु पावं पकुवइ । दुत्तोसओ अ से (सो) होइ, निव्वाणं च न गच्छइ ॥ ३२ ॥
 सिआ एगइओ लद्धुं, विविहं पाणभोअणं । भद्दगं भद्दगं भुच्चा, विवन्नं विरसमाहरे ॥ ३३ ॥
 जाणंतु ता इमे समणा, आययट्ठी अयं सुणी । संतुट्ठो सेवए पंतं, ल्हविच्ची सुतोसओ ॥ ३४ ॥
 पूयणट्ठा जंसोकामी, माणसमाणकामए । बहं पसवई पावं, मायासलं च कुवइ ॥ ३५ ॥
 सुरं वा मेरगं वावि, अन्नं वा मज्जगं रसं । ससक्खं न पिवे भिक्खू, जसं सारक्खमप्पणो ॥ ३६ ॥
 पियए एगओ तेणो, न मे कोई विआणइ । तस्स पस्सह दोसाइं, नियडिं च सुणेह मे ॥ ३७ ॥
 वड्ढई सुंडिआ तस्स, मायामोसं च भिक्खूणो । अयसो अनिवाणं, सययं च असाहुआ ॥ ३८ ॥
 निच्चुव्विग्गो जहा तेणो, अत्तक्कम्मेहिं दुम्मई । तारिसो मरणंते वि, न आराहेइ संवरं ॥ ३९ ॥
 आयरिए नाराहेइ, समणे आवी तारिसो । गिहत्था वि णं गरिहंति, जेण जाणंति तारिसं ॥ ४० ॥
 एवं तु अभुप्पेही, गुणाणं च विवज्जए । तारिसो मरणंते वि, ण आराहेइ संवरं ॥ ४१ ॥
 तवं कुवइ मेहावी, पणीअं वज्जए रसं । मज्जप्पमायविरओ, तवस्सी अइउक्कसो ॥ ४२ ॥
 तस्स पस्सह कल्लाणं, अणेगसाहुपूइअं । विउलं अत्थसंजुत्तं, कित्तइस्से सुणेह मे ॥ ४३ ॥
 एवं तु गुणप्पेही, अगुणाणं च विवज्जए (ओ) । तारिसो मरणंते वि, आराहेइ संवरं ॥ ४४ ॥
 आयरिए आराहेइ, समणे आवि तारिसो । गिहत्था वि णं पूयंति, जेण जाणंति तारिसं ॥ ४५ ॥
 तवतेणे वयतेणे, रुवतेणे, अ जे नरे । आयारभावतेणे अ, कुवइ देवकिव्विसं ॥ ४६ ॥
 लद्धूण वि देवत्तं, उववन्नो देवकिव्विसे । तत्थावि से न याणाइ, किं मे किच्चा इमं फलं ॥ ४७ ॥
 तत्तो वि से चइत्ताणं, लब्भइ एलमूअगं । नरगं तिरिक्खजोणिं वा, बोही जत्थ सुदुल्लहा ॥ ४८ ॥
 एअं च दोसं दट्ठूणं, नायपुत्तेण भासिअं । अणुमायं पि मेहावी, मायामोसं विवज्जए ॥ ४९ ॥
 सिक्खिअण भिक्खेसणसोहिं, संजयाण बुद्धाण सगासे । तत्थ भिक्खू सुप्पणिहिंदिए, तिवलज्जगुणवं
 विहरिज्जासि ॥ ५० ॥ त्ति वेमि ॥ इअ पिंडेसणाए बीओ उद्देसो ॥ पंचमज्झयणं समत्तं ॥

॥ अह छट्ठं धम्मत्थकामज्झयणं ॥

नाणदंसणसंपन्नं, संजमे अ तवे रयं । गणिमागमसंपन्नं, उज्जाणम्मि समोसटं ॥ १ ॥
 रायाओ रायमच्चा य, माहणा अदुव खत्तिआ । पुच्छंति निहुअप्पाणो, कहं मे आयारगोयरो ॥ २ ॥
 तेसिं सो निहुओ दंतो, सबभूअसुहावहो, सिक्खाएसु समाउत्तो, आयक्खइ विअक्खणो ॥ ३ ॥
 हंदि धम्मत्थकामाणं, निग्गंथाणं सुणेह मे । आयारगोअरं भीमं, सयलं दुरहिट्ठिअं ॥ ४ ॥
 नन्नत्थ एरिसं वुत्तं, जं लोए परमदुच्चरं । विउलट्ठाणभाइस्स, न भूअं न भविस्सइ ॥ ५ ॥
 सखुड्ढगविअत्ताणं, वाहिआणं च जे गुणा । अक्खंडफुडिआ कायवा, तं सुणेह जहा तहा ॥ ६ ॥
 दस अट्ठ य ठाणाइं, जाइं बालोअवरज्झइ । तत्थ अन्नयरे ठाणे, निग्गंताओ भस्सइ ॥ ७ ॥
 वयल्लक्कं कायल्लक्कं, अकप्पो गिहिभायणं । पलियंकनिस [सि] उजा य, सिणाणं सोहवज्जणं ॥ ८ ॥
 तत्थिमं पढमं ठाणं, महावीरेण देसिअं । अहिंसा निउणा दिट्ठा, सबभूएसु संजमो ॥ ९ ॥
 जावंति लोए पाणा, तसा अदुव थावरा । ते जाणमजाणं वा, न हणे णो विघायए ॥ १० ॥
 सबे जीवा वि इच्छंति, जीविउं न मरिज्जिउं । तम्हा पाणिवहं घोरं, निग्गंथा वज्जयंति णं ॥ ११ ॥
 अप्पणट्ठा पग्गु वा, कोहा वा जइ वा भया । हिंसगं न मुसं बूआ, नोवि अन्नं वयावए ॥ १२ ॥
 मुसावाओ य लोगम्मि, सबसाहूहिं गरिहिओ । भविस्साओ य भूआणं, तम्हा मोसं विवज्जए ॥ १३ ॥
 चित्तमंतमचित्तं वा, अप्पं वा जइ वा बहुं । दंतसोहणमित्तं पि, उग्गहंसि अजाइया ॥ १४ ॥
 तं अप्पणा न गिण्हंति, नोवि गिण्हावए परं । अन्नं वा गिण्हमाणं पि, नाणुजाणंति संजया ॥ १५ ॥
 अवंभचरिअं घोरं, पमायं दुरहिट्ठिअं । नायरंति मुणी लोए, मेआयणवज्जिणो ॥ १६ ॥
 मूलमेयमहम्मस्स, महादोमसमुस्सयं । तम्हा मेहुणसंगगं, निग्गंथा वज्जयंति णं ॥ १७ ॥
 विट्ठमुब्भेइमं लोणं, तिच्छं सप्पि फाणिअं । न ते सन्निहिमिच्छंति, नायपुत्तवओरया ॥ १८ ॥
 लोहस्सेसणुफासे, मन्ने अन्नयरामवि । जे सिया सन्निहिं कामे, गिही पवइए न से ॥ १९ ॥
 जं पि वत्थं च पायं वा, कंबलं पायपुंल्लणं । तं पि संजमलज्झट्ठा, धारंति परिहरंति अ ॥ २० ॥
 न सो परिग्गहो वुत्तो, नायपुत्तेण ताइणा । मुच्छा परिग्गहो वुत्तो, इइ वुत्तं महेसिणा ॥ २१ ॥
 सवत्थुवहिणा बुद्धा, संरक्खणपरिग्गहे अवि अप्पणोऽवि देहम्मि, नायरंति ममाइयं ॥ २२ ॥
 अहो निच्चं तवो कम्मं, सबबुद्धेहिं वन्निअं । जा य लज्जासमा वित्ती, एगभत्तं च भोअणं ॥ २३ ॥
 संति मे सुहुमा पाणा, तसा अदुव थावरा । जाइं राओ उपासंतो, कहमेसणिअं चरे ॥ २४ ॥
 उदउल्लं वीअसंसत्तं, पाणा निवडिया महिं । दिआ ताइं विवज्जिजा, राओ एत्थ कहं चरे ॥ २५ ॥
 एअं च दोसं दट्ठुणं, नायपुत्तेण भासियं । सवाहारं न भुंजंति, निग्गंथा राइभोअणं ॥ २६ ॥
 पुढविकायं न हिंसंति, मणसावयसा कायसा । तिविहेण करणजोएण, संजया सुसमाहिआ ॥ २७ ॥
 पुढविकायं विहिसंतो, हिंसइउ तयस्मिअ । तसे अ विविहे पाणे, चक्खुसे अ अचक्खुसे ॥ २८ ॥
 तम्हा एअं विआणित्ता, दोसं दुग्गइवट्ठणं । पुढविकायसमारंभं, जावजीवाए वज्जए ॥ २९ ॥
 आउकायं न हिंसंति, मणसा वयसा कायसा । तिविहेण करणजोएण, संजया सुसमाहिआ ॥ ३० ॥

आउकायं विहिंसंतो, हिंसई तयस्सिए । तसे अ विविहे पाणे, चक्खुसे अ अचक्खुसे ॥ ३१ ॥
तम्हा एअं विआणित्ता, दोसं दुग्गइवड्डणं । आउकायसमारंभं, जावज्जीवाए वज्जए ॥ ३२ ॥
जायतेअं न इच्छंति । पावगं जलइत्तए । तिकखमन्नयरं सत्थं, सबओ वि दुरासयं ॥ ३३ ॥
पाईणं पडिणं वापि, उड्डं अणुदिसामवि । अहे दाहिणिओ वा वि. दहे उत्तरओ बि अ ॥ ३४ ॥
भूआणमेसमाघाओ. हव्वाहो न संसओ । तं पईवपयावट्ठा, संजया किंचि नारमे ॥ ३५ ॥
तम्हा एयं वियाणित्ता, दोसं दुग्गइवड्डणं । तेउकायसमारंभं, जावज्जीवाए वज्जए ॥ ३६ ॥
अणिलस्स समारंभं, बुद्धा मन्नंति तारिसं । सावज्जबहुलं चेअं, नेअं ताईहिं सेविअं ॥ ३७ ॥
ताल्लिअंटेण पत्तेण, साहाविहुअणेण वा । न ते वीइउमिच्छंति, वीआवेऊण वा परं ॥ ३८ ॥
जं पि वत्थं व (च) पायं वा, कंबलं पायपुच्छणं न ते वायमुइरंति, जयं परिहरंति अ ॥ ३९ ॥
तम्हा एअं विआणित्ता, दोसं दुग्गइवड्डणं । वाउकायसमारंभं, जावज्जीवाए वज्जए ॥ ४० ॥
वणस्सइं न हिंसंति, मणसा वयसा कायसा । तिविहेण करणजोएण, संजया सुसमाहिआ ॥ ४१ ॥
वणस्सइं विहिंसंतो, हिंसइ उ तयस्सिए । तसे अ विविहे पाणे, चक्खुसे अ अचक्खुसे ॥ ४२ ॥
तम्हा एयं वियाणित्ता, दोसं दुग्गइवड्डणं । वणस्सइ समारंभं, जावज्जीवाए वज्जए ॥ ४३ ॥
तसकायं न हिंसंति, मणसा वयसा कायसा । तिविहेण करणजोएण, संजया सुसमाहिआ ॥ ४४ ॥
तसकायं विहिंसंतो, हिंसइ उ तयस्सिए । तसे अ विविहे पाणे, चक्खुसे अ अचक्खुसे ॥ ४५ ॥
तम्हा एअं विआणित्ता, दोसं दुग्गइवड्डणं । तसकायसमारंभं, जावज्जीवाए [इ] वज्जए ॥ ४६ ॥
जाइं चत्तारि भुज्जाइं, इसिणा हारमाइणि । ताइं तु विवज्जंतो, संजमं अणुपालए ॥ ४७ ॥
पिंडं सिज्जं च वत्थं च, चउत्थं पायमेव य । अकप्पिअं न इच्छिज्जा, पडिगाहिज्ज कप्पिअं ॥ ४८ ॥
जे नियागं ममायंति, कीअमुद्देसिआहडं । वहं ते समणुजाणंति, इअ उ (वु)त्तं महेसिणा ॥ ४९ ॥
तम्हा असणपाणाइं, कीयमुद्देसियाहडं । वज्जयंति ठिअप्पाणो, निग्गंथा धम्मजीविणो ॥ ५० ॥
कंसेसु कंसपाएसु कुंडभोएसु वा पुणो । भुंजंतो असणपाणाइं, आयरा परिभस्सइ ॥ ५१ ॥
सीओदगं समारंभे, मत्तधोअणल्लड्डणे जाइं छनंति भूआइं, दिट्ठो तत्थ असंजमो ॥ ५२ ॥
पच्छाकम्मं पुरेकम्मं, सिआ तत्थ न कप्पइ । एअमट्ठं न भुंजंति, निग्गंथा गिहिभायणे ॥ ५३ ॥
आसंदीपलिअंकेसु, मंचमासालएसु वा । अणायरिअमज्जाणं, आसइत्तु सइत्तु वा ॥ ५४ ॥
नासंदीपलिअंकेसु, न निसिज्जा न पीढए । निग्गंथा पडिलेहाए, बुद्धवुत्तमहिट्ठगा ॥ ५५ ॥
गंभीरविजया एए, पाणा दुप्पडिलेहगा । आसंदी पलिअंको अ, एयमट्ठं विवज्जिआ ॥ ५६ ॥
गोअरग्गपविट्ठस्स, निसिज्जा जस्स कप्पइ । इमेणिसमणायारं, आवज्जइ अबोहिअं ॥ ५७ ॥
विवत्ती बंभचेरस्स, पाणाणं च वहे वहो । वणीमगपडिग्वाओ, पडिकोहो अणगारिणं ॥ ५८ ॥
अगुत्ती बंभचेरस्स, इत्थीओ वा वि संकणं । कुसीलवड्डणं, ठाणं, दूरओ परिवज्जए ॥ ५९ ॥
तिण्हमन्नयराणस्स, निसिज्जा जस्स कप्पइ । जराए अभिभूअस्स, वाहिअस्स तवस्सिणो ॥ ६० ॥
वाहिओ वा अरोगी वा, सिणाणं जो उ पत्थए । बुक्कंतो होइ आयारो, जटो हवइ संजमो ॥ ६१ ॥
संतिमे सुहुमा पाणा, घसासु मिलगासु अ । जे अ भिक्खू सिणायंतो, विअडेणुप्पिलावए ॥ ६२ ॥
तम्हा ते न सिणायंति, सीएण उसिणेण वा । जावज्जीवं वयं घोरं, असिणाणमहिट्ठगा ॥ ६३ ॥

सिण्णं अहुवा ककं, छुई वउममाणि अ । मायस्सुवट्ठणहुए, नायरंति क्याइ वि ॥ ६४ ॥
 नगिणस्स वावि मुंडस्स, दीहरोमनहंसिणो । मेहुणाओ उवसंतस्स, किं विभूसाय कारिअं ॥ ६५ ॥
 विभूसावत्तिअं भिक्खू, कम्मं वंयइ चिकणं । संसारसायरे घोरे, जेणं पडइ दुरुत्तरे ॥ ६६ ॥
 विभूसावत्तिअं चैअं, बुद्धा मन्नंति तारिसं । सावज्जं बहुलं चैअं, नेयं ताईहि सेविअं ॥ ६७ ॥
 खर्वंति अत्ताणममोहदंसिणो, तवे रया संजम अज्जवे गुणे ।
 धुणंति पावाइं, पुरेकडाइं नवाइं पावाइं न ते करंति ॥ ६८ ॥
 सओवसंता अममा अकिंचणा, सविज्जविज्जाणुगया जसंसिणो ।
 उउप्पसन्ने विमलें व चंदिमा । सिद्धिं विमाणाइ उवेंति (वयंति) ताइणो ॥ ६९ ॥
 त्ति वेमि ॥ इअ छट्ठं धम्मत्थकामज्झयणं समत्तं ॥ ६ ॥

॥ अह सुवक्कसुद्धी णाम सत्तमं अज्झयणं ॥

चउण्हं खलु भासाणं, परिसंखाय पन्नवं । दुण्हं तु विणर्यं सिकखे, दा न भासिज्ज सव्वसो ॥ १ ॥
 जा अ सच्चा अवत्तवा, सच्चामोसा अ जा मुसा । जा अ बुद्धेहिं नाइन्ना, न तं भासिज्ज पन्नवं ॥ २ ॥
 असच्चमोसं सच्चं च, अणवज्जमककसं । समुप्पेहमसंदिद्वं गिरं भासिज्ज पन्नवं ॥ ३ ॥
 एयं च अट्टमन्नं वा, जं तु नामेइ सासयं । स भासं सच्चमोसं च पि तं (पि) धीरो विवज्जए ॥ ४ ॥
 वितहं पि तहामुत्तिं, जं गिरं भासओ नरो । वग्हा सो पुट्ठो पावेणं, किं पुण जो मुसं वए ॥ ५ ॥
 तग्हा गच्छामो वक्खामो, अमुगं वा णे भविस्सइ ।
 अहं वा णं करिस्सामि, एसो वा णं करिस्सइ ॥ ६ ॥
 एवमाइ उ जा भासा, एसकालम्मि संकिआ । संपयाइअमट्ठे वा, तं पि धीरो विवज्जए ॥ ७ ॥
 अईअम्मि अ कालम्मि, पच्चुप्पणमणागए । जमट्ठं तु न जाणिज्जा, एवमेअं ति नो वए ॥ ८ ॥
 अईअम्मि अ कालम्मि, पच्चुप्पणमणागए । जत्थ संका भवे तं तु, एवमेअं तु नो वए ॥ ९ ॥
 अईअम्मि य कालम्मि, पच्चुप्पणमणागए । निस्संकिअं भवे जं तु, एवमेअं तु निदिसे ॥ १० ॥
 तहेव फरुसा भासा, गुरुभूओवक्काइणी । सच्चा वि सा न वत्तवा, जओ पावस्स आगमो ॥ ११ ॥
 तहेव काणं काणत्ति, पंडगं पंडगं त्ति वा । वाहिअं वा वि रोगि त्ति, तेणं चोरे त्ति नो वए ॥ १२ ॥
 एएणन्नेण अट्ठेणं, परो जेणुवहम्मइ । आयारभावदोसन्नू, न तं भासिज्ज पण्णवं ॥ १३ ॥
 तहेव होले गोलि त्ति, साणे वा वसुलि त्ति अ । दमए दुहए वा वि, नेवं भासिज्ज पण्णवं ॥ १४ ॥
 अज्जिए पज्जिए वा वि, अम्मो माउस्सिअ त्ति अ ।
 पिउस्सिए भायणिज्ज त्ति, धूए णत्तुणिअ त्ति अ ॥ १५ ॥
 हले हलित्ति अन्नि त्ति, भट्ठे सामिणि गोमिणि ।
 होले गोले वसुलि त्ति, इस्थिअं नेवमालवे ॥ १६ ॥
 णामधिज्जेण णं बूआ, इत्थीगुत्तेण वा पुणो । जहारिहमभिगिज्ज, आलविज्ज लविज्ज वा ॥ १७ ॥

अज्जए पज्जए वा वि, बण्णो चुल्लपिउ त्ति अ । माउलो भाइणिज्ज त्ति, पुत्ते णत्तुणिअ त्ति अ ॥ १८ ॥
हे भो ! हलित्ति अन्नित्ति, भट्टा सामिअ गोमिअ । होला गोल वसुलित्ति, पुरिसं नेवमालवे ॥ १९ ॥
नामधिज्जेण णं बूआ, परिगृत्तेण वा पुणो । जहारिहमभिगिज्ज, आलविज्ज लविज्ज वा ॥ २० ॥
पंचिदिआण पाणाण, एस इत्थी अयं पुमं । जाव णं नो विजाणिज्जा, ताव जाइ त्ति आलवे ॥ २१ ॥
तहेव मणुसं एसुं, पबिंख वा वि सरीसिवं । थूले पमेइले वज्जे, पाइमि त्ति अ नो वए ॥ २२ ॥
परिवुड्ढे त्ति णं बूआ, बूआ उवविए त्ति अ । संजाए पीणिए वावि, महाकाय त्ति आलवे ॥ २३ ॥
तहेव गाओ दुज्जाओ, दम्मा गोरहग त्ति अ । वाहिमा रहजोगि त्ति, नेवं भासिज्ज पण्णवं ॥ २४ ॥
जुवं गवि त्ति णं बूआ, घेणुं रसदय त्ति अ । रहस्से महल्लए वा वि, वए संवहाणि त्ति अ ॥ २५ ॥
तहेव गंतुमुज्जाणं, पवयाणि वणाणि अ । रुक्खा महल पेहाए, नेवं भासिज्ज पण्णवं ॥ २६ ॥
अलं पासायखंमाणं, तोरणाणि गिहाणि अ । फलिहग्गलनावाणं, अलं उदगदोणिणं ॥ २७ ॥
पीढए चंगबेरे अ, नंगले मइयं सिआ । जंतलट्ठी व नाभी वा, गंडिआ व अलं सिआ ॥ २८ ॥
आसणं सयणं जाणं, हुज्जा वा किंचुवस्सए । भूओवघाइणि भासं, नेवं भासिज्ज पण्णवं ॥ २९ ॥
तहेव गंतुमुज्जाणं, पवयाणि वणाणि अ । रुक्खा महल्ल पेहाए, एवं भासिज्ज पण्णवं ॥ ३० ॥
जाइमंता इमे रुक्खा, दीहवट्टा महालया । पयायसाला विडिमा, वए दरिसणि त्ति अ ॥ ३१ ॥
तहा फलाइं पकाइं, पायखज्जाइ नो वए । वेलोइयाइं टालाइं, वेहिमाइ त्ति नो वए ॥ ३२ ॥
असंथडा इमे अंबा, बहुनिव्वडिमा फला । वइज्ज बहुसंभूआ, भूअरूव त्ति वा पुणो ॥ ३३ ॥
तहेवोसहीओ पक्काओ, नीलिआओ छवीइअ । लाइमा भज्जिमाउ त्ति, पिहुखज्ज त्ति नो वए ॥ ३४ ॥
रूढा बहुसंभूआ, थिरा ओसढा वि अ । गब्भिआओ पसूआओ, संसाराउ त्ति आलवे ॥ ३५ ॥

तहेव संखडिं नच्चा, किच्चं कज्जं त्ति नो वए ।

सेणगं वावि वज्जि त्ति, सुत्तिथि त्ति अ आवगा ॥

॥ ३६ ॥

संखडिं संखडिं बूआ, पणिअट्ट त्ति तेणगं ।

बहुसमानि तित्थाणि, आवगाणं विआगरे ॥

॥ ३७ ॥

तहा नईओ पुण्णाओ, कायतिज्ज त्ति नो वए ।

नावहिं तारिमाउ त्ति, पाणिपिज्ज त्ति नो वए ॥

॥ ३८ ॥

बहुवाहडा अगाहा, बहुसलिलुप्पिलोदगा । बहुवित्थडोदगा आवि, एवं भासिज्ज पण्णवं ॥ ३९ ॥

तहेव सावज्जं जोगं, परस्सट्ठा अ निट्ठिअं । कीरमाणं ति वा नच्चा, सावज्जं न लवे मुणी ॥ ४० ॥

सुकडि त्ति सुयकि त्ति, सुच्छिन्ने सुहडे मडे । सुनिट्ठिए सुलट्ठित्ति, सावज्जं वज्जए मुणी ॥ ४१ ॥

पयत्तपक्कि त्ति व पक्कमालवे, पयत्तल्लिन्न त्ति व ल्लिन्नमालवे ।

पयत्तलट्ठित्ति व कम्महेउअं, पहारगाटि त्ति व गाढमालवे ॥

॥ ४२ ॥

सव्वुकसं परग्घं वा, अउलं नत्थि एरिसं । अविकिअमवत्तवं, अचिअत्तं चेव नो वए ॥ ४३ ॥

सव्वमेअं वइस्सामि, सव्वमेअं त्ति नो वए । अणुवीइ सवं सव्वत्थ, एवं भासिज्ज पण्णवं ॥ ४४ ॥

सुकीअं वा सुविकीअं, अकिज्जं किज्जमेव वा । इमं गिण्ह इमं मुंच, पणिणं नो विआगरे ॥ ४५ ॥

अप्पग्घे वा गहग्घे वा, कए वा बिकए वि वा । पडिअट्ठे समुप्पन्ने, अणवज्जं विआगरे ॥ ४६ ॥
 तहेवासंजयं धीरो, आस एहि करेहि वा । सयंचिट्ठ वयाहित्ति, नेवं भासिज्ज पण्णवं ॥ ४७ ॥
 बहवे इमे असाहु, लोए वुच्चंति साहुणो । न लवे असाहुं साहुत्ति, साहुं साहुत्ति आलवे ॥ ४८ ॥
 नाणदंसणसंपन्नं, संजमे अ तवे रयं । एवं गुणसमाउत्तं, संजयं साहुमालवे ॥ ४९ ॥
 देवाणं मणुआणं च, तिरिआणं च बुग्गहे । अमुगाणं जओ होउ, मा वा होउत्ति नो वए ॥ ५० ॥

वाओ बुट्ठं व सीउण्हं, खेमं धायं सिवं ति वा ।

कया णु हुज्ज एयाणि, मा वा होउ त्ति नो वए ॥ ५१ ॥

तहेव मेहं व नहं व मणवं, न देवदेव त्ति गिरं वइज्जा ।

समुच्छिए उन्नए वा पओए, वइज्ज वा बुट्ठ बलाहय त्ति ॥ ५२ ॥

अंतलिक्ख त्ति णं बूआ, गुज्झाणुचरिअ त्ति अ ।

रिद्धिमंतं नरं दिस्स, रिद्धिमंतं ति आलवे ॥ ५३ ॥

तहे सावज्जणुमोअणी गिरा, जा य पसेवघायणी ।

से कोह लोह भय हास माणवो, न हासमाणो विगिरं वइज्जा ॥ ५४ ॥

सुवक्कसुद्धिं समुपेहिआ मुणी, गिरं च दुट्ठं परिवज्जए सया ।

मिअ अदुट्ठे अणुवीइ भासए, सयाण मज्जे लहई पसंसणं ॥ ५५ ॥


भासाइ दोसे अ गुणे अ जाणिआ, तीसेअ दुट्ठे परिवज्जए सया ।

छमु संजए सामणिए सया जए, वइज्ज बुद्धे हिअमाणुलोअं ॥ ५६ ॥

परिक्खभासी सुसमाहिइंदिए, चउक्कसायावगए अणिस्सिए ।

स निद्धुणे धुत्तमलं पुरेकडं, आराहए लोगमणिं तहा परं ॥ ५७ ॥

त्ति वेमि ॥ इअ सुवक्कसुद्धीनामं सत्तमं अज्झयणं समत्तं ॥ ७ ॥



॥ अह आयारयणिही अष्टममज्झयणं ॥

आयारपणिहिं लद्धुं, जहा कायव भिक्खुणा । तं मे उदाहरिस्सामि, आणुपुब्बि सुणेह मे ॥ १ ॥
 पुढविदगअगणिमारुअ, तणरुक्खस्स वीयगा । तसा अ पाणा जीव त्ति, इइ वुत्तं महेसिणा ॥ २ ॥
 तेसिं अच्छणजोएण, निच्चं होअव्वयं सिआ । मणसा कायवकेण, एवं हवइ संजए ॥ ३ ॥
 पुढविं भित्तिं सिलं लेल्लं, नेव भिंदे न संलिहे । तिविहेण करणजोएण, संजए सुसमाहिए ॥ ४ ॥
 सुद्धपुढवीं न निसीए, ससरक्खम्मि अ आसणे । पमज्जित्तु निसीइज्जा, जाइत्ता जस्स उग्गहं ॥ ५ ॥
 सीओदगं न सेविज्जा, सिलावुट्ठं हिमाणि अ । उसिणोदधं तत्तफासुअं, पडिगाहिज्ज संजए ॥ ६ ॥
 उदउल्लं अप्पणो कायं, नेव पुंछे न संलिहे । समुप्पेह तहाभूअं, नो णं संघट्टए मुणी ॥ ७ ॥
 इंगालं अगणिं अच्चिं, अलायं वा सजोइअं । न उंजिज्जा न घट्टिज्जा, नो णं निद्वावए मुणी ॥ ८ ॥
 तालिअंटेण पत्तेण, साहाए विहुयणेण वा । न वीइज्ज अप्पणो कायं, बाहिरं वा वि पुग्गलं ॥ ९ ॥
 तणरुक्खं न छिंदिज्जा, फलं मूलं च कस्सइ । आमगं विविहं बीअं, मणसा वि ण पत्थए ॥ १० ॥
 गहणेसु न चिट्ठिज्जा, वीएसु हरिएसु वा । उदगम्मि तहा निच्चं, उत्तिगपण्णेषु वा ॥ ११ ॥
 तसे पाणे न हिंसिज्जा, वाया अदुव कम्मणा । उवरओ सबभूएसु, पासेज्ज विविहं जगं ॥ १२ ॥
 अट्ट सुहुमाइ पेहाए, जाइं जाणित्तु संजए । दयाहिगारी भूएसु, आस चिट्ठ सएहि वा ॥ १३ ॥
 कयराइं अट्ट सुहुमाइं, जाइं पुच्छिज्ज संजए । इमाइं ताइं मेहावी, आइक्खिज्ज विअक्खणो ॥ १४ ॥
 सिणेहं पुप्फसुहुमं च, पाणुत्तिगं एहेव य । पणगं बीअ हरिअं च, अंडसुहुमं च अट्टमं ॥ १५ ॥
 एवमेआणि जाणित्ता, सबभावेण संजए । अप्पमत्तो जए निच्चं, सब्बिंदिअसमाहिए ॥ १६ ॥
 धुवं च पडिलेहिज्जा, जोगसा पायकंबलं । सिज्जमुच्चारभूमिं च, संथारं अदुवासणं ॥ १७ ॥
 उच्चारं पासवणं, खेलं सिंघाणजल्लिअं । फासुअं पडिलेहित्ता, परिट्ठाविज्ज संजए ॥ १८ ॥
 पविसित्तु परागारं, पाणट्ठा भोअणस्स वा । जयं चिट्ठे मिअं भासे, न य रुवेसु मणं करे ॥ १९ ॥
 बहु सुणेइ कण्णेहिं, बहु अल्लीहिं पिच्छइ । न य दिट्ठं सुअं सव्वं भिक्खू अक्खाउमरिहइ ॥ २० ॥
 सुअं वा जइ वा दिट्ठं, न लविज्जोवघाइअं । न य केण उवाएणं, गिहिजोगं समायरे ॥ २१ ॥
 निट्ठाणं रसनीज्जूढं, भदगं पावगं ति वा । पुट्ठो वावि अपुट्ठो वा, लाभालाभं न निदिसे ॥ २२ ॥
 न य भोअणम्मि गिद्धो, चरे उल्लं अयंपिरो । अफासुअं न मुजीज्जा, कीअमुदे सिआहडं ॥ २३ ॥
 सनिहीं च न कुव्विज्जा, अणुमायं पि संजए । सुहाजीवी असंबद्धे, हविज्ज जगनिस्सिए ॥ २४ ॥
 लहवित्ति सुसंतुट्ठे, अषिच्छे सुहरे सिआ । आसुरत्तं न गच्छिज्जा, सुचा णं जिणसासणं ॥ २५ ॥
 कण्णसुक्खेहिं सदेहिं, प्रेमं नामिनि वेसए । दारुणं ककसं फासं, काएण अहिआसए ॥ २६ ॥
 सुहं पिवासं दुस्सिज्जं, सीउण्हं अरइं भयं । आहिआसे अव्वहिओ देहदुःखं महाकअं ॥ २७ ॥
 अत्थं गयम्मि आइच्चे, पुरत्था अ अणुग्गए । आहारभाइअं सव्वं, मणसा वि ण पत्थए ॥ २८ ॥
 अत्तित्तिणे अचवले, अप्पभासी, मिआसणे । हविज्ज उअरे दंते, थोवं लद्धुं न खिसए ॥ २९ ॥
 न बाहिरं परिभवे अत्ताणं न समुक्खे । सुअलामे न मज्जिज्जा, जच्चा तवस्मि बुद्धिए ॥ ३० ॥

सै जाणमजाणं वा, कट्टु आहम्मिअं पयं । संवरे खिप्पमप्पाणं, बीअं तं न समायरे ॥ ३१ ॥
 अणायारं परक्कम्म, नेव गूहे न निण्हवे । सुई सया वियडभावे, असंसत्ते जिइंदिए ॥ ३२ ॥
 अमोहं वयणं कुज्जा, आयरीअस्स महप्पणो । तं परिगिज्झ वायाए, कम्मुणा उववायए ॥ ३३ ॥
 अधुवं जीविअं नच्चा, सिद्धिमगं विआणिआ । विणिअट्ठिज्ज मोगेसु, आउं परिमिअमप्पणो ॥ ३४ ॥
 बलं थामं च पेहाए, सट्ठामारुग्गमप्पणो । खित्तं कालं च विन्नाय, तहप्पाणं निजुंजए ॥ ३५ ॥
 जरा जाव न पीडेइ, वाही जाव न वड्डइ । जाविंदिआ न हायंति, ताव धम्मं समायरे ॥ ३६ ॥
 कोहं माणं च मायं च, लोभं च पाववट्ठणं । वमे चत्तारि दोसे उ, इच्छंतो हिअमप्पणो ॥ ३७ ॥
 कोहो पीइं पणासेइ, माणो विणयनासणो । माया मित्ताणि नासेइ, लोभो सबविणासणो ॥ ३८ ॥
 उवसमेण हणे कोहं, माणं मद्वया जिणे । मायमज्जवभावेण, लोभं संतोसओ जिणे ॥ ३९ ॥

कोहो अ माणो अ अणिग्गहीआ, माया अ लोभो अ पवड्डमाणा ।

चत्तारि एए कसिणा कसाया, सिंचंति मूलाइ पुणब्भवस्स ॥ ४० ॥

रायणिएसु विणयं पउंजे, धुवसीलयं सययं न हावइज्जा ।

कुम्मुच्च अल्लीणपलीणगुत्तो, परक्कमिज्जा तवसंजम्मि ॥ ४१ ॥

निइं च न बहु मन्निज्जा, सप्पहासं विवज्जए । मिहो कहाहिं न रमे, सज्झायम्मि रओ सया ॥ ४२ ॥
 जोगं च समणधम्मम्मि, जुंजे अनलसो धुवं । जुत्तो अ समणधम्मम्मि, अट्ठं लहइ णणुत्तरं ॥ ४३ ॥
 इहलोगपारत्तहिअं, जेणं गच्छइ सुग्गइ । बहुस्सुअं पज्जुवासिज्जा, पुच्छिज्जत्थविणिच्छअं ॥ ४४ ॥
 हत्थं पायं च कयं च, पणिहाय जिइंदिए । अल्लीणगुत्तो निसिए, सगासे गुरुणो मुणी ॥ ४५ ॥
 न पक्खओ न पुरओ, नेव किच्चाण पिट्ठओ । न य ऊरुं समासिज्ज, चिट्ठिज्जा गुरुणंतिए ॥ ४६ ॥
 अपुच्छिओ न भासिज्जा, भासमाणस्स अंबरा । पिट्ठिमसं न खाइज्जा, मायापोसं विवज्जए ॥ ४७ ॥

अप्पत्तिअं जेण सिआ, आसु कुप्पिज्ज वा परो ।

सच्चसो तं न भासिज्जा, भासं अहिअगामिणिं ॥ ४८ ॥

दिट्ठं मिअं असंदिट्ठं, पडिपुन्नं विअं जिअं । अयंपिरमणुव्विग्गं, भासं निसिर अत्तवं ॥ ४९ ॥
 आयारपन्नत्तिधरं, दिट्ठिवायमहिज्जगं । वायविकखलिअं नच्चा, न तं उवहसे मुणी ॥ ५० ॥
 नक्खत्तं सुमिणं जोगं, निमित्तं मंतभेसजं । गिहिणो तं न आइक्खे, भूआहिगरणं पयं ॥ ५१ ॥
 अन्नट्ठं पगडं लयणं, भइज्जा सयणासणं । उच्चारभूमिसंपन्नं, इत्थीपसु विवज्जिअं ॥ ५२ ॥
 विविच्चा अ भवे सिज्जा, नारीणं न लवे कहं । गिहिसंथवं न कुज्जा, कुज्जा साहूहि संथवं ॥ ५३ ॥
 जहा कुक्कुडपोअस्स, निच्चं कुललओ भयं । एवं खु बंभयारिस्स, इत्थीविग्गहओ भयं ॥ ५४ ॥
 चित्तभित्तिं न निज्झाए, नारिं वा सअलंकिअं । भक्खरं पिव दट्ठणं, दिट्ठिं पडिमसमाहरे ॥ ५५ ॥
 हत्थपायपडिच्छिन्नं, कन्ननासविगप्पिअं । अवि वासमयं नारिं, बंभयारि विवज्जए ॥ ५६ ॥
 विभूसा इत्थिसंसग्गी, पणीअं रसभोअणं । नरस्सत्तगवेसिस्स, विसं तालउडं जहा ॥ ५७ ॥
 अंगपच्चंगसंठाणं, चारुल्लविअप्पेहिअं । इत्थीणं तं न गिज्झाए, कामरागविवट्ठणं ॥ ५८ ॥
 विसएसु मणुण्णेषु, पेमं नाभिनिवेसए । अणिच्चं तेसि विण्णाय, परिणाम पुग्गलाण उ ॥ ५९ ॥

पोग्गलाणं परिणामं, तेसिं नच्चा जहा तहा । विणीअतिण्हो विहरे, सीईभूएण अप्पणा ॥ ६० ॥
 जाइ सद्धाइ निक्खंतो, परिआयट्ठाणमुत्तमं । तमेव अणुपालिज्जा, गुणे आयरियसंमए ॥ ६१ ॥
 तवं चिमं संजमजोगयं च, सज्झायजोगं च सया अहिट्ठ ए ।
 सरे व सेणाइ सम्मत्तमाउहे, अलमप्पणो होइ अलं परेसिं ॥ ६२ ॥
 सज्झायसुज्झाणरयस्स ताइणो, अपावभावस्स तवे रयस्स ।
 विसुज्झई जं सि मलं पुरेकडं, समीरिअं रूपमलं व जोइणा ॥ ६३ ॥
 से तारिसे दुक्खसहे जिइंदिए, सुएण जुत्ते अममे अकिंचणे ।
 विरायई कम्मघणम्मि अवगए, कसिणम्भपुडावगमे व चंदिम ॥ ६४ ॥
 त्ति बेमि ॥ इअ आचारपणिही णाम अट्टममज्झयणं समत्तं ॥ ८ ॥

॥ अह विणयसमाही णाम नवममज्झयणं ॥

थंभा व कोहा व मयप्पमाया, गुरुस्सगासे विणयं न सिक्खे ।
 सो चेव उ तस्स अभूइभावो, फलं व कीअस्स वहाय होइ ॥ १ ॥
 जे आवि मंदि त्ति गुरुं विइत्ता, डहरे इमे अप्पसुए त्ति नच्चा ।
 हीलंति मिच्छं पडिवज्जमाणा, करंति आसायण ते गुरुणं ॥ २ ॥
 पगईए मंदा वि भवंति एगे, डहरा वि अ जे सुअबुद्धोववेआ ।
 आयरमंता गुणसुट्ठिअप्पा, जेहीलिआ सिहिरिव भास कुज्जा ॥ ३ ॥
 जे आवि नागं डहरं ति नच्चा, आसायए से अहिआय होइ ।
 एवारियअं पि हु हीलयंतो, निअच्छई आइपहं खु मंदो (दे) ॥ ४ ॥
 आसीविसो वावि परं सुरुट्ठो, किं जीवनासाउ परं न कुज्जा ।
 आयरिआया पुण अप्पसन्ना, अबोहिआसायण नत्थि मुक्खो ॥ ५ ॥
 जो पावगं जलिअमवक्कमिज्जा, आसीविसं वा वि हु कोवइज्जा ।
 जो वा विसं खायइ जीविअट्ठी, एसोवमासायणगा गुरुणं ॥ ६ ॥
 सिआ हु से पावय नो डहिज्जा, आसीविसो वा कुविओ न भक्खे ।
 सिआ विसं हालहलं न मारे, न आवि मुक्खो गुरुहीलणाए ॥ ७ ॥
 जो पव्वयं सिरसा भित्तुमिच्छे, सुत्तं व सीहं पडिबोहइज्जा ।
 जो वा दए सत्तिअग्गे पहारं, एसोवमासायणया गुरुणं ॥ ८ ॥
 सिआ हु सीसेण गिरिं पि भिंदे, सिआ हु सीहो कुविओ न भक्खे ।
 सिआ न भिंदिज्ज व सत्तिअग्गं, न आवि मुक्खो गुरुहीलसाए ॥ ९ ॥
 आयरिअपाया पुण अप्पसन्ना, अबोहिआसायण नत्थि मुक्खो ।
 तम्हा अणावाहसुहाभिकंखी, गुरुप्पसायाभिमुहो रमिज्जा ॥ १० ॥
 जहाहिअग्गी जलणं नमंसे, नाणाहुईमंतपयाभिसित्तं ।

एवायरिअं उवचिद्धइज्जा, अणंतनाणोवगओ वि संतो ॥ ११ ॥
जस्संतिए धम्मपयाइ सिक्खे, तस्संतिए वेणइयं पउंजे ।
सक्कारए सिरसा पंजलीओ, कायगिरा भो मणसा अ निच्चं ॥ १२ ॥
लज्जा दया संजमबंभचेरं, कल्लाणभागिस्स विसोहिठाणं ।
जे मे गुरू सययमणुसासयंति, तेहिं गुरू सययं पूजयामि ॥ १३ ॥
जहा निसंते तवणच्चिमाली, पभासई केवलभारहं तु ।
एवायरिओ सुअसीलबुद्धिए, विरायई सुरमज्जे व इंदो ॥ १४ ॥
जहा ससी कोमुइजोगजुत्तो, नक्खत्ततारागणपरिवुडप्पा ।
खे सोहई विमले अब्भमुक्के, एवं गणी सोहइ भिक्खुमुज्जे ॥ १५ ॥
महागरा आयरिआ महेसी, समाहिजोगे सुअसीलबुद्धिए ।
संपाविउकामे अणुत्तराई, आराहए तोसइ धम्मकामी ॥ १६ ॥
सुच्चा ण मेहावी सुभासिआई, सुस्ससए आयरिअप्पमत्तो ।
आराहइत्ताण गुणे अणेगे, से पावई सिद्धिमणुत्तरं त्ति वेमि ॥ १७ ॥
॥ इअ विणयसमाहिज्जयणे पढमो उद्देसो समत्तो ॥

मूलाउ खंघप्पभवो दुमस्स, खंधाउ पच्छा समुविति साहा ।

साहप्पसाहा विरुहंति पत्ता, तओ सि (से) पुप्फं च फलं रसो अ ॥

॥ १ ॥

एवं धम्मस्स विणओ, मूलं परमो अ से मुक्खो, जेण कित्तिं सुअं सिद्धं, नीसेसं चाभिगच्छइ ॥ २ ॥
जे अ चंडे मिए थंढे, दुव्वाई नियडी सढे । बुज्झइ से अविणीअप्पा, कट्ठं सोअगयं जहा ॥ ३ ॥
विणयम्मि जो उवाएणं, चोइओ कुप्पइ नरो । दिव्वं सो सिरिमिज्जंति, दंडेण पडिसेहिए ॥ ४ ॥
तहेव अविणीअप्पा, उववज्झा हया गया । दीसंति दुहमेहंता, आभिओगमुवट्ठिआ ॥ ५ ॥
तहेव सुविणीअप्पा, उववज्झा हया गया । दीसंति सुहमेहंता, इड्ढिं पत्ता महायसा ॥ ६ ॥
तहेव अविणीअप्पा, लोगम्मि नरनारिओ । दीसंति दुहमेहंता, छाया ते विगलिंदिआ ॥ ७ ॥
दंडसत्थपरिज्जुन्ना, असब्भवयणेहि अ । कलुणा विवन्नच्छंदा, सुप्पिवासपरिगया ॥ ८ ॥
तहेव सुविणीअप्पा, लोगंसि नरनारिओ । दासंति सुहमेहंता, इड्ढिं पत्ता महायसा ॥ ९ ॥
तहेव अविणीअप्पा, देवा जक्खा अ गुज्झगा । दीसंति दुहमेहंता, आभिओगमुवट्ठिआ ॥ १० ॥
तहेव सुविणीअप्पा, देवा जक्खा अ गुज्झगा । दीसंति सुहमेहंता, इड्ढिं पत्ता महायसा ॥ ११ ॥
जे आयरिअउवज्झायाणं, सुस्ससावयणं करे । तेसिं सिक्खा पवड्ढंति, जलसित्ता इव पायवा ॥ १२ ॥
अप्पणट्ठा परट्ठा वा, सिप्पा णेउणिआणि अ । गिहिणो उवभोगट्ठा, इहलोगस्स कारणा ॥ १३ ॥
जेण बंधं वहं घोरं, परिआवं च दारुणं । सिक्खमाणा निअच्छंति, जुत्ता ते ललिइंदिआ ॥ १४ ॥
ते वि तं गुरू पूअंति, तस्स सिप्पस्स कारणा । सक्कारंति नमंसंति, तुट्ठा निर्देसवत्तिणो ॥ १५ ॥
किं पुण जे सुअग्गाही, अणंतहिअकामए । आयरिआ जं वए भिक्खू, तम्हा तं नाइवत्तए ॥ १६ ॥

नीअं सिज्जं गइं ठाणं, नीअं च आसणाणि अ । नीअं च पाए वंदिज्जा, नीअं कुज्जा अ अंजलिं ॥ १७ ॥
 संघट्टइत्ता काएणं, तहा उवहिणामवि । खमेह अवराहं मे, वइज्ज न पुणु त्ति अ ॥ १८ ॥
 दुग्गओ वा पओएणं, चोइओ वहइ रहं । एवं दुबुद्धिं किच्चाणं, वुत्तो वुत्तो पकुवइ ॥ १९ ॥
 आलवंते लवंते वा, न निसिज्जाए पडिस्सुणे । मुत्तूण आसणं धीरो, सुस्सुसाए पडिस्सुणे ॥ २० ॥
 कालं छंदोवयारं च, पडिछेहित्ताण हेउहिं । तेण तेण उवाएण, तं तं संपडिवायए ॥ २१ ॥
 विवति अविणीअस्स, संपत्ती विणिअस्स य । जस्सेयं दुहओ नायं, सिक्खं से अभिगच्छइ ॥ २२ ॥

जे आवि चंडे मइइड्डिगारवे, पिसुणे नरे साहसडीणपेसणे ।

अदिट्ठधम्मे विणए अकोविए, असंविभागी न हु तस्स मुक्खो ॥ २३ ॥

निहेसविच्ची पुण जे गुरूणं, सुअत्थधम्मा विणयम्मि कोविआ ।

तरित्तु ते ओधमिणं दुरुत्तरं, खवित्तु कम्मं गइमुत्तमं गया ॥ २४ ॥

त्ति बेमि इअ विणयसमाहिणामज्झयणे बीओ उद्देसो समत्तो ॥

आयरिअं(अ) अग्निमिवाहिअग्नी, सुस्सुसमाणो पडिजागरिज्जा ।

आलोइअं इंगिअमेव नच्चा, जो छंदमाराहयई स पुज्जो ॥ १ ॥

आयारमट्ठा विणयं पउंजे, सुस्सुसमाणो परिगिज्ज वक्कं ।

जहोवइड्डं अभिकंखमाणो, गुरुं च नासायइ जे स पुज्जो ॥ २ ॥

रायणिएसु विणयं पउंजे, डहरा वि अ जे परिआयजिट्ठा ।

नीअत्तणे वट्ठइ सच्चवई, ओवायवं वक्करे स पुज्जो ॥ ३ ॥

अन्नायउल्लं चरई विसुद्धं, जवणट्ठया समुआणं च निच्चं ।

अलद्धुअं नो परिदेव इज्जा, लद्धुं न विकत्थई स पुज्जो ॥ ४ ॥

संथारसिज्जासणभत्तपाणे, अपिच्छया अइलामे वि संते ।

जो एवमप्पाणभितीसइज्जा, संतोसपाहन्नए स पुज्जो ॥ ५ ॥

सक्का सहेउं आसाइ कंटया, अओमया उच्छहया नरेणं ।

अणासए जो उ सहिज्ज कंटए, वईमए कन्नसरे स पुज्जो ॥ ६ ॥

मुहुत्तदुक्खा उ हवंति कंटया, अओमया ते वि तओ सुउद्धरा ।

वायादुरुत्ताणि दुरुद्धराणि, वेराणुबंधीणि मयुब्भयाणि ॥ ७ ॥

समावयंता वयणाभिघाया, कन्नंगया दुम्मणिअं जाणंति ।

धम्मू त्ति किच्चा परमग्गसूरे, जिहदिए जो सहई स पुज्जो ॥ ८ ॥

अवण्णवायं च परम्महस्स, पच्चक्खओ पडिणीअं च भासं ।

ओहारणिं अप्पिअकारणिं च, भासं न भासिज्ज सया स पुज्जो ॥ ९ ॥

अलोलए अक्कुहए अमाई, अपिसुणे आवि अदीणविच्ची ।

नो भावएनो वि अ भाविअप्पा, अकोउहल्ले अ सया स पुज्जो ॥ १० ॥

गुणेहि साहू अगुणेहिऽसाहू, गिण्हाहि साहू गुण मुंचऽसाहू ।
 विआणिआ अप्पगमप्पणं, जो रागदोसेहिं समो स पुज्जो ॥ ११ ॥
 तहेव डहरं च महल्लगं वा, इत्थी पुमं पवइअं गिहिं वा ।
 नो हीलए नो वि अ खिसइज्जा थंमं च कोहं च चए पुज्जो ॥ १२ ॥
 जे माणिआ सयययं माणयंति, जत्तेण कन्नं व निवेसयंति ।
 ते माणए माणरिहे तवस्सी, जिइंदिए सच्चरए स पुज्जो ॥ १३ ॥
 तेसिं गुरुणं गुणसायराणं, सुच्चाण मेहावि सुभासिआइं ।
 चरे सुणी पंचरए तिगुत्तो, चउकसायावगए स पुज्जो ॥ १४ ॥
 गुरुमिह सययं पडिगरिअ सुणी, जिणमयनिउणे अभिगमकुसले ।
 धुणिअ रयमलं पुरेकडं, भासुरमउलं गइं वइ (गय) ॥ १५ ॥

त्ति बेमि ॥ इअ विणयसमाहीए तइओ उहेसो समत्तो ॥

सुअं मे आउत्तं-तेणं भगवथा एवमकखायं । इह खलु थेरेहिं भगवंतेहिं चत्तारि विणयसमा-
 हिठाणा पन्नत्ता । कयरे खलु ते थेरेहिं भगवतेहिं चत्तारि विणयसमाहिट्ठाणा पन्नत्ता । इमे खलु ते
 थेरेहिं भगवंतेहिं चत्तारि विणयसमाहिट्ठाणा पन्नत्ता । तंजहा-विणयसमाही, सुअसमाही, तवस-
 माही, आयारसमाही । “विणए सुए अ तवे, आयारे निच्च पंडिआ । अभिरामयंति अप्पाणं, जे
 भवंति जिइंदिआ” चउव्विहा खलु विणयसमाही भवइ । तंजहा-अणुसासिज्जतो, सुस्ससइ । सम्मं
 पडिवज्जइ । वयमाराहइ । न य भवइ अत्तसंपगगहिए । चउत्थं पयं भवइ । भवइ अ इत्थ सिलोगो॥
 “पेहेइ हिसाणुसासणं, सुस्ससइ तं च पुणो अहिट्ठिए । न य माणमएण मज्जइ, विणयसमाहिआ-
 ययट्ठिए” ॥ २ ॥ चउव्विहा खलु सुअसगाही भवइ । तंजहा-सुअं मे भविस्सइ त्ति अज्झाइअव्वं
 भवइ । एगगगचित्तो भविस्सामि त्ति अज्झाइअव्वयं भवइ । अप्पाणं ठावइस्सामि त्ति अज्झाइअव्वयं
 भवइ । ठिओ परं ठावइस्सामि त्ति अज्झाइअव्वयं भवइ । चउत्थं पयं भवइ । भवइ अ इत्थ सिलोगो॥
 “नाणमेगगचित्तो अ, ठिओ अ ठावइ परं । सुआणि अ अहिज्जित्ता, रओ सुअसाहिए” ॥ ३ ॥
 चउव्विहा खलु तवसमाही भवइ । तंजहा-नो इहलोगट्ठयाए तवमहिट्ठिज्जा, नो परलोगट्ठयाए तव-
 महिट्ठिज्जा, नो कित्तिवन्नसदसिलोगट्ठयाए तवमहिट्ठिज्जा, नन्नत्थ निज्जरट्ठयाए तवमहिट्ठिज्जा ।
 चउत्थं पयं भवइ । भवइ अ इत्थ सिलोगो ॥ “विविहगुणतवोरए, निच्चं भवइ थिरासए निज्जर-
 ट्ठिए । तवसा धुणइ पुराणपावगं, जुत्तो सया तवसमाहिए” ॥ ४ ॥ चउव्विहा खलु आयारसमाही
 भवइ । तंजहा-नो इहलोगट्ठयाए आयारमहिट्ठिज्जा, नो नो परलोगट्ठयाए आयारमहिट्ठिज्जा, नो
 कित्तिवन्नसदसिलोगट्ठयाए आयारमहिट्ठिज्जा, नन्नत्थ आरहंतेहिं हेऊहिं आयारमहिट्ठिज्जा । चउत्थं
 पयं भवइ । भवइ अ इत्थ सिलोगो । “जिणवयणरए अतितणे, पडिपुन्नाययमाययट्ठिए । आयार-
 समाहिसंबुडे, भवइ अ दंते भावसंघए ॥ ४ ॥ अभिगम चउरो समाहिओ, सुविसुद्धो सुसमाहिअ-
 प्पणो । विउलहिअं सुदावहं पुणो, कुवइ अ सो पयखेममप्पणो ॥ ६ ॥ जाइमरणाओ मुच्चइ इत्थत्थं

च चण्ड सबसो । सिद्धे वा हवइ सासए, देवे वा अप्परए महिङ्गिए ॥ ७ ॥

त्ति बेमि ॥ इअ विणयसमाही नाम चउत्थो उद्देसो नवममज्झयणं समत्तं ॥ ९ ॥

॥ अह भिक्खू नामं दसममज्झयणं ॥

तिक्खम्ममाणाइ अ बुद्धवयणे, निच्चं चित्तसमाहिओ हविज्जा ।
 इत्थीण वसं न आवि गच्छे, वंतं नो पडिआवइ जे स भिक्खू ॥ १ ॥
 पुढविं न खणे न खणावए, सीओदगं न पिए न पिआवए ।
 अगणि सत्थं जहा सुनिसिअं, तं न जले न जलावए जे स भिक्खू ॥ २ ॥
 अनिलेण न वीए न वीयावए, हरियाणि न छिंदे न छिंदावए ।
 बीआणि सया विवज्जयंतो, सचित्तं नाहारए जे स भिक्खू ॥ ३ ॥
 वहणं तसथावराणं होइ, पुढवितणकट्टुनिस्सिआणं ।
 तम्हा उद्देसिअं न भुंजे नो वि, पए न पयावए जे स भिक्खू ॥ ४ ॥
 रोइअ नायपुत्तवयणे, अत्तसमे मन्निज्ज छप्पि काए ।
 पंच य फासे महवयाइं, पंचासवसंवरे जे स भिक्खू ॥ ५ ॥
 चत्तारि वमे सया कसाए, धुवजोगी हविज्ज बुद्धवयणे ।
 अहणे निजायरवरयए, गिहिजोगं परिवज्जए जे स भिक्खू ॥ ६ ॥
 सम्मदिट्ठी सया अमूढे, अत्थि हु नाणे तवे संजमे अ ।
 तवसा धुणइ पुराणपावगं, मणवयकायसुसंवुडे जे स भिक्खू ॥ ७ ॥
 त्तेव असणं पाणगं वा, विविहं खाइमसाइमं लभित्ता ।
 होही अट्ठो सुए परे वा, तं न निहे न निहावए जे स भिक्खू ॥ ८ ॥
 त्तेव असणं पाणगं वा, विविहं खाइमसाइमं लभित्ता ।
 छंदिअ साहम्मिआण भुंजे, भुच्चा सज्जायरए जे स भिक्खू ॥ ९ ॥
 न य वुग्गहिअं कहं कहिज्जा, न य कुप्पे निहुइंदिए पसंते ।
 संजमधुवजोगजुत्ते, उवसंते उवहेडए जे स भिक्खू ॥ १० ॥
 जो सहइ हु गामकंटए, अकोसपहारतज्जणाओ अ ।
 भयभेरवसहसप्पहासे, समसुहदुक्खसंहे अ जे स भिक्खू ॥ ११ ॥
 पडिमं पडिवज्जिआ समाणे, नो भायए भयभेरवाइं दिस्स ।
 विविहगुणतवोरए अ निच्चं, न सरीरं चाभिकंखए जे स भिक्खू ॥ १२ ॥
 असइं वोसिट्ठचत्तदेहे, अकुट्ठे व हए लूसिए वा ।
 पुढविसमे मुणीइविज्जा, अनिआणे अकोउहल्ले जे स भिक्खू ॥ १३ ॥
 अभिभूअ काएण परीसहाइं, समुद्धरे जाइपहाउ अप्पयं ।
 विउत्तु जाईमरणं महब्भयं, तवे रए सामणिए जे स भिक्खू ॥ १४ ॥

हत्थसंजए प्रायसंजए, वायसंजए संजइंदिए ।
 अज्झप्परए सुसमाहिअप्पा, सुत्तत्थं च विआणइ जे स भिक्खू ॥ १५ ॥
 उवहिम्मि अमुच्छिए अगिद्धे, अन्नायउंछं पुलनिप्पुलाए ।
 कयविकयसन्निहिओ विरए, सबसंगावमए अ जे स भिक्खू ॥ १६ ॥
 अलोल(लु)भिक्खू न रसेसु गिज्जे, उंछं चरे जीविअनाभिकंखी ।
 इड्ढिं च सक्कारण पूअणं च, चए ठिअप्पा अणिहे जे स भिक्खू ॥ १७ ॥
 न परं वइज्जासि अयं कुसीले, जेणं च कुप्पिज्ज न तं वइज्जा ।
 जाणिअ पत्तेअं पुन्नपावं अत्ताणं न समुक्कसे जे स भिक्खू ॥ १८ ॥
 न जाइमत्ते न य रूवमत्ते, न लाभमत्ते न सुएण मत्ते ।
 मयाणि सव्वाणि विवज्जइत्ता, धम्मज्झाणरए जे स भिक्खू ॥ १९ ॥
 पवेअए अज्जपयं महामुणी, धम्मे ठिओ ठावयइ परं पि ।
 निक्खम्म वज्जिज्ज कुसीललिंगं, न आवि हासं कुहए जे स भिक्खू ॥ २० ॥
 तं देहवासं असुइं असासयं, सया चए निचहिअट्ठिअप्पा ।
 छिंदित्तु जाइमरणस्स बंधणं, उवेइ भिक्खू अपुणागमं गइं ॥ २१ ॥
 त्ति बेमि ॥ इअ भिक्खु नामं दसमज्झयणं समत्तं ॥

॥ अह रइवक्का पढमा चूलिआ ॥

इह खलु भो पढइएण उप्पण्णदुक्खेणं संजमे अरइसमावन्नचित्तेणं ओहाणुप्पेहिणा अणोहाइएणं
 चेव हयरस्सिगयंकुसपोयपडागाभूआइं इमाइं अट्टारस ठाणाइं सम्मं संपडिलेहिअवाइं भवंति । तंजहा
 हं भो ! दुस्समाइ दुप्पजीवी ॥ १ ॥ लहुसगा इत्तरिआ गिहीणं कामभोगा ॥ २ ॥ भुज्जो अ साय-
 बहुला मणुस्सा ॥ ३ ॥ इमे अ मे दुक्खे न चिरकालोवट्ठाइ भविस्सइ ॥ ४ ॥ ओमजणपुरक्कारे
 ॥ ५ ॥ वंतस्स य पडिआयणं ॥ ६ ॥ अहरगइवासोवसंपया ॥ ७ ॥ दुल्लहे खलु भो ! गिहीणं धम्मे
 गिहवासमज्जे वसंताणं ॥ ८ ॥ आयंके से वहाय होइ ॥ ९ ॥ संकप्पे से वहाय होइ ॥ १० ॥ सोवकेसे
 गिहवासे, निरुक्केसे परिआए ॥ ११ ॥ बंधे गिहवासे, मुक्खे परिआए ॥ १२ ॥ सावज्जे गिहवासे,
 अणवज्जे परिआए ॥ १३ ॥ बहुसाहारणा गिहोणं कामभोगा ॥ १४ ॥ पत्तेअं पुन्नभावं ॥ १५ ॥
 अणिच्चे खलु भो ! मणुआण जीविए कुसग्गजलविंदुचंचले ॥ १६ ॥ बहं च खलु भो ! पावं कम्मं पगडं
 ॥ १७ ॥ पावाणं च खलु भो ! कडाणं कम्माणं पुविं दुच्चिन्नाणं दुप्पडिकंताणं वेइत्ता मुक्खो नत्थि
 अवेइत्ता तवसा वा झोसइत्ता ॥ १८ ॥ अट्टारसमं पयं भवइ, भवइ अ इत्थ सिलोगो—
 जया य चयई धम्मं, अणज्जो भोगकारणा । से तत्थ मुच्छिए बाले, आयइं नावबुज्जई ॥ १ ॥
 जया ओहाविओ होइ, इंदो वा पडिओ छमं । सबधम्मपरिबभट्ठो, स पच्छा परितप्पइ ॥ २ ॥
 जया अ वंदिमो होइ, पच्छा होइ अवंदिमो । देवया व चुआ ठाणा, स पच्छा परितप्पइ ॥ ३ ॥
 जया अ पूइमो होइ, पच्छा होइ अपूइमो, राया व रज्जपव्वभट्ठो, स पच्छा परितप्पइ ॥ ४ ॥

जया अ माणिमो होइ, पच्छाहोइ अमाणिमो । सिद्धिब कवडे छूटो, स पच्छा परितप्पइ ॥ ५ ॥
जया अ थेरओ होइ, समइकंतजुवणो । मच्छुव गलिं गलिता, स पच्छा परितप्पइ ॥ ६ ॥
जया अ कुकुडंबस्स, कुतत्तीहिं विहम्मइ । हत्थी व बंधणे बद्धो, स पच्छा परितप्पइ ॥ ७ ॥
पुत्तदारपरिकिन्नो, मोहसंताणसंतओ । पंकोसन्नो जहा नागो, स पच्छा परितप्पइ ॥ ८ ॥
अज्ज आहं गणी हुंतो, भाविअप्पा बहुस्सुओ । जइ हंरमतो परिआए, सामन्ने जिणदेसिए ॥ ९ ॥
देवलोगसमाणो अ, परिआओ महेसिणं । रयाणं, अरयाणं च, महानरयसारिसो ॥ १० ॥

अमरोवमं जाणिअ सुक्खमुत्तमं, रयाण परिआए तहारयाणं ।
निरओवमं जाणिअ दुक्खमुत्तमं, रमिज्ज तम्हा परिआयपंडिए ॥ ११ ॥
धम्माउ भट्ठं सिरिओववेयं, जन्नगि विज्झायमिवप्पतेअं ।
हीलंति णं दुव्विहिअं कुसीला, दादुद्धिअं घोरविसं व नागं ॥ १२ ॥
इहेव धम्मो अयसो अकित्ती, दुन्नामधिज्जं च पिहुज्जणम्मि ।
चुअस्स धम्माउ अहम्मसेविणो, संभिन्नवित्तस्स य हिट्ठओ गई ॥ १३ ॥
भुंजितु भोगाइं पसज्ज चेअसा, तहाविहं कट्ठु असंजमं बहुं ।
गइं च गच्छे अणहिज्जं अं दुहं, बोही अ से नो सुलहा पुणो पुणो ॥ १४ ॥
इमस्स ता नेरइअस्स जंतुणो, दुहोवणीअस्स किलेसवत्तिणो ।
पलिओवमं झिज्जइ सागरोवमं, किमंग पुण मज्ज इमं मणोदुहं ॥ १५ ॥
न मे चिरं दुक्खमिणं भविस्सइ, असासया भोगपिवास जंतुणो ।
न चे सरीरेण इमेण विस्सइ, अविस्सई जीविअपज्जवेण मे ॥ १६ ॥
जस्सेवमप्पा उ हविज्ज निच्छिओ, चइज्ज देहं न हु धम्मसासणं ।
तं तारिमं नो पइलंति इंदिया, उविति वाया व सुदंसणं गिरिं ॥ १७ ॥
इच्चेव संपस्सिअ बुद्धिमं नरो, आयं उवायं विविहं विआणिआ ।
काएण वाया अट्ट माणसेणं तिगुत्तिगुत्तो जिणवयणमहिट्ठिआसि ॥ १८ ॥
त्ति बेमि ॥ इअ रइवक्का पढमा चूला समत्ता ॥ १ ॥

॥ अह विवित्तचरिया बीआ चूलिआ ॥

चूलिअ तु पवक्खामि, सुअं केवलिभासिअं । जं सुणित्तु सुपुण्णाणं, धम्मे उप्पज्जए मई ॥ १ ॥
अणुसोअपट्टिए बहुज्जणम्मि परिसोअलद्धलक्खेणं । पडिसोअमेव अप्पा, दायवो होउकामेणं ॥ २ ॥
अणुसोअसुहो लोओ, पडिसोओ आसवो सुविहिआणं । अणुसोओ संसारो, पडिसोओ तस्स उत्तारो ॥ ३ ॥
तम्हा आयारपरकमेण संवरसमाहिबहुलेणं । चरिआ गुणा अ नियमा अ, हुंति साहूण दट्ठवा ॥ ४ ॥
अणिअवासो समुआणचरिआ, अन्नायउंछं पयरिकया अ ।
अप्पोवही कलहविवज्जणा अ, विहारचरिआ इसिणं पसत्था ॥ ५ ॥
आइन्नओ माणविवज्जणा अ, ओसन्नदिट्ठाहडभत्तपाणे ।

संसद्दकप्पेण चरिज्ज भिक्खु, तज्जायसंसद्द जई जइज्जा ॥ ६ ॥
 अमज्जमंसासि अमच्छरीआ, अभिक्खणं निविगइं गया अ ।
 अभिक्खणं काउस्सग्गकारी, सज्झायजोगे पयओ हविज्जा ॥ ७ ॥
 न पडिन्नविज्जा सयणासणाइं, सिज्जं निसिज्जं तह भत्तपाणं ।
 गामे कुले वा नगरे व देसे, ममत्तभावं न कहिं पि कुज्जा ॥ ८ ॥
 गिहिणो वेआवडिअं न कुज्जा, अभिवायणं वंदणपूअणं वा ।
 असंकिलिट्ठेहिं समं वसिज्जा, मुणी चरित्तस्स जओ न हाणी ॥ ९ ॥
 न या लभेज्जा निउणं सहायं, गुणाहिअं वा गुणओ समं वा ।
 इक्को वि पावाइं विवज्जयंतो, विहरिज्ज कामेसु असज्जमाणो ॥ १० ॥
 संवच्छरं वा वि परं पमाणं, बीअं च वासं न तहिं वसिज्जा ।
 सुत्तस्स मग्गेण चरिज्जभिक्खु, सुतस्स अत्थो जह आणवेइ ॥ ११ ॥
 जो पुव्वरत्तावररत्तकाले, संपिक्खए अप्पगमप्पएणं ।
 किं मे कडं किं च मे किच्चसेसं, किं सक्कणिज्जं न समायरामि ॥ १२ ॥
 किं म परा पासइ किंच अप्पा, किं वाहं खलिअं न विवज्जयामि ।
 इच्चेव सम्मं अणुपासमाणो, अणागयं नो पडिबंघ कुज्जा ॥ १३ ॥
 जत्थेव पासे कइ दुप्पउत्तं, काएण वाया अदु माणसेण ।
 तत्थेव धीरो पडिसाहरिज्जा, आइन्नओ खिप्पमिव कखलीणं ॥ १४ ॥
 जस्सेरिसा जोग जिइदिअस्स, धिईमओ सप्पुरिसस्स निच्चं ।
 तमाहु लोए पडिबुद्धजीवी, सो जीअइ संजमजीविणं ॥ १५ ॥
 अप्पा खलु सययं रक्खिअव्वो, सव्विदिएहिं सुसमाहिएहिं ।
 अरक्खिओ जाइपहं उवेइ, सुरक्खिओ सव्वदूहाण मुच्चइ ॥ १६ ॥
 त्ति बेमि ॥ इअ विवित्तचरिआ बीआ चूला समत्ता ॥

॥ इअ दसवेआलिअं सुत्तं समत्तं ॥





॥ श्रीमद्देवऋद्धिगणिक्षमाश्रमणप्रणीत ॥

श्री नन्दीसूत्र मूलपाठः ।

जयइ जग जीव जोणी वियाणओ । जगगुरू जगाणंदो ॥ जगणाहो जगबंभू, जयइ जगप्पि-
यामहोभयवं ॥ १ ॥ जयइ सुआणं पभवो । तित्थथराणं अपच्छिमो जयइ ॥ जयइ गुरूलोगाणं ।
जयइ महप्पा महावीरो ॥ २ ॥ भइं सव्वं जगुज्जोयगस्स । भइं जिणस्स वीरस्स ॥ भइं सुरासुरनमं-
सियस्स । भइं धुयरयस्स ॥ ३ ॥ गुणभवणगहण । सुयरयण भरियदंसणविसुद्धरत्थागा संघ नगर
भइं ते । अखंड चारित्तपागारा ॥ ४ ॥ संजम तव तुंवारयस्स । नमो सम्मत्त पारियल्लस्स ॥
अप्पडिचकस्स जओ होउ सया संघचकस्स ॥ ५ ॥ भइं सील पडागूसियस्स । तव नियम तुरय
जुत्तस्स ॥ संघरहस्स भगवओ । सज्झाय सुनंदिघोसस्स ॥ ६ ॥ कम्मरय जलोह विणिग्गयस्स ।
सुयरयण दीहनालस्स ॥ पंच महव्वय थिरकन्नियस्स । गुणकेसरालस्स ॥ ७ ॥ सावग जण महुअरि
परिवुडस्स । जिण सूर तेय बुद्धस्स ॥ संघपउमस्स भइं । समण गण सहस्स पत्तस्स ॥ ८ ॥ तव
संजम मयलंछण । अकिरिय राहुमुह दुद्धरिसनिच्चं । जय संघ चंद । निम्मल सम्मत्त विसुद्ध जो-
ण्हागा ॥ ९ ॥ पर तित्थिय गह पढ नासगस्स । तवतेय दित्त लेसस्स ॥ नाणु ज्जोयस्स जए भइं
दम संघ सूरस्स ॥ १० ॥ भइं धिइ वेला परिगयस्स । सज्झाय जोग मगरस्स ॥ अक्खोहस्स भग-
वओ । संघ समुदस्स रुंदस्स ॥ ११ ॥ सम्म हंसण वर वहर दढ रूढ गाढावगाढ पेढस्स ॥ धम्म
वररयण मंडिय चामीयर मेहलागस्स ॥ १२ ॥ निय मूसिय कणय सिलायलुज्जल जलंत चित्तकू-
डस्स ॥ नंदण वण मणहर सुरभि सील गंधुद्धुमायस्स ॥ १३ ॥ जीवदया सुंदर कंद रुद्धरिय
मुणिवर मइंद इन्नस्स ॥ हेउ सय धाउ पगलंत रयणदित्तोसहि गुहस्स ॥ १४ ॥ संवर वर जल पग
लिय उज्झर पविगाय माणहारस्स ॥ सावग जण पउर रवंत मोर नच्चंत कुहरस्स ॥ १५ ॥ विणय
नय पवर मुणिवर फुरंत विज्जुज्जलंत सिहरस्स । विविह गुण कप्प रुक्खग फलभर कुसुमाउल
वणस्स ॥ १६ ॥ नाण वर रयण दिप्पंत कंत वेरुलिय विमल चूलस्स ॥ वंदामि विणय पणओ
संघ महामंदर गिरिस्स ॥ १७ ॥ गुण रयणुज्जल कडयं सील सुगंधि तव मंडिउहेसं । सुयवारसं-
गसिहरं संघ महामंदरं वंदे ॥ १८ ॥ नगर रह चक्र पउमे चंदे सूरि समुद् मेरुम्मि ॥ जो उवमि-
जइ सययं तं संघगुणायरं वंदे ॥ १९ ॥ वंदे उस्सभं अजियं संभव मभिनंदण सुमइ सुप्पंभ सुपासं ॥

ससि पुष्पदंत सीयल सिजंसं वासुपुजं च ॥ २० ॥ विमल मणंत य धम्मं सन्ति कुंथुं अरं च मल्लि
 च ॥ मुनिसुवय नमिनेमिं पासं तह वद्धमाणं च ॥ २१ ॥ पढमत्थि इंदभूइ बीए पुणहोइ अग्गिभू-
 इत्ति ॥ तईए य वाउभूई तओ वियत्ते सुहम्मेष ॥ २२ ॥ मंडिअ मोरिय पुत्ते अकंपिऐ चेव अयल
 भायाय ॥ मे यज्जेय पहासेय गणहरा हुंति वीरस्स ॥ २३ ॥ निव्वुइ पह सासणयं जयइ सया सब
 भाव देसणयं ॥ कु समय मय नासणयं जिणिंदवर वीर सासणयं ॥ २४ ॥ सुहम्मं अग्गिवेसाणं जंबु-
 नामं च कासवं पभवं ॥ कच्चायणं वंदे वच्छं सिज्जेभवं तहा ॥ २५ ॥ जसभइ तुंगियं वंदे संभूयं
 चेव माठरं ॥ भइबाहुं च पाइन्नं थूलभइं च गोयमं ॥ २६ ॥ ऐलावच्चसगोत्तं वंदामि महागिरिं
 सुहत्तिं च ॥ तत्तो कोसियगोत्तं बहुलस्स सरिब्वं वन्दे ॥ २७ ॥ हारिय गुत्तं साइं च वंदिमो
 हारियं च सामज्जं ॥ वन्दे कोसिय गोत्तं संडिल्लं अज्ज जीयधरं ॥ २८ ॥ तिसमुद्दखायकित्तिं दीव
 समुद्देसु गहिय पेयालं ॥ वंदे अज्ज समुद्दं अक्खुभिय समुद्दगंभीरं ॥ २९ ॥ भणगं करगं झरगं
 पभावगं णाणदंसण गुणाणं ॥ वंदामि अज मंगुं सुय सागर पारगं धीरं ॥ ३० ॥ वंदामि अज्ज धम्मं
 तत्तो वंदे य भइ गुत्तं च ॥ तत्तोय अज्ज वइरं तव नियम गुणेहिं वइरं समं ॥ ३१ ॥ वंदामि अज्ज
 रक्खिय खमणे रक्खिय चारित्तं सबस्से ॥ रयण करडंग भूओ अणुओगो जेहिं ॥ ३२ ॥ नाणम्मि
 दंसण म्मिय तव विणए णिच्च काल मुज्जुत्तं ॥ अज्ज नंदिलखमणं सिरसा वंदे पसन्नमणं ॥ ३३ ॥
 वड्डु वायगवंसो जलवंसो अज्ज नागहत्थीणं ॥ वागरण करण भंगिय कम्मपयडी पहाणाणं ॥ ३४ ॥
 जच्चजण धाउ समप्पहाण मुहिय कुवलय निहाणं ॥ वड्डु वायगवंसो रेवइनक्खत्त नामाणं ॥ ३५ ॥
 अयलपुरा णिक्खंते कालियसुय आणुओगिए धीरे ॥ बंभदीवगसीहे वायगपय मुत्तमं पत्ते ॥ ३६ ॥
 जेसिं इमो अणु ओगो पयरइ अज्जाविअड्डुभरहम्मि ॥ बहु नयर निग्गय जसे ते वंदे खंदिलाय-
 रिए ॥ ३७ ॥ तत्तो हिमवन्त महंत विक्रमे धिइ परक्कम मणंते ॥ सज्झाय मणंतधरे हिमवंते वंदि-
 मो सिरसा ॥ ३८ ॥ कालिय सुय अणु ओगस्स धारए धारए य पुव्वाणं ॥ हिमवंत खमा समणे
 वंदे णागज्जुणायरिये ॥ ३९ ॥ मिउमहव संपन्ने आणुपुव्वि वायगतत्तं पत्ते ॥ ओहसुय समायारे
 नाज्जुण वायए वंदे ॥ ४० ॥ गोविंदाणं पि नमो अणुओगे विउल धारिणिं दाणं ॥ णिच्चं खंति
 दयाणं परुवणे दुल्लभिं दाणं ॥ ४१ ॥ तत्तो य भूयदिन्नं निच्चं तव संजमे अनिव्विण्णं ॥ पंडिय
 जण सामणं वंदामो संजम विहिण्णु ॥ ४२ ॥ करकणगतविय चंपग विमउलवर कमल गब्भ
 सरिवन्ने ॥ भविय जणहिययदइए दयागुण विसारए धीरे ॥ ४३ ॥ अड्डु भरहप्पहाणे बहुविह सज्झाय
 सुमुणिय पहाणे ॥ अणुओगिय वर वसभे नाइल कुल वंसनंदिकरे ॥ ४४ ॥ भूयहियअपगब्भे वंदेऽहं
 भूयदिन्न मायरिए ॥ भवभय वुच्छेय करे सीसे नागज्जुण रिसीणं ॥ ४५ ॥ सुमुणिय निच्चा निच्चं
 सुमुणिय सुत्तत्थ धारयं वन्दे ॥ सव्भावुव्भावणया तत्थं लोहिच्चणामाणं ॥ ४६ ॥ अत्थ महत्थ-
 क्खाणिं सुसमण वक्खाण कइण निव्वाणिं ॥ पयईए महुरवाणिं पयओ पणमामि दूसगणिं ॥ ४७ ॥
 तव नियम सच्च संजम विणयज्जव खंति महवरयाणं ॥ सील गुणगहियाणं अणुओग जुगप्पहाणाणं
 ॥ ४८ ॥ सुकुमाल कोमल तले तेसिं पणमामि लक्खण पसत्थे पाए पावयणीणं पडिच्छ सय एहि
 पणि वइए ॥ ४९ ॥ जे अन्ने भगवन्ते कालिय सुय आणु ओगिए धीरे ॥ ते पणमिऊण सिरसा
 नागस्स परूवणं वोच्छं ॥ ५० ॥

इति ।

१ सेल-घण, २ कुडग, ३ चालणि, ४ परिपूणग, ५ हंस, ६ महिस, ७ मेसे य, ८ मसग, ९ जल्लग, १० बिराली जाहग, ११ गो, १२ मेरी आभीरी ॥ ५१ ॥

“सा समासओ तिविहा पन्नत्ता तंजहा जाणिया, अजाणिया, दुवियड्डा” जाणिया जहा खीर-मिव, जहा हंसा जे घुट्टन्ति इह गुरुगुण समिद्धा दोसे य विवज्जंति तं जाणसु जाणियं परिसं ॥ ५२ ॥ अजाणिया जहा-जा होइ पगइमहुरा मियछावय सीह कुक्कुडय भूआ । रयणमिव असंठविया । अजाणिया साभवे परिसा ॥ ५३ ॥ दुवियड्डा जह-नय कथइ निम्माओ न य पुच्छइ परिभवस्स दोसेणं । वत्थिववायपुण्णो फुट्टइ गामिल्लयवियड्डो दुवियड्डो ॥ ५४ ॥ (सूत्र) नाणं पञ्चविहं पन्नत्तं, तंजहा-आभिणि बोहियनाणं सुयनाणं, ओहिनाणं, मणपज्जवनाणं, केवलनाणं ॥ १ ॥ तं समासओ दुविहं पण्णत्तं, तंजहा-पच्चक्खं च परोक्खं च ॥ सू० २ ॥ से किं तं पच्चक्खं ? पच्चक्खं दुविहं-पण्णत्तं, तंजहा इंदियपच्चक्खं । नोइंदियपच्चक्खं च ॥ सू० ३ ॥ से किं तं इंदिय पच्चक्खं ? इंदिय-पच्चक्खं पञ्चविहं पण्णत्तं, तंजहा-सो इंदियपच्चक्खं । चविंखदिय पच्चक्खं । घाणिंदिय पच्चक्खं । जिड्ढिंदिय पच्चक्खं । फासिंदिय पच्चक्खं । सेतं इंदियपच्चक्खं ॥ सू० ४ ॥ से किं तं नोइंदियप-च्चक्खं ? नोइंदियपच्चक्खं तिविहं पण्णत्तं तंजहा-ओहिनाण पच्चक्खं । मणपज्जवनाण पच्चक्खं । केवलनाण पच्चक्खं ॥ ५ ॥ से किं तं ओहिनाण पच्चक्खं ? ओहिनाण पच्चक्खं दुविहं पण्णत्तं, तंजहा-भवपच्चइयं च खा ओवसमियं च ॥ ६ ॥ से किं तं भवपच्चइयं ? भवपच्चइयं दुण्हं, तंजहा-देवाणय नेरइयाणय ॥ ७ ॥ से किं तं खा ओवसमियं ? स्वा ओवसमयं दुण्हं, तंजहा-मणूसाण य पंचेदिय तिरिक्ख जोणियाण य । को हेऊ खाओवसमियं ? खाओवसमियं तयावरणि ज्ञाणं कम्माणं उदिण्णाणं खएणं अणुदिण्णाणं उवसमेणं ओहिनाणं समुप्पज्जइ ॥ सू० ८ ॥ अहवा गुण-

१ पड्विन्नस्स अणगारस्स ओहिनाणं समुप्पज्जइ तं समासओ छविहं पण्णत्तं, तंजहा-आणुगामियं, २ अणाणुगामियं, ३ बड्डमाणयं, ४ हीयमाणयं, ५ पड्विवाइयं, ६ अपड्विवाइयं ॥ ६ ॥ से किं तं आणुगामियं आणुगामियं ओहिनाणं दुविहं पण्णत्तं, तंजहा-अंतगयं च मज्झगयं च । से किं तं अंतगयं ? अंतगयं तिविहं पण्णत्तं तंजहा पुरओ अंतगयं ? मग्गओ अंतगयं । पासओ अंतगयं से किं तं पुरओ अंतगयं ? पुरओ अंतगयं-से जहा नामए केइ पुरिसे उक्कवा चड्डुलियं वा अलायं वा मणिं वा पईवं वा जोइं वा पुरओ काउं पणुल्लेमाणे २ गच्छेज्जा, से तं पुरओ अंतगयं । से किं तं मग्गओ अंतगयं ? मग्गओ अंतगयं से जहानामए केइ पुरिसे उक्कं वा चड्डुलियं वा अलायं वा मणिं वा पईवं वा जोइं वा मग्गओ काउं अणुल्लेमाणे २ गच्छिज्जा, से तं अंतगयं । से किं तं पासओ अंतगयं ? पासओ अंतगयं से जहानामए केइ पुरिसे उक्कं वा चड्डुलियं वा अलायं वा मणिं वा पईवं वा जोइं वा पासओ काउं परिकट्ठे माणे २ गच्छिज्जा, से तं पासओ अंतगयं से तं अंत-गयं । से किं तं मज्झगयं ? मज्झगयं से जहा नामए केइ पुरिसे उक्कं वा चड्डुलियं वा अलायं वा

मणिं वा पईवं वा जोइं वा मत्थए काउं समुबह माणे २ गच्छिज्जा सेतं मज्झगयं । अंतगयस्स मज्झगयस्स य को पइविसेसो । पुरओ अंतगएणं ओहि नाणेणं पुरओ चेव संखिज्जाणि वा असंखे-
ज्जाणि वा जोयणाइं जाणइ पासइ मग्गओ अंतगएणं ओहिनाणेणं मग्गओ चेव संखिज्जाणि वा असं-
खिज्जाणि वा जोयणाइं जाणइ पासइ । पासओ अंतगएणं ओहिनाणेणं पासओ चेव संखिज्जाणि वा
असंखिज्जाणि वा जोयणाइं जाणइ पासइ । मज्झगएणं ओहिनाणेणं सबओ समंता संखिज्जाणि वा
असंखिज्जाणि वा जोयणाइं जाणइ पासइ । से तं अणुगामियं ओहिनाणं ॥ १० ॥ से किं तं अणा-
णुगामियं ओहिनाणं अणाणु गामियं ओहिनाणं से जहानामए केइ पुरिसे एगं महंतं जोइट्ठाणं काउं
तस्सेव जोइट्ठाणस्स परिपेरं तेहिं परिपेरंतेहिं, परिघोले माणे परिघोलेमाणे तमेव जोइट्ठाणं पासइ,
अन्नत्थगए न जाणइ न पासइ एवामेव अणाणुगामियं ओहिनाणं जत्थेव समुप्पज्जइ तत्थेव संखे-
ज्जाणि वा असंखेज्जाणि वा संबद्धानि वा असंबद्धानि वा जोयणाइं जाणइ पासइ; अन्नत्थगएण
पासइ, से तं अणाणुगामियं ओहिनाणं ॥ ११ ॥ से किं तं बड्डमाणयं ओहिनाणं ? बड्डमाणयं
ओहिनाणं पसत्थेसु अज्झवसायट्ठाणेसु बड्डमाणस्स बड्डमाण चरित्तस्स । विसुज्झमाणस्स विसुज्झ-
माण चरित्तस्स । सबओ समंता ओहि बड्डइ—

जावइआ तिसमयाहारगस्स सुहुमस्स पणगजीवस्स ॥ ओगाहणा जहन्ना ओहीखित्तं जहन्नं
तु ॥ ५५ ॥ सब बहु अगणि जीवा निरंतरं जत्तियं भरिज्जंसु ॥ खित्तं सबदिसागं परमोही खेत्तनि-
दिट्ठो ॥ ५६ ॥ अंगुलमावलियाणं भाग मसंखिज्ज दोसु संखिज्जा ॥ अंगुलमावलियंतो आवलिया
अंगुल पुहुत्तं ॥ ५७ ॥ हत्थम्मि सुहुत्तंतो, दिवसंतो गाउयम्मि बोद्धव्वो ॥ जोयण दिवसपुहुत्तं,
पक्खंतो पन्नवीसाओ ॥ ५८ ॥ भरहम्मि अट्ठमासो, जम्बुदीवम्मि साहिआ मासा ॥ वासं च
मणुय लोए, वासपुहुत्तं च रुयगम्मि ॥ ५९ ॥ संखिज्जम्मि उ काले, दीवमसुद्धावि हुंति संखिज्जा ॥
कालम्मि असंखिज्जे, दीवसमुद्धा उ भइयव्वा ॥ ६० ॥ काले चउण्हवुद्धी, कालो भइयव्वु खित्त
वुद्धीए ॥ बुद्धीए पव्वपज्जव, भइयव्वा खित्तकाला उ ॥ ६१ ॥ सुहुमो य होइ कालो, तत्तो सुहुम-
यरं हवइ खित्तं अंगुल सेढी मित्ते, ओसप्पिणिओ असंखिज्जा ॥ ६२ ॥ से तं बड्डमाणयं ओहिनाणं
सू ॥ १२ ॥ से किं तं हीयमाणयं ओहिनाणं ? हीयमाणयं ओहिनाणं अप्पसत्थेहिं अज्झवसायट्ठा-
णेहिं बड्डमाणस्स बड्डमाणचरित्तस्स संकिलिस्स माणस्स संकिलिस्समाणचरित्तस्स सबओ समन्ता
ओही परिहायइ से तं हीयमाणयं ओहिनाणं ॥ १३ ॥ से किं तं पडिवाइ ओहिनाणं ? पडिवाइ
ओहिनाणं जहण्णेणं अंगुलस्स असंखिज्जय भागं वा संखिज्जय भागं वा बालगं वा बालग पुहुत्तं
वा लिक्खं वा लिक्खपुहुत्तं वा, जूयं वा जूयंपुहुत्तं वा, जवं वा जव पुहुत्तं वा । अंगुलं वा अंगुल-
पुहुत्तं वा । पायं वा पायपुहुत्तं वा । विहत्थिं वा विहत्थि पुहुत्तं वा । रयणिं वा रयणि पुहुत्तं वा ।
कुच्छिं कुच्छिपुहुत्तं वा, धणुं वा धणुपुहुत्तं वा । माउअं वा गाउयपुहुत्तं वा । जोयण वा जोयणं
पुहुत्तं वा । जोअणसयं वा जोयणसय पुहुत्तं वा जोयण सहस्सं वा जो यणसहस्स पुहुत्तं वा । जो-
यणलक्खं वा जोयणलक्ख पुहुत्तं वा । जोयणकोडिं वा जोयणकोडाकोडि पुहुत्तं वा । जोयणकोडा-
कोडिं वा जोयणकोडाकोडि पुहुत्तं वा । [जो अणसंखिज्जं वा जो अणसंखिज्ज पुहुत्तं वा जो अण

असंखेज्जंवा जो अणअसंखेज्जपुहुंचंवा ।] उक्कोसेणं लोमं वा पासि चाणं पडिवाइजा । से तं पडिवाइ ओहिनाणं ॥ १४ ॥ से किं तं अपडिवाइ ओहिनाणं । अपडिवाइ ओहिनाणंजेणं अलोगस्स एगमवि आगासपएसं जाणइ पासइ तेण परं अपडिवाइ ओहिनाणं । से तं अपडिवाइ ओहिनाणं ॥ १५ ॥ तं समासओ चउव्विहं पण्णत्तं, तंजहा दव्वओ, खित्तओ, कालओ, भावओ । तत्थ दव्व ओ णं ओहिनाणी जहन्नेणं अणंताइं रूविदव्वाइं जाणइ पासइ उक्कोसेणं सवाइं रूविदव्वाइं जाणइ पासइ, खित्तओणं ओहिनाणी जहन्नेणं अंगुलस्स असंखिज्जय भागं जाणइ पासइ, उक्कोसेणं असंखि ज्जाइं अलोमे लोमपमाणा मित्ताइं खंडाइं जाणइ पासइ, कालओ णं ओहिनाणी जहन्नेणं आवलियाए असंखिज्जय भागं जाणइ पासइ, उक्कोसेणं असंखिज्जाओ उस्सप्पिणीओ अवसप्पिणीओ अईय मणागयं च कालं जाणइ, पासइ, भावओ णं ओहिनाणी जहन्नेणं अणंते भावे जाणइ पासइ, उक्कोसेणवि अणंते भावे जाणइ पासइ । सव्व भावाण मणंत भागं भावे जाणइ पासइ ॥ १६ ॥ ओही भवपच्चइओ गुणपच्चइओ य वणिणओ दुविहो । तस्स य बहू विगप्पा दव्वे खित्ते य कालेय । नेरइयदेवतित्थंकरा य ओहिस्सव्वाहिरा हुंति । पासंति सव्वओ खलु सेसा देसेण पासंति । से तं ओहिनाणपच्चक्खं से किं तं मणपज्जवनानं ? मणपज्जवनाने णं भंते ! किं मणुस्साणं उप्पज्जइ अमणुस्साणं ? गोयमा ! मणुस्साणं नो अमणुस्साणं ? जइमणुस्साणं किं संमुच्छिममणुस्साणं गब्भवकंतिय मणुस्साणं ? गोयमा ? नोसंमुच्छिममणुस्साणं उप्पज्जइ गब्भवकंतियमणुस्साणं । जइगब्भवकंतियमणुस्साणं किं कम्मभूमिय गब्भवकंतिय मणुस्साणं, अकम्मभूमिय गब्भवकंतिय मणुस्साणं, अन्तरदीवगगब्भवकंतिय मणुस्साणं, गोयमा ? कम्मभूमिय गब्भवकंतियमणुस्साणं, नो अकम्मभूमिय गब्भवकंतियमणुस्साणं, नो अन्तरदीवग गब्भवकंतियमणुस्साणं जइ कम्मभूमियगब्भवकंतियमणुस्साणं, किं संखिज्जवासाउयकम्मभूमिय गब्भवकंतियमणुस्साणं असंखिज्जवासाउयकम्मभूमिय गब्भवकंतिय मणुस्साणं ? गोयमा ? संखेज्जवासाउय कम्मभूमिय गब्भवकंतिय मणुस्साणं, नो असंखेज्ज वासाउय कम्मभूमिय मणुस्साणं । जइ संखेज्ज वासाउय कम्मभूमिय गब्भवकंतिय मणुस्साणं, किं पज्जत्तग संखेज्जवासाउयकम्मभूमिय गब्भवकंतिय मणुस्साणं, अपज्जत्तग संखेज्ज वासाउय कम्मभूमिय गब्भवकंतिय मणुस्साणं ? गोयमा ! पज्जत्तग संखेज्ज वासाउय कम्मभूमिय गब्भवकंतिय मणुस्साणं, नो अपज्जत्तग संखेज्ज वासाउय कम्मभूमिय गब्भवकंतिय मणुस्साणं । जइ पज्जत्तग संखेज्ज वासाउय कम्मभूमिय गब्भवकंतिय मणुस्साणं किं सम्मदिट्ठि पज्जत्तग संखेज्ज वासाउय कम्मभूमिय गब्भवकंतिय मणुस्साणं, मिच्छदिट्ठि पज्जत्तग संखेज्जवासाउय कम्मभूमिय गब्भवकंतिय मणुस्साणं, सम्मामिच्छदिट्ठि पज्जत्तग संखेज्ज वासाउय कम्मभूमिय गब्भवकंतिय मणुस्साणं ? गोयमा ! सम्मदिट्ठि पज्जत्तग संखेज्जवासाउय कम्मभूमिय गब्भवकंतिय मणुस्साणं नो मिच्छदिट्ठि पज्जत्तग संखेज्ज वासाउय कम्मभूमिय गब्भवकंतिय मणुस्साणं, नो सम्मामिच्छदिट्ठि पज्जत्तग संखेज्ज वासाउय कम्मभूमिय गब्भवकंतिय मणुस्साणं, जइ सम्मदिट्ठिपज्जत्तग संखेज्ज वासाउय कम्मभूमिय गब्भवकंतिय मणुस्साणं किं संजय सम्मदिट्ठि पज्जत्तग संखेज्ज वासाउय कम्मभूमिय गब्भवकंतिय मणुस्साणं, असंजय सम्मदिट्ठि पज्जत्तग संखेज्ज वासाउय कम्मभूमिय गब्भवकंतिय मणुस्साणं । संजया संजय सम्मदिट्ठि पज्जत्तग संखेज्ज वासाउय कम्मभूमिय गब्भवकंतिय मणु-

स्साणं ? गोयमा ! संजय सम्महिद्धि पज्जत्तग संखेज्ज वासाउय कम्मभूमिय गब्भवकंतिय मणु-
 स्साणं, नो असंजय सम्महिद्धि पज्जत्तग संखेज्ज वासाउय कम्मभूमिय गब्भवकंतिय मणुस्साणं ।
 नो संजयासंजय सम्महिद्धि पज्जत्तग संखेज्जवासाउय कम्मभूमिय गब्भवकंतिय मणुस्साणं । जइ
 संजय सम्महिद्धि पज्जत्तग संखेज्ज वासाउय कम्मभूमिय गब्भवकंतिय मणुस्साणं किं पमत्त संजय
 सम्महिद्धि पज्जत्तग संखेज्ज वासाउय कम्मभूमिय गब्भवकंतिय मणुस्साणं, अपमत्त संजय सम्महिद्धि
 पज्जत्तग संखेज्ज वासाउय कम्मभूमिय गब्भवकंतिय मणुस्साणं ? गोयमा ! अपमत्तसंजय सम्महिद्धि
 पज्जत्तग संखेज्ज वासाउय कम्मभूमिय गब्भवकंतिय मणुस्साणं, नो पमत्त सज्जय सम्महिद्धि
 पज्जत्तग संखेज्ज वासाउय कम्मभूमिय गब्भवकंतिय मणुस्साणं । जइ अपमत्त संजय सम्महिद्धि
 पज्जत्तग संखेज्ज वासाउय कम्मभूमिय गब्भवकंतिय मणुस्साणं, किं इड्डीपत्त अपमत्त संजय सम्महिद्धि
 पज्जत्तग संखेज्ज वासाउय कम्मभूमिय गब्भवकंतिय मणुस्साणं अणिड्डीपत्त अपमत्त संजय सम्म-
 हिद्धि पज्जत्तग संखेज्ज वासाउय कम्मभूमिय गब्भवकंतिय मणुस्साणं ? गोयमा ! इड्डीपत्त अपमत्त
 संजय सम्महिद्धि पज्जत्तग संखेज्ज वासाउय कम्मभूमिय गब्भवकंतिय मणुस्साणं, नो अणिड्डीपत्त
 अपमत्तसंजयसम्महिद्धि पज्जत्तग संखेज्ज वासाउय कम्मभूमिय मणुस्साणं । मणपज्जवनानं ससु-
 प्पज्जइ ॥ सू० ॥ १७ ॥ तं च दुविहं उप्पज्जइ तंजहा उज्जुमई य विउलमई य तं समासओ
 चउब्बिहं पन्नत्तं तंजहा-दवओ, खित्तओ, कालओ, भावओ । तत्थ दवओणं उज्जुमई अणंते अणंत
 एसिए खंधे जाणइ पासइ, तं चेव विउलमई अब्भहियंतराए विउलतराए विसुद्धतराए वितिमिर-
 तराए जाणइ पासइ । खित्तओणं उज्जुमई यजहन्नेणं अंगुलस्स असंखेज्जय भागं उक्कोसेणं अहे
 जाव इमीसे रयणप्पभाए पुढवीए उवरिमहेट्टिल्ले खुड्डग पयरे उड्डं जाव जोइस्स उवरिमतले,
 तिरियं जाव अन्तोमणुस्सस्सखित्ते अड्डाइज्जेसु दीवसमुद्देसु पन्नरस्ससु कम्मभूमिसु तीसाए अकम्म-
 भूमिसु छपन्नाए अन्तरदीवगेसु सन्निपंचेदियाणं पज्जत्तयाणं मणोगए भावे जाणइ पासइ तं चेव
 विउलमई अड्डाईज्जेहिमंगुलेहिं अब्भहियत्तरं विउलतरं विसुद्धतरं वितिमिरतराणं खेत्तं जाणइ पासइ ।
 कालओ णं उज्जुमई जहन्नेणं पलिओवमस्स असंखिज्जयभागं उक्कोसेणवि पलिओवमस्स असंखि-
 ज्जयभागं अतीयमणागयं वा कालं जाणइ पासइ । तं चेव विउलमई अब्भहियतराणं विउलतराणं
 विसुद्धतराणं वितिमिरतराणं जाणइ पासइ । भावओ णं उज्जुमई अणंते भावे जाणइ पासइ, सब-
 भावाणं अणंतभागं जाणइ पासइ । तं चेव विउलमई अब्भहियतराणं विउलतराणं विसुद्धतराणं वि-
 तिमिरतराणं जाणइ पासइ । मणपज्जवनानं पुण जणमणपरिचित्तियत्थपागडणं । माणुसखित्तनिबद्धं
 गुणपच्चइयं चरित्तवओ ॥ ६५ ॥ से तं मणपज्जवनानं सू० ॥ १८ ॥ से किं तं केवलनानं ?
 केवलनानं दुविहं पन्नत्तं, तंजहा-भवत्थकेवलनानं च सिद्धकेवलनानं च । से किं तं भवत्थकेवल-
 नानं ? भवत्थकेवलनानं दुविहं पणत्तं, तंजहा-सजोगिभवत्थकेवलनानं च अजोगिभवत्थकेवलनानं
 च । से किं तं सजोगिभवत्थकेवलनानं ? सजोगिभवत्थकेवलनानं दुविहं पणत्तं, तंजहा-पढम-
 समयसजोगिभवत्थ, केवलनानं च अपढम समय सजोगिभवत्थकेवलनानं च, अहवा, चरमसमयस-
 जोगिभवत्थकेवलनानं च अचरमसमयसजोगिभवत्थकेवलनानं च, से तं सजोगिभवत्थकेवलनानं ।
 से किं तं अजोगिभवत्थकेवलनानं ? अजोगिभवत्थकेवलनानं दुविहं पन्नत्तं, तंजहा-पढमसयअजोगि-

भवत्थकेवलनाणं च अपढमसमयअजोगिभवत्थकेवलनाणं च अहवा चरमसमयअजोगिभवत्थकेवल-
नाणं च अचरमसमयअजोगिभवत्थकेवलनाणं च, से चं अजोगिभवत्थकेवलनाणं, से चं भवत्थके-
वलनाणं ॥ सू० ॥ १९ ॥ से किं तं सिद्धकेवलनाणं? सिद्धकेवलनाणं दुविहं पण्णत्तं, तंजहा—अणं-
तरसिद्धकेवलनाणं च परंपरसिद्धकेवलनाणं च ॥ सू० ॥ २० ॥ से किं तं अणंतरसिद्धकेवलनाणं?
अणंतरसिद्धकेवलनाणं पन्नरसविहं पण्णत्तं, तंजहा—तित्थसिद्धा १, अतित्थसिद्धा २, तित्थयरसिद्धा
३, अतित्थयरसिद्धा ४, सयंबुद्धसिद्धा ५, पचोयबुद्धसिद्धा ६, बुद्धबोहियसिद्धा, ७ इत्थिलिंगसिद्धा
८, पुरिसलिंगसिद्धा ९, नपुंसगलिंगसिद्धा १०, सलिंगसिद्धा ११, अन्नलिंगसिद्धा १२, गिहिलिंग-
सिद्धा १३, एगसिद्धा १४, अणेगसिद्धा १५, से चं अणंतरसिद्धकेवलनाणं ॥ सू० ॥ २१ ॥ से किं
तं परंपरसिद्धकेवलनाणं? परंपरसिद्धकेवलनाणं अणेगविहं पण्णत्तं, तंजहा—अपढमसमयसिद्धा, दुस-
मयसिद्धा, तिसमयसिद्धा, चउसमयसिद्धा, जाव दसमयसिद्धा, संखिज्जसमयसिद्धा, असंखिज्जस-
मयसिद्धा, अणंतसमयसिद्धा, से चं परंपरसिद्धकेवलनाणं, से चं सिद्धकेवलनाणं ॥ तं समासओ
चउविहं पण्णत्तं, तंजहा—दवओ, खित्तओ, कालओ, भावओ । तत्थ दवओ णं केवलनाणी सब्बद-
व्वाइं जाणइ पासइ । खित्तओ णं केवलनाणी सब्बं खित्तं जाणइ पासइ । कालओ णं केवलनाणी सब्बं
कालं जाणइ पासइ । भावओ णं केवलनाणी सब्बे भावे जाणइ पासइ । अह सव्वदव्वपरिणाम,
भावविण्णत्तिकारणमणंतं । सासय मप्पडिवाइ, एगविहं केवलं नाणं ॥ ६६ ॥ सू० ॥ २२ ॥ केव-
लनाणेणऽत्थे, नाउं जे तत्थ पण्णवणजोगे । ते भासइ तित्थयरो, वइजोगसुयं हवइ सेसं ॥ ६७ ॥
से चं केवलनाणं, से चं नोइंदियपच्चक्खं, से चं पच्चक्खनाणं ॥ सू० ॥ २३ ॥ से किं तं परोक्ख-
नाणं? परोक्खनाणं दुविहं पन्नत्तं, तंजहा—आभिणिबोहियनाणपरोक्खं च, सुयनाण परोक्खं च,
जत्थ आभिणिबोहियनाणं तत्थ सुयनाणं, जत्थ सुयनाणं तत्थाभिणिबोहियनाणं, दोऽवि एयाइं
अण्णमण्णमणुगयाइं, तहवि पुण इत्थ आयरिया नाणत्तं पण्णवयंति—अभिनिबुज्झइति आभिणिबोहि-
यनाणं, सुणेइत्ति सुयं, मइपुव्वं जेण सुयं, न मई सुयपुव्विया ॥ सू० ॥ २४ ॥ अविसेसिया मई,
मइनाणं च मइअन्नाणं च । विसेसिया सम्मदिट्ठिस्स मई मइनाणं मिच्छदिट्ठिस्स मई मइणन्नाणं ।
अविसेसियं सुयं सुयनाणं च सुयअन्नाणं च । विसेसियं सुयं सम्मदिट्ठिस्स सुयं सुयनाणं, मिच्छ-
दिट्ठिस्स सुयं सुयअन्नाणं ॥ सू० ॥ २५ ॥ से किं तं आभिणिबोहियनाणं? आभिणिबोहियनाणं
दुविहं पण्णत्तं, तंजहा—सुयनिस्सियं च, अस्सुयनिस्सियं च । से किं तं अस्सुयनिस्सियं? अस्सुयनि-
स्सियं चउव्विहं पण्णत्तं, तंजहा—उत्पत्तिया १ वेणइया २, कम्मया ३, परिणामिया ४ । बुद्धि-
चउव्विहा वुत्ता, पंचमा नोवलब्भइ ॥ ६८ ॥ सू० ॥ २६ ॥ पुव्वमदिट्ठमस्सुयमवेइय, तक्खणवि-
सुद्धगहियत्था । अव्वाहयफलजोगा, बुद्धि उत्पत्तिया नाम ॥ ६९ ॥ भरहसिल १ पणिय २ रुक्खे
३ खुड्ढग ४ पड ५ सरड ६ काय ७ उच्चारे ८ । गय ९ घयण १० गोल ११ खंभे १२, खुड्ढग
१३ मग्गि १४ त्थि १५ पइ १६ पुत्ते १७ ॥ ७० ॥ भरह १ सिल २ मिठ ३ कुक्कुड ४, तिल
५ वालुय ६ हत्थि ७ अगड ८ वणसंडे ९ । पायस १० अइया ११ पत्ते १२, खाडहिला १३
पंच पिअरो य १४ ॥ ७१ ॥ महुसित्थ १८ मुहि १९ अंके २०, य नाणए २१ भिक्खु २२
चेडगनिहाणे २३ सिक्खा २४ य अत्थसत्थे २५, इत्थी य मइं २६ सयसहस्से २७ ॥ ७२ ॥

भरनित्थरणसमत्था, तिवग्गसुत्तत्थगहियपेयाला । उभओलोगफलवई, विणयसमुत्था हवइ बुद्धी ॥ ७३ ॥ निमित्ते १ अत्थसत्थे य २. लेहे ३ गणिए य कूव ५ अस्से ६ य । गद्भ ७ लक्खण ८ गंठी ९, अगए १० रहिए ११ य गणिया १२ य ॥ ७४ ॥ सीया साडी दीहं, च तणं अवस-
 व्वयं च कुंचस्म १३ निव्वोदए १४ य गोणे, घोडगपडणं च रुक्खाओ १५ ॥ ७५ ॥ उवओग-
 दिट्ठसारा, कम्मपसंगपरिघोलणविसाला । साहुकारफलवई, कम्मसमुत्था हवइ बुद्धी ॥ ७६ ॥ हेर-
 णिए १ करिए २, कोलिय ३ डोवे ४ य मुत्ति ५ घय ६ पवए ७ तुनाए ८ वड्डइय ९ पूयइ
 १० घड ११ चित्तकारे १२ य ॥ ७७ ॥ अणुमाणहेउदिट्ठंतसाहिया वयविवागपरिणामा । हिय-
 निस्सेयसफलवई, बुद्धी परिणामिया नाम ॥ ७८ ॥ अभए १ सिट्ठि कुमारे ३, देवी ४ उदिओदए
 हवइ राया ५ साहू य नंदिसेणे ६, धणदत्ते ७ सावग ८ अमच्चे ९ ॥ ७९ ॥ खमए १० अमच्च-
 पुत्ते ११, चाणके १२ चेव थूलभदे १३ य । नासिकसुंदरिनंदे १४ वड्डरे परिणामिया बुद्धी ॥ ८० ॥
 चलणाहण १६ आभंडे १७, मणी १८ य सप्पे १९ य खग्गि २० थूमिंदे २१ । परिणामियबु-
 द्धीए, एवमाई उदाहरणा ॥ ८१ ॥ सेत्तं अस्सुयनिस्सियं । से किं तं सुयनिस्सियं ? सुयनिस्सियं
 चउव्विहं पणत्ते, तंजहा—उग्गहे १ ईहा २ अवाओ ३ धारणा ४ ॥ सू० ॥ २६ ॥ से किं तं
 उग्गहे ? दुविहे पणत्ते, तंजहा—अत्थुग्गहे य वंजणुग्गहे य, ॥ सू० ॥ २७ ॥ से किं तं
 वंजणुग्गहे ? वंजणुग्गहे चउव्विहे पणत्ते, तंजहा—सोइंदियवजणुग्गहे, घाणिंदियवंजणुग्गहे
 जिब्भिंदियवंजणुग्गहे फासिंदियवंजणुग्गहे, से चं वंजणुग्गहे ॥ सू० ॥ ॥ २८ ॥ से किं
 तं अत्थुग्गहे ? अत्थुग्गहे छव्विहे पणत्ते, तंजहा—सोइंदियअत्थुग्गहे, चक्खिंदियअत्थुग्गहे,
 घाणिंदियअत्थुग्गहे, जिब्भिंदियअत्थुग्गहे, फासिंदियअत्थुग्गहे, नोइंदियअत्थुग्गहे ॥ सू० ॥
 ॥ २९ ॥ तस्स णं इमे एगट्ठिया नाणाघोसा नाणावंजणा पंच नामधिज्जा भवन्ति, तंजहा—
 ओगेण्हया, उवधारणया, सवणया, अवलंबणया, मेहा, से तं उग्गहे ॥ सू० ॥ ३० ॥ से किं तं
 ईहा ? छव्विहा पणत्ता, तंजहा—सोइंदियईहा, चक्खिंदियईहा, घाणिंदियईहा, जिब्भिंदियईहा, फा-
 सिंदियईहा, नोइंदियईहा, तीसेणं इमे एगट्ठिया नाणाघोसा नाणा वंजणा पंच नामधिज्जा भवन्ति,
 तंजहा—आभोगणया, मग्गणया, गवेसणया, चिंता, वीमंसा, से तं ईहा ॥ सू० ॥ ३१ ॥ से किं
 तं अवाए ? अवाए छव्विहे पणत्ते, तंजहा—सोइंदियअवाए, चक्खिंदियअवाए, घाणिंदियमवाए
 जिब्भिंदियअवाए, फासिंदियअवाए, नोइंदियअवाए, तस्स णं इमे एगट्ठिया नाणाघोसा नाणावंजणा
 पंच नामधिज्जा भवन्ति, तंजहा—आउट्ठणया, पच्चाउट्ठणया, अवाए, बुद्धी, विण्णाणे, से तं
 अवाए ॥ सू० ३२ ॥ से किं तं धारणा ? धारणा छव्विहा पणत्ता, तंजहा—सोइंदियधारणा, च-
 क्खिंदियधारणा, घाणिंदियधारणा, जिब्भिंदियधारणा, फासिंदियधारणा, नोइंदियधारणा, तीसे णं
 इमे एगट्ठिया नाणाघोसा नाणावंजणा पंच नामधिज्जा भवन्ति, तंजहा—धारणा, धारणा, ठवणा, पड्डा,
 कोट्ठे, से तं धारणा ॥ सू० ॥ ३३ ॥ उग्गहे इक्कसमइए, अंतोमुहुत्तिया ईहा, अंतोमुहुत्तिए अवा-
 ए, धारणा संखेज्जं वा कालं असंखेज्जं वा कालं ॥ सू० ॥ ३४ ॥ एवं अट्ठावीसइविहस्स आभि-
 णिबोहियनाणस्स वंजणुग्गहस्स परूवणं करिस्सामि पडिबोहगदिट्ठंतेण मल्लगदिट्ठंतेण । से किं तं
 पडिबोहगदिट्ठं ? पडिबोहगदिट्ठंतेणसे जहानामए केइ पुरिसे कंचि पुरिसं सुत्तं पडिबोहिज्जा,

अमुगा अमुगति, तत्थ चोयगे पन्नवयं एवं वयासी-किं एगसमयपविट्ठा पुग्गला गहणमागच्छंति ? दुसमयपविट्ठा पुग्गला गहणमागच्छंति ? जाव दससमयपविट्ठा पुग्गला गहणमागच्छंति ? संखिज्ज-समयपविट्ठा पुग्गला गहणमागच्छंति ?, असंखिज्ज समयपविट्ठा पुग्गला गहणमागच्छंति ?, एवं वयंतं चोयगं पण्णवए एवं वयासी-नो एगसमयपविट्ठा पुग्गला गहणमागच्छंति, नो दुसमयपविट्ठा पुग्गला गहणमागच्छंति, जाव नो दससमयपविट्ठा पुग्गला गहणमागच्छंति, नो संखिज्जसमयपविट्ठा पुग्गला गहणमागच्छंति, असंखिज्जसमयपविट्ठा पुग्गला गहणमागच्छंति, से तं पडिबोहगदिट्ठतेणं । से किं तं मल्लगदिट्ठतेणं ? मल्लगदिट्ठतेणं से जहानामए केइ पुरिसे आवागसीसाओ मल्लगं गहाय तत्थेगं उदगबिंदु पक्खेविज्जा, से नट्टे, अण्णेऽवि पक्खिखे सेऽवि नट्टे, एवं पक्खिप्पमाणेसु पक्खिप्पमाणेसु होही से उदगबिंदू, जे णं तं मल्लगं रावेहिइत्ति; होही से उदगबिंदू, जे णं तंसि मल्लगंसि ठाहिति; होही से उदगबिंदू जे णं तं मल्लगं भरिहित; होही से उदगबिंदू, जे णं तं मल्लगं पवाहेहिति; एवामेव पक्खिप्पमाणेहिं पक्खिप्पमाणेहिं अणंतेहिं पुग्गलेहिं जाइ तं वंजणं पूरियं होइ; ताहेहुंति करेइ नो चेव णं जाणइ के वेस सदाइ ? तओ ईहं पविसइ, तओजाणइ अमुगे एस सदाइ; तओ अवायं पविसइ, तओ से उवगयं हवइ, तओ धारणं पविसइ, तओणं धारेइ संखिज्जं वा कालं, असंखिज्जं वा कालं, से जहानामए केइ पुरसे अव्वत्तं सद्धं सुणिज्जा, तेणं सद्धोत्ति उग्गहिए, नो चेव णं जाणइ के वेस सदाइ; तओ ईहं पविसइ, तओ जाणइ अमुगे एस महे, तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखेज्जं वा कालं असंखेज्जं वा कालं । से जहानामए केइ पुरिसे अव्वत्तं रूवं पासिज्जा तेणं रूवति उग्गहिए, नो चेव णं जाणइ के वेस रूवति; तओ ईहं पविसइ, तओ जाणइ अमुगे एस रूवे, तओ अवायं पविसइ, तओ से उवगयं हवइ, तओ धारणं पविसइ, तओ णं धारेइ संखेज्जं वा कालं, असंखेज्जं वा कालं । से जहानामए केइ पुरिसे अव्वत्तं गंधं अग्घाइज्जा तेणं गंधत्ति उग्गहिए, नो चेव णं जाणइ के वेस गंधेत्ति; तओ ईहं पविसइ, तओ जाणइ अमुगे एस गंधे; तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखेज्जं वा कालं असंखेज्जं वा कालं । से जहानामए-केइ पुरिसे अव्वत्तं रसं आसाइज्जा तेणं रसोत्ति उग्गहिए, नो चेव णं जाणइ के वेस रसेत्ति; तओ ईहं पविसइ, तओ जाणइ अमुगे एस रसे, तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखिज्जं वा कालं असंखिज्जं वा कालं । से जहानामए केइ पुरिसे अव्वत्तं फासं पडिसंवेइज्जा तेणं फासेत्ति उग्गहिए, नो चेव णं जाणइ के वेस फासोत्ति; तओ ईहं पविसइ, तओ जाणइ अमुगे एस फासे, तओ अवायं पविसइ, तओ से उवगयं हवइ, तओ धारणं पविसइ, तओ णं धारेइ संखेज्जं वा कालं असंखेज्जं वा कालं । से जहानामए केइ पुरिसे अव्वत्तं सुमिणं पासिज्जा तेणं सुमिणेत्ति उग्गहिए; नो चेव णं जाणइ के वेस सुमिणेत्ति, तओ ईहं पविसइ, तओ जाणइ अमुगे एस सुमिणे; तओ अवायं पविसइ, तओ मे उवगयं हवइ, तओ धारणं पविसइ, तओ णं धारेइ संखेज्जं वा कालं, असंखेज्जं वा कालं, से तं मल्लगदिट्ठतेणं ॥ सू० ३५ ॥ तं समासओ चउव्विहं पण्णत्तं, तंजहा दव्वओ, खित्तओ, कालओ, भावओ, तत्थ दव्वओ णं आभिणिबोहियनाणी आएसेणं सव्वाइं दव्वाइं जाणइ, न पासइ । खेत्तओणं आभिणिबोहियनाणी

आएसेणं सव्वं खेत्तं जाणइ न पासइ । कालओ णं आभिणिबोहियनाणी आएसेणं सव्वं कालं जाणइ न पासइ । भावओ णं आभिणिबोहियनाणी आएसेणं सव्वे भावे जाणइ, न पासइ ।

उग्गह ईहास्वाओ, य धारणा एव हुंति चत्तारि । आभिणिबोहियनाणस्स भेयवत्थू समासेणं ॥ ८२ ॥ * अत्थाणं उग्गहणम्मि उग्गहो तह वियालणे ईहा । ववसायम्मि अवाओ, धरणं पुण धारणं भित्ति ॥ ८३ ॥ उग्गह इक्कं समयं, ईहावाया सुहुत्तमद्वं तु । कालमसंखं संखं, च धारणा होई नायव्वा ॥ ८४ ॥ पुट्ठं सुणेइ सद्दं, रूवं पुण पासइ अपुट्ठं तु । गंधं रसं च फासं च, बद्धपुट्ठं वियागरे ॥ ८५ ॥ भासासमसेदीओ, सद्दं जं सुणइ मीसियं सुणइ । वीसेदी पुण सद्दं, सुणेइ नियमा पराघाए ॥ ८६ ॥ ईहा अपोह वीमंसा, मग्गणा य गवेसणा । सन्ना सई मई पन्ना, सव्वं आभिणिबोहियं ॥ ८७ ॥

से त्तं आभिणिबोहियनाणपरोक्खं, से त्तं यइनाणं ॥ सू० ॥ ३६ ॥ से किं तं सुयनाणपरोक्खं ? सुयनाणपरोक्खं चोदसविहं पण्णत्तं तंजहा-अक्खरसुयं १ अणक्खरसुयं २ सण्णिसुयं ३ असण्णिसुयं ४ सम्मसुयं ५ मिच्छसुयं ६ साइयं ७ अणाइयं ८ सपज्जवसियं ९ अपज्जवसियं १० गमियं ११ अगमियं १२ अंगपविट्ठं १३ अणंगपविट्ठं १४ ॥ सू० ३७ ॥ से किं तं अक्खरसुयं ? अक्खरसुयं तिविहं पण्णत्तं तंजहा-सन्नक्खरं वंजणक्खरं, लद्धिअक्खरं । से किं तं सन्नक्खरं ? सन्नक्खरं अक्खरस्स संठाणागिई, से त्तं सन्नक्खरं । से किं तं वंजणलक्खरं ? वंजणक्खरं अक्खरस्स वंजणाभिलावो, से त्तं वंजणक्खरं । से किं तं लद्धिअक्खरं ? लद्धिअक्खरं अक्खरलद्धियस्स लद्धिअक्खरं समुप्पजइ, तंजहा-सोइंदिय सद्धिअक्खरं, चकिंखदिय लद्धिअक्खरं, घाणिंदिय लद्धिअक्खरं, रसणिंदिय लद्धिअक्खरं, फासिंदिय लद्धिअक्खरं, नोइंदिय लद्धिअक्खरं, से त्तं लद्धिअक्खरं, से त्तं अक्खरसुयं ॥ से किं तं अणक्खरसुयं ? अणक्खरसुयं अणेगविहं पण्णत्तं, तंजहा-ऊससियं नीससियं, निच्छूट्ठं खासियं च छीयं च । निस्सिधियमणुसारं, अणक्खरं छेलियाइयं ॥ ८८ ॥

से त्तं अणक्खरसुयं ॥ सू० ३८ ॥ से किं तं सण्णिसुयं ? सण्णिसुयं तिविहं पण्णत्तं, तंजहा-कालिओवएसेणं, हेऊवएसेणं, दिट्ठिवाओवएसेणं । से किं तं कालिओवएसेणं ? कालिओवएसेणं जस्स णं अत्थि ईहा, अवोहो, मग्गणा, गवेसणा, चिंता, वीमंसा, से णं सण्णीति लब्भइ । जस्सणं नत्थि ईहा, अवोहो, मग्गणा, गवेसणा, चिंता, वीमंसा, से णं असण्णीति लब्भइ, से चं कालिओवएसेणं । से किं तं हेऊवएसेणं ? हेऊवएसेणं जस्सणं अत्थि अभिसंधारणपुव्विया करणसत्ती से णं सण्णीति लब्भइ । जस्स णं नत्थि अभिसंधारणपुव्विया करणसत्ती से णं असण्णीति लब्भइ, से चं हेऊवएसेणं । से किं तं दिट्ठिवाओवएसेणं ? दिट्ठिवाओवएसेणं सण्णिसुयस्स खओवसमेणं सण्णी लब्भइ, असण्णिसुयस्स खओवसमेणं असण्णी लब्भइ, से चं दिट्ठिवाओवएसेणं, से चं सण्णिसुयं, से चं असण्णिसुयं ॥ सू० ॥ ३९ ॥ से किं तं सम्मसुयं ? सम्मसुयं जं इमं अरहंतेहिं भगवंतेहिं उप्पण्णनाणदंसणधरेहिं तेलुक्कनिरिक्खयमहियपूइएहिं तीयपडुप्पणमणागयजाणएहिं सव्वण्णूहिं सव्वदरिसीहिं पणीयं दुवालसंगं गणिपिडगं, तंजहा-आयारो १ सयगडो २ ठाणं ३ समवाओ

* अत्थाणं उग्गहणं, च उग्गहं तह वियालणं ईहं । ववसायं च अवायं धरणं पुण धारणं भित्ति ॥ १ ॥ इत्थि पाठान्तरमाथा ।

४ विवाहपण्णत्ती ५ नायाधम्मकहाओ ६ उवासगदसाओ ७ अंतगडदसाओ अंतगडदसाओ ८ अ-
 णुत्तरोववाइयदसाओ ९ पण्हावागरणाइं १० विवागसुयं ११ दिट्ठिवाओ १२, इच्चैयं दुवालसंगं
 गणिपिडगं चोइसपुव्विस्स सम्मसुयं, अभिण्णदसपुव्विस्स सम्मसुयं, तेण परं भिण्णेसु भयणा, से
 चां सम्मसुयं ॥ सू० ॥ ४० ॥ से किं तं मिच्छासुयं ? मिच्छासुयं जं इमं अण्णाणिएहिं मिच्छादि-
 ट्ठिएहिं सच्छंदबुद्धिमइविगप्पियं, तंजहा—भारहं, रामायणं, भीमासुरुक्खं, कोडिल्लयं, सगड-
 भइयाओ, खोड (घोडग) मुहं, कप्पासियं, नागसुहुमं, कणगसत्तरी, वइसेखियां, बुद्धवयणं,
 तेरासियं, काविलियं, लोगाययं, सट्ठितंतं, माढरं, पुराणं, वागरणं, भागवयं, पायंजली पुस्सदे-
 वयं, लेहं, गणियां, सउणरुयं नाडयाइं, अहवा बावत्तरिकलाओ, चत्तारि य वैया संगोवंगा,
 एयाइं मिच्छदिट्ठिस्स मिच्छत्तपरिग्गहियाइं मिच्छासुयं एयाइं चेव सम्मदिट्ठिस्स सम्मत्त-
 परिग्गहियाइं सम्मसुयं, अहवा मिच्छदिट्ठिस्सवि एयाइं चेव सम्मसुयं, कम्हा ? सम्मत्तहेउत्तणओ
 जम्हा ते मिच्छदिट्ठिया तेहिं चेव समएहिं चोइया समाणा केइ सपक्खदिट्ठीओ चयंति, से तं मिच्छा
 सुयं ॥ सू० ॥ ४१ ॥ से किं तं साइयं सपज्जवसियं, अणाइयं अपज्जवसियं च ? इच्चैयं दुवालसंगं
 गणि पिडगं बुच्छित्तिनयट्ठयाए साइयं सपज्जवसियं अबुच्छित्तिनयट्ठयाए अणाइयं अपज्जवसियं, तं
 समासओ चउविहं पण्णत्तं, तंजहा—द्वओ, खित्तओ, कालओ, भावओ, तत्थ द्वओ णं सम्मसुयं
 एगं पुरिसं पडुच्च साइयं सपज्जवसियं, बहवे पुरिसे य पडुच्च अणाइयं अपज्जवसियं, खेत्तओ णं पंच
 भरहाइं पंचेरवयाइं पडुच्च साइयं सपज्जवसियं, पंच महाविदेहाइं पडुच्च अणाइयं अपज्जवसियं,
 कालओ णं उस्सप्पिणिं ओसप्पिणिं च पडुच्च साइयं सपज्जवसियं, नो उस्सप्पिणिं नो ओसप्पिणिं
 च पडुच्च अणाइयं अपज्जवसियं, भावओ णं जे जया जिणपन्नत्ता भावा आघविज्जंति, पण्णविज्जंति,
 परुविज्जंति, दंसिज्जंति, निदंसिज्जंति, उवदंसिज्जंति, ते तथा भावे पडुच्च साइयं सपज्जवसियं खा-
 ओवसमियं पुण भावं पडुच्च अणाइयं अपज्जवसियं, अहवा भवसिद्धियस्स सुयं साइयं सपज्जवसियं
 च, अभवसिद्धियस्स सुयं अणाइयं अपज्जवसियं च, सद्वागासपएसगं सद्वागासपएसेहिं अणंतएणियं
 पज्जवक्खरं निप्फज्जइ, सब्बीवाणंपि य णं अक्खरस्स अणंतभागो, निच्चुग्वाडियो जइ पुण सोऽवि
 आवरिज्जा तेण जीवो अजीवत्तां पाविज्जा,— “सुट्ठुवि मेहसमुदए, होइ पभा चंदसुराणं” से चां
 साइयं सपज्जवसियं, से तं अणाइयं अपज्जवसियं ॥ सू० ॥ ४२ ॥ से किं तं गमियं ? गमियां
 दिट्ठिवाओ, से किं तं अगमियं अगमियं कालियं सुयं, से तं गमियं, से तं अगमियां । अहवा तं
 समासओ दुविहं पण्णत्तं, तंजहा—अंगपविट्ठं, अंग बाहिरं च । से किं तं अंगबाहिरं ? अंगबाहिरं
 दुविहं पण्णत्तं, तंजहा—आवस्सयं च, आवस्सयवइरित्तं च । से किं तं आवस्सयं ? आवस्सयं
 छव्विहं पण्णत्तं, तंजहा—सामाइयं; चउवीसत्थओ, वंदणयं, पडिक्कमणं, काउस्सग्गो, पच्चक्खानं;
 से चां आवस्सयं । से किं तं आवस्सयवइरित्तं ? आवस्सयवइरित्तं दुविहं पण्णत्तं, तंजहा—कालियं
 च, उकालियं च । से किं तं उकालियं २ अणेगविहं पण्णत्तं, तंजहा—दसवेयालियं, कप्पियाकप्पियां,
 उल्लकप्पसुयां, महाकप्पसुयां, उववाइयं, रायपसेणियां, जीवाभिगमो, पण्णवणा, महापण्णवणा,
 पमायप्पमायं, नंदी, अणुओगदाराइं, देविंदत्थओ, तंदुलवेयालियं, चंदाविज्जयं, सूरपण्णत्ती, पोरि-
 सिमण्डलं, मण्डलपवेसो, विज्जाचरणविणिच्छओ, गणिविज्जा, ज्ञाणविभत्ती, मरणविभत्ती, आयवि-

सोही, वीयरगसुयं, संखेहणासुयं, विहारकप्पो, चरणविही, आउरपच्चक्खाणं, महापच्चक्खाणं, एवमाइ; से चं उकालियं । से किं तं कालियं ? कालियं अणेगविहं पण्णत्तं, तंजहा-उत्तरज्झयणाइं, दसाओ, कप्पो, ववहारो, निसीहं, महानिसीहं, इसिभासियाइं, जम्बूदीवपन्नत्ती, दीवसा गरपन्नत्ती, चंदप-पन्नत्ती, खुड्डिया विमाणपविभत्तोमहल्लिया विमाणपविभत्ती, अंगचूलिया, वग्गचूलिया, विवाहचू-लिया, अरुणोववाए, वरुणोववाए, गरुलोववाए, धरणोववाए, वेसमणोववाए, वेलंधरोववाए, देवि-दोववाए, णट्ठाणसुए, समुट्ठाणसुए, नागपरियावलियाओ, निरयावलियाओ कप्पियाओ, कप्पवाड-सियाओ, पुप्फियाओ, पुप्फचूलियाओ, वण्हीदसाओ, आसीविसभावणाणं, दिट्ठिविसभावणाणं, सुमिण भावणाणं महासुमिणभावणाणं, तेयग्गिनिसग्गाणं, एवमाइयाइं चउरासीइं पइन्नगसहस्साइं भगवओ अरहओ उसहसामिस्स आइतित्थयरस्स, तहा संखिज्जाइं पइन्नगसहस्साइं मुज्झिमगाणं जिणवराणं, चोइस पइन्नगसहस्साइं भगवओ वट्ठमाणसामिस्स, अवहा जस्स जत्तिया सीसा उप्पत्तियाए, वेणइयाए कम्मयाए, पारिणामियाए, चउत्विहाए बुद्धीए उववेया तस्स तत्तियाइं पइण्णगसहस्साइं, पत्तोयबुद्धावि तत्तिया चेव, से चं कालियं, से चं आवस्सयवइरिचं, से चं अणं-गपविट्ठं ॥ सू० ॥ ४३ ॥ से किं तं अंगपविट्ठं ? अंगपविट्ठं दुवालसविं पण्णत्तं, तंजहा-आयारो १ स्यगडो २ ठाणं ३ समवाओ ४ विवाहपन्नत्ती ५ नायाधम्मकहाओ ६ उवासदसाओ ७ अंतग-डदसाओ ८ अणुत्तरोववाइयदसाओ ९ पण्हावागरणाइं १० विवागसुयं ११ दिट्ठिवाओ १२ ॥ सू० ४४ ॥ से किं तं आयारे ? आयारे णं समणाणं निग्गंथाणं आयारगोयरविणयवेणइयसिक्खाभासा-अभासाचरणकरणजायामायावित्तीओ आघविज्जंति, से समा सओ पंचविहे पण्णत्तो, तंजहा-नाणा-यारे दंसणायारे, चरित्तायारे, तवायारे, वीरियायारे, आयारे णं परित्ता वायणा, संखेज्जा, अणुओग-दारा, संखिज्जा वेढा, संखेज्जा सिलोगा, संखिज्जाओ निज्जुत्तीओ, संखिज्जाओ संगहणीओ, संखिज्जाओ पडिवत्तीओ, से णं अंगट्ठयाए पढमे अंगे, दो सुयक्खंधा, पणवीसं अज्झयणा, पंचासीइ उद्देसण-काला, पंचासीइ समुद्देसणकाला, अट्ठारस पयसहस्साइं पयग्गेणं, संखिज्जा अक्खरा, अणंता गमा, अणंता पज्जवा, परित्ता तसा, अणंता थावरा, सासयकडनिबद्धनिकाइया जिणपण्णत्ता भावा आघ-विज्जंति पन्नविज्जंति, परुविज्जंति, दंसिज्जंति, निदंसिज्जंति. उवदंसिज्जंति. से एवं आया, एवं नाया, एवं विण्णाया, एवं चरणकरणपरुवणा आघविज्जइ, से चं आयारे १ ॥ सू० ॥ ४५ ॥ से किं तं स्यगडे ? स्यगडे णं लोए सइज्जइ, अलोए सइज्जइ, लोयालोए सइज्जइ, जीवा सइज्जंति, अजीवा सइज्जंति, जीवाजीवा सइज्जंति, ससमए सइज्जइ, परसमए सइज्जइ, ससमयपरसमए सइज्जइ, स्यगडे णं असीयस्स किरियावाइसयस्स, चउरासीइए अकिरियावाईणं, सत्तट्ठीए अण्णाणीयवा-ईणं, वत्तीसाए वेणइयवाईणं, तिण्हं तेसट्ठाणं पासंडियसयाणं वूहं किच्चा ससमए ठाविज्जइ, स्य-गडे णं परित्ता वायणा, संखिज्जा, अणुओगदारा, संखेज्जा वेढा, संखेज्जा सिलोगा, संखिज्जाओ निज्जुत्तीओ, संखिज्जाओ संगहणीओ, संखिज्जाओ पडिवत्तीओ, से णं अंगट्ठयाए विइए अंगे, दो सुयक्खंधा, तेवीसं अज्झयणा, तिच्चीसं उद्देसणकाला, तिच्चीसं समुद्देसणकाला, छत्तीसं पयसहस्साइं पयग्गेणं, संखिज्जा, अक्खरा, अणंता गमा, अणंता पज्जवा, परित्ता तसा, अणंता थावरा, सासय-कडनिबद्धनिकाइया जिणपण्णत्ता भावा आघविज्जंति, पणविज्जंति, परुविज्जंति, दंसिज्जंति, निदं-

सिज्जंति, उवदंसिज्जंति, से एवं आया, एवं नाया, एवं विण्णाया, एवं चरणकरणपरूवणा आघ-
विज्जइ, से तं स्यगडे २ ॥ सू० ॥ ४६ ॥ से किं तं ठाणे ? ठाणे णं जीवा ठाविज्जंति, अजीवा
ठाविज्जंति, जीवाजीवा ठाविज्जंति, ससमए ठाविज्जइ, परसमए ठाविज्जइ, ससमयपरसमए ठाविज्जइ,
लोएठाविज्जइ, अलोए ठाविज्जइ, लोयालोए ठाविज्जइ । ठाणे णं टंका, कूडा, सेला, सिंहरीणो,
पम्भारा, कुंडाई, गुहाओ, आगरा, दहा, नईओ, आघविज्जंति । ठाणे णं एगाइयाए एगुत्तरियाए
बुद्धीए दसट्ठाणगविवट्ठियाणं भावाणं परूवणा आघविज्जइ । ठाणे णं परिच्चा वायणा, संखेज्जा अणु-
ओगदारा, संखेज्जा वेढा, संखेज्जा सिलोगा, संखेज्जाओ निज्जुत्तीओ, संखेज्जाओ संगहणीओ;
संखेज्जाओ पडिवत्तीओ से णं अंगट्टयाए तइए अंगे, एगे सुयक्खंधे, दसअज्झयणा एगवीसं उद्देस-
णकाला, एकवीसं समुद्देसणकाला, बावत्तरि पयसहस्सा पयग्गेणं, संखेज्जा अक्खरा, अणंता गमा,
अणंता पज्जवा, परिच्चा तसा, अणंता थावरा, सासयकडनिबट्ठनिकाइया जिणपणत्ता भावा आघ-
विज्जंति, पन्नविज्जंति, परूविज्जंति, दंसिज्जंति, निदंसिज्जंति, उवदंसिज्जंति । से एवं आया, एवं नाया,
एवं विण्णाया एवं चरणकरणपरूवणा आघविज्जइ, से तं ठाणे ३ ॥ सू० ॥ ४७ ॥ से किं तं सम-
वाए ? समवाए णं जीवा समासिज्जंति, अजीवा समासिज्जंति, जीवाजीवा समासिज्जंति, ससमए
समासिज्जइ, परसमए समासिज्जइ, ससमयपरसमए समासिज्जइ, लोए समासिज्जइ, अलोए समासिज्जइ
लोयालोए समासिज्जइ । समवाए णं एगाइयाणं एगुत्तरियाणं ठाणसयविवट्ठियाणं भावाणं परूवणा
आघविज्जइ; दुवालसविहस्स य गणिपिट्ठगस्स पल्लवगे समासिज्जइ, समवायस्स णं परिच्चा वायणा,
संखिज्जा अणुओगदारा, संखिज्जा वेढा, संखिज्जा सिलोगा, संखिज्जाओ, निज्जुत्तीओ, संखिज्जाओ
संगहणीओ, संखिज्जाओ, पडिवत्तीओ, से णं अंगट्टयाएचउत्थे अंगे, एगे सुयक्खंधे, एगे अज्झ-
यणे, एगे उद्देसणकाले, एगे समुद्देसणकाले, एगे चोयाले सयसहस्से पयग्गेणं; संखेज्जा अक्खरा,
अणंता गमा, अणंता पज्जवा, परिच्चा तसा, अणंता थावरा, सासयकडनिबट्ठनिकाइया जिणपणत्ता
भावा आघविज्जंति, पण्णविज्जंति, परूविज्जंति, दंसिज्जंति, निदंसिज्जंति, उवदंसिज्जंति से एवं
आया, एवं नाया, एवं विण्णाया, एवं चरणकरणपरूवणा आघविज्जइ । से तं समवाए ४ सू० ॥ ४८ ॥
से किं तं विवाहे ? विवाहे णं जीवा विआहिज्जंति, अजीवा विआहिज्जंति, जीवाजीवा विआहिज्जंति,
ससमए विआहिज्जति, परसमए विआहिज्जति, ससमएपरसमए विआहिज्जति, लोए विआहिज्जति,
अलोए विआहिज्जति, लोयालोए विआहिज्जति, विवाहस्सणं परिच्चा वायणा, संखिज्जा अणुओग-
दारा, संखिज्जा वेढा, संखिज्जा सिलोगा, संखिज्जाओ निज्जुत्तीओ, संखिज्जाओ संगहणीओ, संखि-
ज्जाओ पडिवत्तीओ, से णं अंगट्टयाए पंचमे अंगे, एगे सुयक्खंधे, एगे साइरेगे अज्झयणसए, दस
उद्देसगसहस्साइं समुद्देसगसहस्साइं, छत्तीसं वागरणसहस्साइं, दो लक्खा अट्ठासीइं पयसहस्साइं
पयग्गेणं, संखिज्जा अक्खरा, अणंता गमा, अणंता पज्जवा, परिच्चा तसा, अणंता थावरा, सासय-
कडनिबट्ठनिकाइया जिणपणत्ता भावा आघविज्जंति, पण्णविज्जंति, परूविज्जंति, दंसिज्जंति,
निदंसिज्जंति, उवदंसिज्जंति, से एवं आया, एवं नाया, एवं विण्णाया, एवं चरणकरणपरूवणा
आघविज्जइ, से तं विवाहे ५ ॥ सू० ॥ ४९ ॥ से किं तं नायाधम्मकहाओ ? नायाधम्मकहासु णं
नायाणं नगराई, उज्जाणाई, चेइयाई, वणसंडाई, समोसरणाई, रायाणो, अम्मापियरो, धम्मायरिया,

धम्मकहाओ, इहलोइयपरलोइया इड्ढिविसेसा, भोगपरिच्चाया, पव्वज्जाओ, परिआया, सुयपरिग्गहा, तवोवहाणाइं, संलेहणाओ, भत्तपच्चक्खाणाइं, पाओवगमणाइं, देवलोगगमणाइं, सुकुलपच्चायाईओ, पुणबोहिलाभा, अंतकिरियाओ य आघविज्जंति, दस धम्मकहाणं वग्गा, तत्थ णं एगमेगाए धम्मकहाए पंच पंच अक्खाइयासयाइं, एगमेगाए अक्खाइयाए पंच पंच उवाक्खाइया सयाइं एगमेगाए उवक्खाइयाए पंच पंच अक्खाइयउवक्खाइयासयाइं एवामेव सपुद्वावरेणं अद्धुट्ठाओ कहाणगकोडीओ हवंतिचि समक्खायं । नायाधम्मकहाणं परित्ता वायणा, संखिज्जा अणुओगदारा, संखिज्जा वेढा, संखिज्जा सिलोगा, संखिज्जाओ निज्जुत्तीओ संगहणीओ, संखिज्जाओ पडिवत्तीओ । से णं अंगट्ठयाए छट्ठे अंगे, दो सुयक्खंधा, एगूणवीसं अज्झयणा, एगूणवीसं समुद्देसणकाला, संखेज्जा पयसहस्सा पयग्गेणं, संखेज्जा अक्खरा अणंता गमा, अणंता पज्जवा, परित्ता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति पण्णविज्जंति परूविज्जंति दंसिज्जंति निदंसिज्जंति उवदंसिज्जंति, से एवं आया, एवं नाया, एवं विण्णाया, एवं चरणकरणपरूवणा आघविज्जइ, से तं नायाधम्मकहाओ ६ ॥ सू० ॥ ५० ॥ से किं तं उवासगदसाओ ? उवासगदसासु णं समणोवासयाणं नगराइं, उज्जाणाइं, चेइयाइं, वणसंडाइं, समोसरणाइं, रायाणो, अम्मापियरो, धम्मायरिया, धम्मकहाओ इहलोइयपरलोइया इड्ढिविसेसा, भोगपरिच्चाया, पव्वज्जाओ, परिआगा, सुयपरिग्गहा, तवोवहाणाइं सीलव्वयगुणवेरमणपच्चक्खाणपोसहोववासपडिबज्जणया, पडिमाओ, उवसग्गा, संलेहणाओ, भत्तपच्चक्खाणाइं, पाओवगमणाइं, देवलोगगमणाइं, सुकुलपच्चायाईओ, पुणबोहिलाभा, अंतकिरियाओ आघविज्जंति; उवासगदसाणं परित्ता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखेज्जाओ निज्जुत्तीओ संखेज्जाओ संगहणीओ, संखेज्जाओ पडिवत्तीओ । से णं अंगट्ठयाए सत्तमे अंगे, एगे, एगे सुयक्खंधे, दस अज्झनणा, दस उद्देसणकाला, दस समुद्देसणकाला संखेज्जा पयसहस्सा पयग्गेणं संखेज्जा अक्खरा, अणंता गमा, अणंता पज्जवा, परित्ता तसा अणंता थावरा, सासयकडनिबद्धनिकाइया जिणपण्णत्ता भावा आघविज्जंति पन्नविज्जंति परूविज्जंति दंसिज्जंति, निदंसिज्जंति, उवदंसिज्जंति, से एवं आया, एवं नाया, एवं विन्नाया, एवं चरणकरणपरूवणा आघविज्जइ; से तं उवासगदसाओ ७ ॥ सू० ॥ ५१ ॥ से किं तं अंतगडदसाओ ? अंतगडदसासु णं अंतगडाणं नगराइं उज्जाणाइं, चेइयाइं, वणसंडाइं, समोसरणाइं, रायाणो, अम्मापियरो, धम्मायरिया, धम्मकहाओ, इहलोइयपरलोइया इड्ढिविसेसा, भोगपरिच्चाया, पव्वज्जाओ परिआगा, सुयपरिग्गहा तवोवहाणाइं, संलेहणाओ, भत्तपच्चक्खाणाइं, पाओवगमणाइं, अंतकिरियाओ, आघविज्जंति; अंतगडदसासु णं परित्ता वायणा, संखिज्जा अणुओगदारा, संखेज्जा वेढा, संखेज्जा सिलोगा, संखेज्जाओ निज्जुत्तीओ, संखेज्जाओ संगहणी, संखेज्जाओ पडिवत्तीओ से णं अंगट्ठयाए अट्ठमे अंगे, एगे सुयक्खंधे, अट्ठवग्गा अट्ठ उद्देसणकाला, अट्ठ समुद्देसणकाला संखेज्जा पयसहस्सा पयग्गेणं; संखेज्जा अक्खरा, अणंता गमा, अणंता पज्जवा, परित्ता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पन्नविज्जंति परूविज्जंति, डंसिज्जंति, निदंसिज्जंति, उवदंसिज्जंति; से एवं आया, एवं नाया, एवं विन्नाया, एवं चरणकरणपरूवणा आघविज्जइ; से तं अंतगडदसाओ ८ ॥ सू० ॥ ५२ ॥ से किं तं अणुत्तरोववाइयदसाओ ?

अणुत्तरोववाइयदसासु णं अणुत्तरोववाइयाणं नगराई, उज्जाणाई, चेइयाई, वणसंडाई, समोसरणाई, रायाणो, अम्मापियरो, धम्मायरिया, धम्मकहाओ, इहलोइयपरलोइया इड्ढिविसेसा, भोगपरिच्चागा, पव्वजाओ, परिआगा, सुयपरिग्गहा, तवोवहाणाई, पडिमाओ, उवसग्गा, संलेहणाओ, भत्तपच्चक्खाणाई पाओवगमणाई, अणुत्तरोववाइय त्ति उववत्ती, सुकुलपच्चायाईओ, पुणवोहिलाभा, अंतकिरियाओ, आघविज्जंति, अणुत्तरोववाइयदसासु णं परित्ता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखेज्जाओ निज्जुत्तीओ, संखेज्जाओ संगहणीओ, संखेज्जाओ पडिवत्तीओ, से णं अंगट्टयाए नवमे अंगे, एगे सुयक्खंधे, तिन्नि वग्गा, तिन्नि उद्देसणकाला, तिन्नि समुद्देसणकाला, संखेज्जाई पयसइस्साई पयग्गेणं संखेज्जा अक्खरा, अणंता गमा, अणंता पज्जवा, परित्ता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पण्णविज्जंति, परूविज्जंति, दंसिज्जंति, निदंसिज्जंति, उवदंसिज्जंति, से एवं आया, एवं नाया, एवं विण्णाया, एवं चरणकरणपरूवणा आघविज्जइ, से चं अणुत्तरोववाइयदसाओ ९ ॥ सू० ॥ ५३ ॥ से किं तं पण्हावागरणाई ? पण्हावागरणेसु णं अट्ठुत्तरं पसिणयं, अट्ठुत्तरं अपसिणसयं अट्ठुत्तरं पसिणापसिणसयं; तंजहा—अंगुट्ठपसिणाई, बाहुपसिणाई, अद्दागपसिणाई, अन्नेविविचित्ता विज्जाइसया, नागसुवण्णेहिं सद्धि दिवा संवाया आघविज्जंति, पण्हावागरणाणं परित्ता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखेज्जाओ निज्जुत्तीओ, संखेज्जाओ संगहणीओ, संखेज्जाओ पडिवत्तीओ; से णं अंगट्टयाए दसमे अंगे एगे सुयक्खंधे, पणयालीसं अज्झयणा, पणयालीसं उद्देसणकाला, पणयालीसं समुद्देसणकाला, संखेज्जाई पयसहस्साई पयग्गेणं; संखेज्जा अक्खरा, अणंतागमा, अणंता पज्जवा, परित्ता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पण्णविज्जंति, परूविज्जंति, दंसिज्जंति, निदंसिज्जंति, उवदंसिज्जंति; से एवं आया, एवं नाया, एवं विरणाया; एवं चरणकरणरूवणा आघविज्जइ; से चं पण्हावागरणाई १० ॥ सू० ॥ ५४ ॥ से किं तं विवागसुयं ? विवागसुए णं सुकडदुक्कडाणं कम्माणं फलविवागे आघविज्जइ, तत्थ णं दस दुहविवागा दस सुहविवागा । से किं तं दुहविवागा ? दुहविवागेसु णं दुहविवागाणं नगराई, उज्जाणाई, वणसंडाई, चेइयाई, समोसरणाई, रायाणो, अम्मापियरो, धम्मायरिया, धम्मकहाओ, इहलोइयपरलोइया इड्ढिविसोसा, निरयमणाई, संसारभवपवंचा दुहपरंपराओ, दुकुलपच्चायाईओ, दुल्लहवोहियत्तं, आघविज्जइ; से चं दुहविवागा । से किं तं सुहविवागा ? सुहविवागेसु णं सुहविवागाणं नगराई, उज्जाणाई, वणसंडाई चेइयाई, समोसरणाई, रायाणो, अम्मापियरो, धम्मायरिया, धम्मकहाओ, इहलोइयपरलोइया इड्ढिविसेसा, भोगपरिच्चागा, पव्वजाओ, परिआगा, सुयपरिग्गहा, तवोवहाणाई, संलेहणाओ, भत्तपच्चक्खाणाई, पाओवगमणाई, देवलोगमणाई, सुहपरंपराओ, सुकुलपच्चायाईओ, पुणवोहिलाभा, अंतकिरियाओ, आघविज्जंति । विवागसुयस्य णं परित्ता वायणा, संखेज्जा अणुओगदारा, संखेज्जा वेढा संखेज्जा सिलोगा, संखेज्जाओ निज्जुत्तीओ, संखिज्जाओ संगहणीओ, संखिज्जाओ पडिवत्तीओ । से णं अंगट्टयाए इक्कारसमे अंगे, दो सुयक्खंधा, वीसं अज्झयणा, वीसं उद्देसणकाला, वीसं समुद्देसणकाला, संखिज्जाई पयसहस्साई पयग्गेणं, संखेज्जा अक्खरा, अणंता गमा, अणंता पज्जवा, परित्ता तसा, अणंता थावरा, सासयक-

डनिबद्धनिकाइया जिणपण्णत्ता भावा आघविज्जंति, पन्नविज्जंति, परुविज्जंति, दंसिज्जंति, निदंसि-
ज्जंति, से एवं आया, एवं नाया, एवं विनाया, एवं चरणकरणपरूवणा आघविज्जइ, से चं विवा-
मसुयं ११ ॥ सू० ॥ ५५ ॥ से किं तं दिट्ठिवाए ? दिट्ठिवाएणं सवभावपरूवणा आघविज्जइ, से
समासओ पंचविहे पण्णत्ते, तंजहा-परिकम्मे १ सुत्ताइं २ पुव्वगए ३ अणुओगे ४ चूलिया ५ । से
किं तं परिकम्मे ? परिकम्मे सत्तविहे पण्णत्ते, तंजहा-सिद्धसेणिया परिकम्मे १ मणुस्ससेणियापरि-
कम्मे २ पुट्ठसेणिया-परिकम्मे ३ ओगाढसेणियापरिकम्मे ४ उवसंपज्जसेणियापरिकम्मे ५ विप्प-
जहणसेणियापरिकम्मे ६ चुयाचुयसेणियापरिकम्मे ७ । से किं तं सिद्धसेणियापरिकम्मे ? सिद्धसेणि-
यापरिकम्मे चउद्दसविहे पण्णत्ते, तंजहा-मउगापयाइं १ एगट्ठियपयाइं २ अट्ठपयाइं ३ पाढोआगा-
सपयाइं ४ केउभूयं ५ रासिबद्धं ६ एगगुणं ७ दुगुणं ८ तिगुणं ९ केइभूयं १० पडिग्गहो ११
संसारपडिग्गहो १२ नंदावचं १३ सिद्धावत्तं १४, से चं सिद्धसेणियापरिकम्मे १ । से किं तं मणु-
स्ससेणियापरिकम्मे ? मणुस्ससेणियापरिकम्मे चउद्दसविहे पण्णत्ते, तंजहा-माउयापयाइं १ एगट्ठिय-
पयाइं २ अट्ठपयाइं ३ पाढोआगासपयाइं ४ केउभूयं ५ रासिबद्धं ६ एगगुणं ७ दुगुणं ८ तिगुणं
९ केउभूयं १० पडिग्गहो ११ संसारपडिग्गहो १२ वंदावचं १३ मणुस्सावचं १४ से चं मणुस्स-
सेणियापरिकम्मे २ । से किं तं पुट्ठसेणियापरिकम्मे ? पुट्ठसेणियापरिकम्मे इक्कारसविहे पण्णत्ते, तंजहा
पाढोआगासपयाइं १ केउभूयं २ रासबद्धं ३ एगगुणं ४ दुगुणं ५ तिगुणं ६ केउभूयं ७ पडिग्गहो
संसारपडिग्गहो ९ नंदावत्तं १० पुट्ठावत्तं ११, से चं पुट्ठसेणियापरिकम्मे ३ । से किं तं ओगाढ-
सेणियापरिकम्मे ? ओगाढसेणियापरिकम्मे इक्कारसविहे पण्णत्ते, तंजहा-पाढोआगासपयाइं १ केउ-
भूयं, रासबद्धं ३ एगगुणं ४ दुगुणं ५ तिगुणं ६ केउभूयं ७ पडिग्गहो ८ संसारपडिग्गहो ९ नंदा-
वचं १० ओगाढावत्तं ११, से चं ओगाढसेणियापरिकम्मे ४ । से किं तं उवसंपज्जणसेणियापरिक-
म्मे ? उवसंपज्जणसेणिया परिकम्मे इक्कारसविहे पण्णत्ते, तंजहा-पाढोआगासपयाइं १ केउभूयं २
रासिबद्धं ३ एगगुणं ४ दुगुणं ५ तिगुणं ६ केइभूयं ७ पडिग्गहो ८ संसारपडिग्गहो ९ नंदावत्तं
१० उवसंपज्जणवत्तं ११, से चं उवसंपज्जणसेणियापरिकम्मे ५ । से किं तं विप्पजहणसेणियापरि-
कम्मे ? विप्पजहणसेणियापरिकम्मे इक्कारसविहे पण्णत्ते, तंजहा-पाढोआगासपयाइं १ केउभूयं २
रासिबद्धं ३ एगगुणं ४ दुगुणं ५ तिगुणं ६ केइभूयं ७ पडिग्गहो ८ संसारपडिग्गहो ९ नंदावत्तं
१० विप्पजहणावत्तं ११, से तं विप्पजहणसेणियापरिकम्मे ६ । से किं तं चुयाचुयसेणियापरिक-
म्मे ? चुयाचुयसेणियापरिकम्मे इक्कारसविहे पण्णत्ते, तंजहा-पाढोआगासपयाइं १ केइभूयं २
रासिबद्धं ३ एगगुणं ४ दुगुणं ५ तिगुणं ६ केइभूयं ७ पडिग्गहो ८ संसारपडिग्गहो ९ नंदावत्तं
१० चुयाचुयवत्तं ११, से चं चुयाचुयसेणियापरिकम्मे ७ । छ चउकनइयाइं, सत्त तेरासियाइं; से
चं परिकम्मे १ । से किं तं सुत्ताइं बावीसं पन्नत्ताइं, तंजहा-उज्जुसुयं १ परिणयापरिणयं २
बहुभंगियं ३ विजयचरियं ४ अणंतरं ५ परंपरं ६ मामाणं ७ संज्जूहं ८ संभिण्णं ९ आहच्चायं १०
सौवत्थियावत्तं ११ नंदावत्तं १२ बहुलं १३ पुट्ठापुट्ठं १४ वियावत्तं १५ एवंभूयं १६ दुयावत्तं १७
वत्तमाण पयं १८ सममिरूठं १९ सव्वओभं २० पस्सासं २१ दुप्पडिग्गहं २२, इच्चेइयाइं बावीसं
सुत्ताइं छिन्नच्छेयनइयाणि ससमयसुत्तपरिवाडीए; इच्चेइयाइं बावीसं सुत्ताइं अच्छिन्नच्छेयनइयाणि

आजीवियसुत्तपरिवाडीए; इचेइयाइं बावीसं सुत्ताइं तिगणइयाणि तेरासिय सुत्तपरिवाडीए; इचेइ-
याइं बावीसं सुत्ताइं चउक्कनइयाणि ससमयसुत्तपरिवाडीए; एवामेव सपुन्नावरेणं अट्टासीई सुत्ताइं
भवंतिच्चि मक्खणां, से तं सुत्ताइं २। से किं तं पुव्वगए? पुव्वगए चउदसविहे पणत्ते, तंजहा—
उप्पायपुव्वं १ अण्णाणीयं २ वीरियं ३ अत्थिनत्थिप्पवायं ४ नाणप्पवायं ५ सच्चप्पवायं ६ आय-
प्पवायं ७ कम्मप्पवायं ८ पच्चक्खणप्पवायं (पच्चक्खणं) ९ विज्जणुप्पवायं १० अवंगं ११
पाणाऊ १२ किरियाविसालं १३ लोकविंदुसारं १४। उप्पायपुव्वस्स णं दस वत्थू, चत्तारि चूलि-
यावत्थू पणत्ता। अग्गाणीयपुव्वस्स णं चोदस वत्थू; दुवालस चूलियावत्थू पणत्ता। वीरियपुव्वस्स
णं अट्ट वत्थू अट्ट चूलियावत्थू पणत्ता। अत्थिनत्थिप्पवायपुव्वस्स णं अट्टारस वत्थू, दस चूलिया-
वत्थू पणत्ता। नाणप्पवायपुव्वस्स णं बारस वत्थू पणत्ता। सच्चप्पवायपुव्वस्स णं दोणिवत्थूपण-
त्ता। आयप्पवायपुव्वस्स णं सोलस वत्थू पणत्ता। कम्मप्पवायपुव्वस्स णं तीसं वत्थू पणत्ता। पच्च-
क्खणपुव्वस्स णं वीसं वत्थू पणत्ता। विज्जाणुप्पवायपुव्वस्स णं पन्नरस वत्थू पणत्ता अवंगपुव्वस्स
णं बारस वत्थू पणत्ता। पाणाउपुव्वस्स णं तेरस वत्थू पणत्ता। किरियाविसालं पुव्वस्स णं तीसं
वत्थू पणत्ता। लोकविंदुसारपुव्वस्स णं पणुवीसं वत्थू पणत्ता, गाहा—

दस १ चोदस २ अट्ट ३ ऽट्टारसेव ४ बारस ५ दुवे ६ य वत्थूणि। सोलस ७ तीस ८ वीसा
९, पन्नरस १० अणुप्पवायम्मि ॥ ८९ ॥

बारस इकारसमे, बारसमे तेरसेव वत्थूणि। तीसा पुण तेरसमे, चोदसमे पण्णवीसाओ ॥९०॥

चत्तारि १ दुवालस २ अट्ट ३ चेवदस ४ चेव चुल्लवत्थूणि। आइल्लण चउण्हं, चूलिया नत्थि ॥९१॥
से तं पुव्वगए। से किं तं अणुओगे? अणुओगे दुविहे पणत्ते, तंजहा—मूलपढमाणुओगे, गंडिया-
णुओगे य। से किं तं मूलपढमाणुओगे? मूलपढमाणुओगे णं अरहंताणं भगवंताणं पुव्वभवा, देव-
गमणाइं, आउं, चवणाइं, जम्मणाणि अभिसेया रायवरसिरीओ, पव्वज्जाओ, तवा य उग्गा, केवलना-
णुप्पयाओ, तित्थपवत्तणाणि य, सीसा, गणहरा, अज्जपवत्तिणीओ संघस्स चउव्विहस्स जं च परिमाणं,
जिणमणपज्जवओहिनाणी, सम्मत्तसुयनाणिणो य वाई अणुत्तरगईय, उत्तरवेउ, चिणो य मुणिणो,
जत्तिया सिद्धा, सिद्धिपहो जह देसिओ, जच्चिरं च कालं, पोआवगया जे जहिं जत्तियाइं भत्ताइं अणस-
णाए ञेइत्ता अंतगडे, मुणिवरुत्तमे, तिमिरओघ विप्पमुक्के मुक्खसुहमणुत्तरं च पत्ते, एवमन्ने य एवमाइ-
भावा मूलपढमाणुओगे कहिया, से तं मूलपढमाणुओगे से किं तं गंडियाणुओगे? गंडियाणुओगे
कुलगरगंडियाओ, तित्थयरगंडियाओ, चक्कवट्ठिगंडियाओ, दसारगंडियाओ, बलदेवगंडियाओ,
बामुदेवगंडियाओ, गणधरगंडियाओ, भद्वाहुगंडियाओ, तवोकम्मगंडियाओ, हरिवंसगंडियाओ
उरुसप्पिणीगंडियाओ, ओसप्पिणीगंडियाओ, चिचंतरगंडियाओ अमरनरतिरियनिरयगइगमणवि-
विहपरियट्ठणेषु एवमाइयाओ गंडियाओ आघविज्जति, पण्णविज्जति से तं गंडियाणुओगे, से तं
अणुओगे ४। से किं तं चूलियाओ? आइल्लणं चउण्हं पुव्वणं, चूलिया सेसाइं पुवाइं अचूलियाइं,
से तं चूलियाओ। दिट्ठिवायस्स णं परिता वायणा, संखेज्जा अणुओगदारा, संखेज्जा वेढा, संखेज्जा

सिलोगा संखेज्जाओ पडिवत्तीओ संखिज्जाओ निज्जुत्तीओ, संखेज्जाओ संगहणीओ से णं अंगट्टयाए बारसमे अंगे, एगे सुयक्खंधे, चोइस पुद्दाइं, संखेज्जा वत्थू, संखेज्जा चूलवत्थू, संखेज्जा पाहुडा, संखेज्जापहुडपाहुडा, संखेज्जाओ पाहुडियाओ, संखेज्जाओ पाहुडपाहुडियाओ, संखेज्जाइं पयसदस्साइं पयग्गंणं, संखेज्जा अक्खरा, अणंता गमा, अणंता पज्जवा. परित्ता तसा अणंता थावरा, सासयकडनिबद्धनिकाइया जिणपन्नत्ता भावा आघविज्जंति, पण्णविज्जंति, परुविज्जंति, दंसिज्जंति, निदंसिज्जंति, उवदंसिज्जंति । से एवं आया, एवं नाया एवं विण्णाया, एवं चरणकरणपरूवणा आघविज्जंति, से त्तं दिट्ठिवाए १२ ॥ सू० ५६ ॥ इच्चेइयंमि दुवालसंगे गणिपिडगे अणंता भावा अणंता अभावा, अणंता हेऊ, अणंता अहेऊ, अणंता कारणा, अणंता अकारणा, अणंता जीवा अणंतता अजीवा अणंता भवसिद्धिया अणंता अभवसिद्धिया अणंता सिद्धा, अणंता असिद्धा पण्णत्ता—
भावमभावा हेऊमहेउ, कारणमकारणे चेव । जीवाजीवा भवियमभविया सिद्धा असिद्धा य ॥ ९२ ॥

इच्चेइयं दुवालसंगं गणिपिडगं तीए काले अणंता जीवा आणाए विराहित्ता चाउरंतं संसारकंतारं अणुपरियट्ठिं सु इच्चेइयं दुवालसंगं गणिपिडगं पडुप्पण्णकाले परित्ता जीवा आणाए विराहित्ता चाउरंतं संसारकंतारं अणुपरियट्ठंति । इच्चेइयं दुवालसंगं गणिपिडगं अणागए काले अणंता जीवा आणाए विराहित्ता चाउरंतं संसारकंतारं अणुपरियट्ठिस्संति । इच्चेइयं दुवालसंगं गणिपिडगं तीए काले अणंता जीवा आणाए आराहित्ता चाउरंतं संसारकंतारं बीईवइं सु । इच्चेइयं दुवालसंगं गणिपिडगं पडुप्पण्णकाले परित्ता जीवा आणाए आराहित्ता चउरंतं संसारकंतारं वीईवयंति । इच्चेइयं दुवालसंगं गणिपिडगं अणागए काले अणंता जीवा आणाए आराहित्ता चाउरंतं संसारकंतारं वीईवइस्संति । इच्चेइयं दुवालसंगं गणिपिडगं न कयाइ नासी, न कयाइ न भवइ, न कयाइ न भविस्सइ, भुविं च, भवइ य, भविस्सइ य, धुवे, नियए, सासए, अक्खए, अव्वए, अवट्ठिए, निच्चे । से जहानामए पंचत्थिकाए न कयाइनासी न कयाइ नत्थि, न कयाइ न भविस्सइ, भुविं च, भवइ य, भविस्सइ, य, धुवे, नियए, सासए, अक्खए, अव्वए, अवट्ठिए, निच्चे, एवामेव दुवालसंगं गणिपिडगं न कयाइ नासी, न कयाइ नत्थि, न कयाइ न भविस्सइ, भुविं च, भवइ य, भविस्सइ य, धुवे, नियए, सासए, अक्खए, अव्वए, अवट्ठिए, निच्चे । से समासओ चउव्विहे पण्णत्ते, तंजहा—दव्वओ, खिच्चाओ, कालओ, भावओ । तत्थ दव्वओ णं सुयनाणी उवउत्ते सव्वदव्वाइं जाणइ पासइ, खिच्चाओ णं सुयनाणी उवउत्ते सव्वं खेत्तं जाणइ पासइ, कालओ णं सुयनाणी उवउत्ते सव्वं खेत्तं जाणइ पासइ, भावओ णं सुयनाणी उवउत्ते सव्वे भावे जाणइ पासइ ॥ सू० ५७ ॥

अक्खर संन्नी सम्मं, साइयं खलु सपज्जवसियं च । गमियं अंगपविट्ठं, सत्तवि एए सपडिवक्खा ॥ ९३ ॥ आगमसत्थग्गहणं, जं बुद्धिगुणेहिं अट्ठहिं दिट्ठं । विंति सुयनाणलंभं, तं पुव्वविसारया धीरा ॥ ९४ ॥

सुस्सइ १ पडिपुच्छइ २ सुणेइ ३ गिण्हइ ४ य ईहएयावि ५ । तत्तो अपोहए ६ वा, धारेइ ७ करेइ वा सम्मं ८ ॥ ९५ ॥

मूअं हुंकारं वा, वाढक्कारं पडिपुच्छ वीमंसा । तत्तो पसंगपारायणं च परिणिट्ठ सत्तमए
॥ ९६ ॥

सुचत्थो खलु पढमो, वीओ निज्जुत्तिमीसिओ भणिओ । तइओ य निरवसेसो, एस विही होइ
अणुओणे ॥ ९७ ॥

से चं अंगपविट्ठं, से चं सुयनाणं से चं परोक्खनाणं, से चं नंदी ॥ नंदी समत्ता ॥

इअ नंदीसुत्तं समत्तम्

❀ उववाइ सूत्तं ❀

(बावीस गाथा)

कहिं पडिहया सिद्धा ? कहिं सिद्धा पडिहिया ? । कहिं बोंदि चइत्ता णं, कत्थ गंतूण सिज्झई ॥ १ ॥
 अलोगे पडिहया सिद्धा, लोयग्गे य पडिहिया । इहबोंदि चइत्ता णं, तत्थ गंतूण सिज्झई ? ॥ २ ॥
 जं संठाणं तु इहं भवं चयं तस्स चरिमसमयंमि । आसी य पएसघणं तं संठाणं तहिं तस्स ॥ ३ ॥
 दीहं वा हस्सं वा जं चरिमभवे हवेज्ज संठाणं । तत्तो तिभागहीणं सिद्धाणोगाहणा भणिया ॥ ४ ॥
 तिणिण सया तेत्तीसा घणुत्तिभागो य होइ बोधवा । एसा खलु सिद्धाणं उकोसोगाहणा भणिया ॥ ५ ॥
 चत्तारि य रयणीओ रयणिति भागूणिया य बोधवा । एसा खलु सिद्धाणं मज्झिमओगाहणा भणिया ॥ ६ ॥
 एका य होइ रयणी साहीवा अंगुलाइ कट्ट भवे । एसा खलु सिद्धाण जहणणओगाहणा भणिया ॥ ७ ॥
 ओगाहणाए सिद्धा भवत्तिभागेण होइ परिहीणा । संठाणमणित्थं जरामरणविप्पमुक्काणं ॥ ८ ॥
 जत्थ य एगोसिद्धो तत्थ अणंता भवक्खयविमुक्का । अण्णोणसमोगाढा पुट्ठा सव्वे य लोणंते ॥ ९ ॥
 फुसइ अणंते सिद्धे सव्वपएसेहि णियमसा सिद्धो । ते वि असंखेज्जागुणा देसपएसेहि जे पुट्ठा ॥ १० ॥
 असरीरा जीवघणा उवउत्ता दंसणे य णाणे य । सागारमणागारं लक्खणमेयं तु सिद्धाणं ॥ ११ ॥
 केवलणाणुवउत्ता जाणंहि सव्वभावगुणभावे । पासंति सव्वओ खलु केवलदिट्ठीअणंताहिं ॥ १२ ॥
 णवि अत्थि माणुसाणं तं सोक्खं णविय सव्वदेवाणं । जं सिद्धाणं सोक्खं अवावाहं उवगयाणं ॥ १३ ॥
 जं देवाणं सोक्खं सव्वद्धापिंडियं अणंतगुणं । ण य पावइ मुत्तिसुहं णंताहिं वग्गवग्गूहि ॥ १४ ॥
 सिद्धस्स सुहो रासो सव्वद्धापिंडिओ जइ हवेज्जा । सोणंतवग्गभइओ सव्वागासे ण माएज्जा ॥ १५ ॥
 जह णाम कोइ मिच्छो णगरगुणे बहुविहे वियाणंतो । ण चएइ परिकहेउं उवमाए तहिं असंतीए ॥ १६ ॥
 इय सिद्धाणं सोक्खं अणोवमं णत्थि तस्स ओवम्मं । किंचि विसेसेणेत्तो ओवम्ममिगं सुगह वोच्छं ॥ १७ ॥
 जह सव्वकामगुणियं पुरिसो भोत्तूण भोयणं कोइ । तण्हालुहाविमुक्को अच्छेज्ज जहा अमियत्तित्तो ॥ १८ ॥
 इय सव्वकालत्तित्ता अतुलं निव्वाणमुवगया सिद्धा । सासयमव्वावाहं चिट्ठंति सुही सुहं पत्ता ॥ १९ ॥
 सिद्धत्ति य कुद्धत्ति य पारगयत्ति य परंपरगयत्ति । उम्मुक्ककम्मकवया अजरा अमरा असंगा य ॥ २० ॥
 णिच्छिणसव्वदुक्खा जाइजरामरणबंधणविमुक्का । अवावाहं सुक्खं अणुहोंती सासयं सिद्धा ॥ २१ ॥
 अतुलसुहसागरगया अवावाहं अणोवमं पत्ता । सव्वमणागयमदं चिट्ठंति सुहं पत्ता ॥ २२ ॥

॥ उववाइ उवंगं समत्तं ॥

भं भवतु ।

